



文恭集卷十八

外制

張昇可兵部員外郎充天章閣待制環慶路都部署經略安撫等使兼知慶州制

敕朕選通經術有行義之士訪對制閣參典祕圖置在內朝之聯本惟儒者之職間咨策略分寄翰垣亦服采于禁嚴且推恩于臨遣我收文武之用往制羌胡之衝乃獲能臣爰敷茂典具官某有史魚之直稱壺遂之賢稔聞忠規嘗置罔錯端心向國處鯁議而弗回正色立朝臨至剛而不吐屬西川之闕帥惟安化之控邊言念戎翰之良無踰書殿之舊進參持橐寵升屬車臨長列藩表率本道噫左右薦替內外屏毗委仗則均安集攸賴書不云乎爾身在外乃心罔不在王室寬我西顧勉而求忠

劉沆可依前給事中充龍圖閣學士知開封府制

敕前世尹正之才難于三輔本朝都府之政刑諸四方我得吏師

寄之京劇宜峻圖書之職往裁輦轂之煩具官某風業俊雄體識明遠早代言于掖省常賦政于藩方文采潤色而有餘經術飾事而不惑委靈刑之審克多中典之平反咨乃讞疑副予欽恤試公才之敏百鍊不銷考績用之期一閏已效睠惟浩穰之地實資強濟之能剖析煩拏推行靡密自近庭而選眾繇內閣以升名往司獄市之繁善體教條之意使枉直有寄苛慝不興嘉此治功以光表則

錢明逸可依前兵部員外郎充龍圖閣學士知蔡州制

敕京輦之政誠處劇煩狂獄之情所當審克既失防閑之理宜從罷免之科具官某雅稱偉才早奉大對入典明命作為訓辭擢預禁林之游委司都府之治失于馭吏淹乃繫囚久違弊斷之期不勝楚掠之苦以至踣斃良用哀恫而又日者庸狡之人構造詐譖之策冀望非福震驚朕師雖已正于刑書猶未安于朝議其上尹政且領守符仍優內閣之除兼委近藩之便尚圖敏政勿替來忠

劉沆可龍圖閣學士給事中知永興府制

敕朕以內閣圖書之職資儒術行業充備其選全雍戎馬之地用文武器幹倚以為重既獲敷求之志宜有臨遣之恩姑示睠懷且旌圖任以爾具官某才具明決知識周通自振藻于皇塗實有聲于當世作我明命著訓暢于西臺敷厥教條勤撫綏于南夏能去山林之藁善得江漢之心比奉更書還參從蹕委近司之審克多中典之平反刑讞靡留朝言惟穆會長安之闕帥方四顧以須才僉曰汝賢協于朕意左右獻納雖志力之是圖內外屏毗在藩朝之均重爰申茂典益進榮名用煩俊哲之行參付德刑之計噫重兵所部雜谷攸居雖方略素明無煩于多訓而剛柔參濟勉務于適中往服茲猷勉成遠用

左中奉大夫權尚書吏部侍郎兼史館修撰周綰除集英殿修撰知溫州制

敕近臣勇退游控于枕言王者憫勞俯從于雅志睠惟耆艾宜錫

恩輝具官某學術醇深行能高妙登車攬轡徧更外服之華拖玉  
飛綏晚上禁塗之峻銓綜著天官之效編摩光金匱之藏方隆尚  
齒之時遽有由衷之請老成是賴申諭莫回升麗正之崇資畀永  
嘉之名郡以優耆德以示殊私尚勉建于風聲卽還躋于次對  
右侍禁折繼祖可西染院使知福州制

敕具官某爾世蹈忠圖族雄邊部率和種落懷附朝家嚮茲伯氏  
之良承濟前人之業遏積中之外警委河上之列城方倚拊循遽  
嗟殞缺覽疆臣之條奏逮部眾之控祈謂爾武幹尤長純誠可任  
習知戎馬之事能識羌夷之情宜襲舊勳式俞來請伸部符之朝  
獎進染翟之使聯恩典有崇名秩其慎當善遇于吾眾務謹守于  
先規

李昭述可依前刑部侍郎充龍圖閣學士秦鳳路馬步軍副都部

署兼知秦州制

敕二閣峙于內職在圖書六郡被于邊任居戎馬矧隴西之尚武

惟天水之稱雄謀諸師臣得于雋望適倚鎮綏之略宜推臨遣之  
恩具官某盛德名門偉才良器該典文而多洽資志識而周通居  
然敏猷應乃郡務幾廷進直得安世慎密之風北道倚臨有翁歸  
文武之用塞垣以肅年閏比更試乃秦中濱茲河外撫羌戎之雜  
種制汧隴之勁兵牧人其難選眾斯屬用寬西顧之睠具急盛秋  
之防兼疇制閩之勤庸益進祕圖之禁職憑賴所寄內外則均勉  
從易壤之行嘉佗幹方之最其聽朕命不忘爾勞

劉巽可主客員外郎知濟州仍賜紫制

敕某究明經義初預銓集之流通曉吏文遂膺宰旅之選領校五  
曹之事慎持三省之方能寡悔尤頗精比例寢升朝次屢易歲陰  
用圖風力之勞出寄符書之守仍進握蘭之秩復班染莫之章臨  
長吏民宣錄條教勉而善政虔我渥恩

李珣可文州刺史制

敕朕考經術之文見春秋之法推親親以貴母黨因善善而及宗

支況我外親殞夫元舅痛享年之不永撫遺札以增欷俾加惠于孤煢示敦仁于戚屬具官某柔恭克孝通敏且材侍子舍而無違出后家而有裕早任天闕之要誠爲戚畹之良險釁所鍾哀摧在疚尋推恩之有自在進秩以攸宜已升右閣之華兼刺列城之重慰其孝嗣思乃前人式究哀榮勉思法訓

趙良弼自豐州刺史除撫州刺史制

敕師賓之列素用正人牧守之任必求良吏具官某資于忠信文之禮樂言詞詳雅器識洪通令問徽猷搢紳推重南宮起草事著于彌綸東吳授鉞功存于制勝中外之政終始不渝爰自休間尤彰操尚宮垣選美俾參調護之職方鎮藉能式委分憂之寄

劉永年可寧州刺史制

敕某夫刺史古之方伯爲國爪牙任千里之尊秉一州之率威懷所寄擢敘尤艱以爾胄緒本華才資兼茂謹孚匪懈敏濟有聞歷內庭諸使之聯申列部鈐兵之委載環歲序參敘宿勤特升刺部

之名尚寄典土之任廩給優厚朝渥便蕃勿忘俯偃之恭更圖臨履之效

張惟吉可果州刺史制

敕謹質者朕所倚愛澹退者人之難能況夫參珥左璫列侍中省久居親信之任弗矜委使之勞宜舉褒章且旌冲範具官某忠純有守謙約自持侍帷幄之起居常勤陟恪慎樞機之周密能絕悔尤比資強敏之材屢任劇繁之職曾驅馳之不憚在俯偃而益恭未嘗求官且不遺力安和備于諸事情晦簡于朕心是用申敘積勤褒遷茂秩領劇部團兵之重增昆臺近侍之榮名數有加寵靈特出勿替謹孚之志益昭毗倚之懷

郭元又可忠州刺史陳拱可昌州刺史制

敕某等內統禁局參領列藩所以昭使範之華重戎翰之寄用甄勞最式示褒遷以爾元又材武是經智謀在任以爾拱迪知忠果服在勇方竝高諸使之聯分委護兵之任絕甘有素馭眾適宜代

北以清嶠南且肅嘉訓齊之輯睦逮控遏之底寧并升使竹之名  
參壯和門之重就虔褒典勿替忠圖

邢王孫宗望可遙郡刺史制

敕某朕篤在展親樂聞爲善用進州藩之秩且旌宗邸之能恩出  
褒優義存開勸以爾本支秀發環衛參居滋承信厚之風雅厭紛  
華之習慕前良之楷法試累牘之柔毫獻狀公車畱觀天帳迴臻  
體骨之媚深嘉芝墨之工特升刺部之名用獎臨池之學勿忘美  
志更懋令猷

張中庸可開封府判官制

敕某漢制以御史監三輔不法復有按章覆問之選至于惠文柱  
下皆獄法之冠也不止于彈治而已今都畿尹政之劇獄市姦人  
之淵隱僞干憲屬之良吏以爾治劇有餘審固不撓資其抑欲之  
利與夫照姦之明往裁諸煩善輔于尹

劉能可御前忠佐馬步軍副都領依前合州刺史制

敕某句陳之衛參護宸嚴尺一之遷舉循功次以爾奮絲行伍通  
知勇方頗積勤庸遂有高爵遙刺州部近拱巖除宜升環列之名  
益仁樸忠之效勿忘勵節以答推恩

譚嘉震可依舊內園使昭州刺史制

敕內司苑監遙制蕃職所以壯爪牙之選重襟喉之寄矧幹方之  
惟舊且扞邊之有勞屬申委于兵鈴宜兼榮于使竹具官某本惟  
將種少有驍名好慷慨以論兵加深沈而多算洵領偏裨之任數  
當外禦之鋒疆埃無侵軼之虞軍行有輯睦之整乃睠安化適控  
西戎尤急盛秋之防特倚勁兵之處寵升刺部雄示專城勉踵世  
勳益圖軍最

王興可陵州團練使傅永吉可開州刺史孟元可普州刺史蔣偕

可忠州刺史制

敕某等夫舉不失功則勞臣知勸賞不遺外則主恩下究朕閱邊  
吏之瑣因見疆臣之名其間久踐戎行屢當寇禦功名著而甚白

爵秩鬱而未遷用振滯淹特申甄拔以爾與資韞材武濟以樸忠以爾永吉嘗摧姦鋒名有勇決以爾元氣質沈毅部分精明以爾偕文武自將功名已任竝曉知疆事而達練戎韜曩賴扞城之雄比居控塞之任種落畏伏亭障底寧今參委戎鈐復分制藩任軍陣輯睦士伍綏懷稽用舊勞申加褒典進領團兵之重參升刺部之名出于朕心旌爾邊最各思自效勿替曩圖

石全彬可陵州團練使制

敕某朕寵厚武材竝建使範乃眷軍團之峻尤爲戎翰之榮方寄外虞式頒成渥以爾操修無缺幹裕有聞以謹孚之資早服勞于官省以敏洽之用久宣力于邊關眷維部之控戎惟匈奴之被塞允號勁兵之處尤艱禦眾之材資乃練更委之鈐護仍進訓齊之秩用旌臨履之勞往服茂恩善撫吾眾

劉永世可果州刺史充本州團練使制

敕朕慎名器之分懋官賞之宜差次功能擢敘武爵旣篤先勞之

勸兼圖久次之勤用遷滯畱宜伸甄拔以爾承胄緒之舊資性質之良遙分竹使之符近總琳房之職習事經而無缺奉朝請而有虔閱官簿而則深覽需章而乃實爰紀恪恭之節用升團練之名尚涖威神之庭往欽使部之寵益思慎履當體殊恩

王從善可西京左藏庫使依前充果州團練使制

敕某洛師之重分置于官儀禁帑之名差優于使範用甄往效特懋茲恩以爾勳閱緒餘近庭陟恪蹈世忠而濟美服王務以宣勞曩者資素性之謹良委禁垣之提警雖宿衛無狀俾出領于兵鈐而疇昔有勞用稍遷于使局示舊勤之匪棄尚褒典之是承

余靖可左神武大將軍遙郡刺史州鈐轄差遣制

敕某陟罰之典竝體于至公甄敘之恩用圖于曩效張敞起于亡命安國擢于徒中資以前勤抑惟往制以爾博于古學濟以敏文自致秀科優入制等常游冊府之祕遘升辭禁之華煩使有材首公能力曩因往咎中見謫居越在南服之荒多歷徂年之所尚分

留籍已進亞卿朕以爾久侍近班三使絕域念勞可錄在宥弗忘擢居環衛之嚴遙刺列城之重無以名器之小異當問才略之何如起圖而忠往服朕命就司鈐護當體敘收李瑋可起復雲麾將軍保州團練使制

敕朕感先慈早棄長世眷乃元舅適及外家享命弗融遺恩宜厚具官某義方被教退讓陶風稟韶令以兼資處紛華而匪雜羈鷹選尚方俾進修屬邁親喪例推權制用正軍團之秩兼升環衛之名式慰孝思俾參朝請庶幾進見特示眷懷勉遵肯構之規宜亮奪哀之意

溪洞新州知州彭師政富州知州彭師晡並可銀酒監武知本州

### 軍州事制

敕某等越在辰溪欽我朝化善固封守多歷歲年有嘉成勞且敘前化崇階美秩勳等憲聯並命詔除益圖忠效溪洞寧州知州彭師雁可銀酒監武知寧州制

敕某能慕聲明善固封守附陳前比求敘上恩嘉其輸附之誠伸以褒優之命崇階茂秩華絨命章併示寵綏益圖欣戴曹正可袁州司馬制

敕某爾幹局無缺第課當遷具有奏封乞從歸老聽解算商之任爲除司武之名往服優恩俾從素志

追官勒停人屯田員外郎蕭禮可萊州別駕制

敕某籍通省郎班在朝序簡書罔畏簠簋不修詐諛受昧鞠問得狀所坐狼籍談者諠譁宜正刑書奪去官秩與之上介猶曰寬恩解賓王可開封府判官閻詢可開封府推官制

敕某等古者京兆比三輔爲劇今之都府亦萬事所叢必簡乃僚協相厥務以爾賓王儒者之風志行修潔臺觀討論之職京輦煩拏之任稽諸行事已試之效孔明以爾詢髦士之良才本強濟緣中司薄罪之坐歷外屏左官之遷長于治民可紀之績甚白或就甄最狀升冠元僚或還錄敏資佐治煩局噫郵罰麗于事察獄必



以情勉思是言勿懈于位

高良夫可依前主客員外郎充開封府判官石揚休可太常博士兼祕閣校理充開封府推官制

敕某等朕高選時望擢典京司妙簡才髦參備僚屬以爾良夫習于爲吏治有能名以爾揚休才堪決煩文甚爾雅或嘗操外憲之柄或久預中祕之游稽慰薦而有先試浩繁而已效是宜參濟京劇輔佐尹賢爾其察人冤謹吏黠慎要囚之伏念體庶獄之哀矜務竭乃心以稱朕意

范純熙可鄧州節度推官制

敕某習知吏事領佩縣章本于惠心善撫黔細沛有餘力能制寇偷支黨悉除鄉亭絕警州上勞迹臺舉賞科擢亞元僚之游且旌健令之最

凌起可昭化軍節度推官制

敕某本造士之良膺字人之寄越在嶺服肅治邑封尤旌方略之

施多有寇攘之獲閱計臺之言狀覆憲部而中科擢參賓謀申示朝賞

解賓王可開封府推官制

敕某中畿尹政之繁總司都輔先朝景德之制增至屬僚參聽庶獄之辭分裁一府之任用釐浩劇必選幹能以爾學力淹通性資純固預儒館討論之任更曲臺贊相之儀用先行實之圖且膺政務之試強敏者乃其有濟安舒者戒于後時往承上官勉修爾職鄒唐可懷州防禦推官張式可賓州軍事推官制

敕某等往者職在詰盜資入督郵能修尉察之方善厲追胥之力寇偷就獲墟落底寧覽嘉勤吏之能超用有司之格擢從州簿參預賓籌往祇從事之榮勿替首公之敏

許震可試大理評事充威武軍節度推官制

敕具官某循吏之子清白承遺緣蔭格而隨牒階詔舉以字民所守廉平素行修整代還有應書之最次補以入幕之僚尚寄弦歌

勉績功次滿課之上則有前詔

張伯通可試大理評事充奉寧軍節度推官制

敕具官某朕用天聖詔書選舉令宰賞格條目端委詳陳所以爲官擇人廣施德于天下比聞撫字多獲善良齎伐之來恩典奚吝爾以蔭籍階仕版以薦任佩縣章滿秩有功在法當陟宜參入幕之畫尚寄鳴弦之治往欽無忽汔濟有成尚伫來勤乃終後慶李益可試大理評事充徐州觀察推官制

敕具官某任居宰字介在邊隅歲惡無聊民起爲盜能施設于方略悉擒送于根株縣部底寧臺格應賞乃睠彭門之劇俾參幕府之籌用錄前勤尚圖來效

劉義叟可試祕校呂夏卿可試祕校充石州軍事推官餘如故制

敕某等奮自髦彥名有學術義叟早膺詔舉獻策開邊夏卿擢自賓興以文入彀或試員于列寺或隨牒于遠方會置局以修書俾和鉛而參職觀所舉者咸吾近臣稔聞約史之勞加有奉祠之恪

熙成均慶典領爲言用升賓幕之資對服書筵之舊姑爲漸陸勉濟成編

張子庚可殿中丞依舊知縣制

敕具官某夫春秋之法先內而後外繇近以及遠爾早籍彀中之雋適治寰內之邑持心近厚從政弗苛條上年庸協應賞格進丞盾省之局參預朝著之聯于以風激四方開勸勤吏此亦先京師後諸夏之義也其楸承之哉

劉槃可試大理評事充忠武將軍節度推官知邢州堯山縣制

敕具官某爾擢奉臺詔治茲邑氓能體勤約之風善賦惠和之政終更無缺旌陟有條宜升幕府之游尚寄縣同之任勉修前績姑俟後恩

前守鄜州洛川縣令宋太可試大理評事充天平軍節度推官知

潞州壺關縣事制

敕某以敏給之才推擇爲令在職稱辦于法當遷列于賓席之聯

付以縣章之寄益圖善治以漸榮階

張徽可試大理評事充節度推官知夔州奉節縣制

敕具官某以軍從事之職任邑大夫之政秩滿官下代還邊隅較課中銓升榮大幕尚寄弦歌之治勿忘簞簋之修有伫來勤以須後陟

高汝士可山南西道節度推官知瀘川縣韓澤可山南東道節度

推官知廣安軍新明縣制

敕某等縣大夫之職去民最親朕用天聖詔書拔舉清吏付以銅墨寄以弦歌似聞元元頗受其賜脫有異績何愛陟恩爾等名在選中治成官下終更齎伐鉤校應書稍升幕府之游重煩美錦之製勉卒前課具如賞條

郭旦可依前祕校知單州成武縣公遜迪可試祕校知齊州歷城

縣馬居方可試祕校知濮州臨濮縣制

敕某等邑大夫之任以寄赤子之命非有臨履善最監司薦延朕

未嘗輕授銅墨爾等居尉察之職有追胥之勞翦除盜姦肅清鄉部本郡言狀有司覆實在勤可紀于法得遷竝試守一同臨長百里有民有社良足爲政既能屏去苛慝便當存撫細弱脫有善迹何愛存官往正爾心使稱朕意

李舉賢可洛州曲周縣令制

敕某以法學之明縻我爵秩以吏資之習服我尉員方略甚明寇攘多獲有司言狀賞格應遷嘉其敏才擢以健令勉樹庇民之績且旌詰盜之能

呂用賢可磁州邯鄲縣令制

敕某句稽名官承乏比邑檢簿書之謬絕有毫差督寇偷之姦悉能株送鄉亭肅乂民堵安安所部條聞厥勞炳著宜示賞科之信俾要健令之章往服褻遷益圖員補

成吉甫可趙州隆平縣令制

敕某中經生之科隨大選之牒守尉百里詰盜四封盡得主名多

獲支黨留司上其最狀憲部議其賞條宜升佩于縣章用勸登于吏力就虔襄寵勉務清修

申陟可相州湯陰縣李伍可兗州瑕邱縣令制

敕某等名居尉察職在追胥任百里之佐員詰四封之姦盜根株多獲閱條聞宜旌印綬之榮擢布弦歌之政用優力幹且信賞條務濟惠和往綏細弱

王昭可濮州臨濮縣令制

敕某曩居尉察嘗翦寇攘尋稽臺賞之條已結縣同之綬綸函未拜苴制乃嬰適御祥琴追申前詔用復弦歌之治益思篋篋之修趙貺可相州永和縣令制

敕某調補都銓追胥劇邑善知姦穴之隱悉得主者之名株送甚多邑居以肅監司言狀參覆應書宜從健令之遷且賞詰姦之效益圖撫字無替操修

宋康濟可青州益都縣尉制

敕某本繇襄博嘗舉蹶張預禽寇偷遂有班籍厭走一封之傳求換半通之綸俾領追胥且從志尚當善恤于民隱務祗守于官箴种世衡男古可鳳翔府天興縣尉制

敕某男某爾父勳以將材官吾邊部著首公砥節之效有典戎幹方之能適倚扞城不幸早世覽觀爾奏論列父功因命憲司攷驗實狀事雖存于端緒辭有涉于詐諉尚念前人舊著勤績爲寬法律之坐俾司簿書之稽當體寬優勿忘甄錄

白舜元可莫州長豐縣尉制

敕某名書班籍年在東隅厭乘輶車願仕郡邑亦以餘力庶幾學文俾除尉察之員尚謹追胥之職勿渝美志茲懋來勤

敕賜五經及第孫師旅可鄆州須城縣尉制

敕某曩以經中美科預選便殿今以年合常格得集中銓可以試吏服官詰姦禁盜無替而學尚慎厥初謹視寇偷善遇黔細  
敕賜毛詩及第王仲甫可光化軍乾德縣尉制

敕具官某爾擯用專門之學當中揚庭之科會失節宣謝去唱注  
今疴恙良已而名錄具存銓部以聞尉察爲擬當慎服官之始勿  
忘絜矩之修謹視寇偷務恤黔細

李從政可秀州嘉興縣尉制

敕某擯者自廷尉史除民曹掾銓資甫入書局造畱會刊定之奏  
篇用追胥而改秩且甄恪效益守廉規

史館孔目官汪宗益可青州壽光縣尉制

敕某經署版曹畱寘史觀肆勤匪怠習事寡尤質選格而已盈稽  
恩比而當補外邊尉察往務勉修

尚書學究及第陳元良可永康軍司法制

敕某爾擯者經明得科齒幼未祿今緇布已冠而舊學尤通可以  
入官使之從政往司三尺之律初有半通之綸善持丹書務遵素

履

蘇澄可權蔡州支使制

敕某朕以震誕在辰賞延均渥惟吾政弼之舊來上公車之章言  
爾早預親聯冀霑朝寵宜自句稽之局權居參畫之筵尚慎聿修  
無忝內舉

黃東可成州同谷縣主簿制

敕某蜀郡學者等鄒魯焉爾經藝淹通喜爲諸生之誦說士矩修  
飾往被大臣之薦延試秩蘭臺授經石室雖仕版有所齒而廩祿  
未及賦乃今州將之重卽吾書殿之望再形論奏益堪取信就補  
句稽之秩勉思教道之方宜本先儒以正後學

孟永寧可新州新興縣主簿充翰林待詔御書院祇候制

敕某恪奉嚴宸頗精楷法籍禁門而惟舊成寶刻而有勞特疏一  
命之榮且獎六書之善益專小學往服茂恩

御前學究及第李奎可河南府澠池縣主簿制

敕某齒未及冠經已中科擯令待年今乃應格成宵雅肄三之志  
服初命半通之綸無忘愛民其益修己

曹宗壽可磁州昭德縣主簿劉復可陳州西華縣主簿制

敕某等本縫掖之家紆使者之紱藝文略涉志局方剛不樂乘輶之馳來求訟牒之補爲除班籍聽入銓流分句簿書之稽尚勉箕裘之習

進納梢草空名助教制

敕某日者河流弛于故道比詔都水議塞決隄爾能輸下捷之材史記下淇園之竹以爲捷原本捷訛捷今改正以助有司之費用補州藩之佐且爲邑里之榮

高永可試助教制

敕某爾嘗以藥石事于宗藩試諸方書頗知倫脊命學庠而試秩去選籍之入流往服榮名益思謹力

在京進納斛斗楚州等第戶房旺可將仕郎守本州助教制

敕某等金布甲令共給邊費至于入粟補吏皆漢法也以爾本編戶之細擅居室之饒能捐我私以佐公上俾崇鄉里之化往服朝

家之恩褒勸在茲祇受無忽

成有宗可河中府司錄參軍監汀州鍾賽金銅場制

敕某比沿銓牒經佩縣章亦既終更適從調集以州綱之列掾莅金治之別司往服爾勞用圖來賞

明法及第廉正臣可陝州靈寶縣主簿段林可霸州司法參軍制  
敕某等本治皋蘇之律或通鄒魯之經對升科榮各在年妙今鈴格既及則官使自宜往句邑簿之稽參司邊掾之任勉思乃職勿替攸箴

張永德可衢州常山縣尉兼主簿制

敕某以籍在行人名參上介虔于秉事號爲寡尤愍其歷紀之勞寵以莅官之命往司尉察勿忘廉規

薛安期可益州司戶制

敕某隸在公府主發詔函執勤累年賞勞有典授以路藩之掾寵茲民版之名用示優恩尚仍舊局

學士院驅使官羅整可梓州司戶參軍依舊供職制  
敕某隸屬嚴局服從煩使在事條而頗習奉頤指而有勞來援舊  
規宜有初籍俾預銓流之補且從禁苑之畱  
新及第進士諸科李育等可幕職州縣官制  
敕新及第進士李育等朕自纂御以來規恢治道右文崇術扶進  
學者育材養器登備時使親加較試多所成就烝然髦士參照內  
外勸導之意可謂至矣爾等竝因詔舉相與計偕有司籍名便坐  
臨試既第其辭等復差以爵秩爾其念進官之始思臨履之難善  
持官箴無忽民事咸自修綜取稱吾恩

文恭集卷十八

文恭集卷十九

外制

皇姪宗懿可端州刺史皇姪宗述可右屯衛大將軍制

敕國家承軒祖之詒謀法陶唐之敦族封爵同姓體貌大宗道在  
維寧恩宜加腆具官某孝恭履德信厚成風具官某性茂溫文體  
資英嶷竝稟玉林之粹悉含銀派之和胥被寵章參居環衛奉朝  
惟恪居邸有聞朕濬百世之遙源謹九宗之屬籍惟時賢亮司我  
本支宜酬營職之勞遞遷冢子之秩特升藩刺對總巖除豈惟旌  
是似之美才益以褒乃親之有德惟欽擢敘勿替踐修

皇姪宗樸可貴州刺史皇姪宗藝可左領衛大將軍制

敕分建宗屏參睦本支環設衛官拱扈宸極號爲要職舉屬茂親  
以爾宗樸迴稟靈華居然信厚以爾宗藝夙成體哲樂善爲猷竝  
茲繇颺之昌咸睦大宗之訓師言是率禮範攸循屬敦敘以崇風  
宜褒嘉而進秩列城遙刺大將超遷且光闔寄之雄兼衛巖除之

重宜懋遵于法度用對越于寵休

皇姪右千牛衛將軍士顥可莊宅副使制

寵  
敕某宗子之良見推才實輟于環衛寘我周行往究汝能毋忝予

皇親男授官可竝副率制

敕某等國家神明之後本枝茂焉爾等蔚爲文孫適在穉齒已勝衣而能拜且就傅之有期會嚴祀之涓成覽大宗之條請宜優初秩仍錫嘉名數從率府之除滋厚宗藩之睦

皇親賜名與官海詞可竝右內率府副率制

敕國家祚出神明之後慶席祖宗之靈蕃育文孫參映皇室朕乘感誕之節孚敦敘之仁澤厚近支體先異姓閱大宗之言上用諸邸之通規昭揚嘉名甫班初命勉勤幼志虔服茂恩

樞密使王某親姪孫廷年給事中參知政事劉某親孫男子雅工部侍郎參知政事劉某親孫男燾竝可守祕校制

敕國家誕辰故事推恩邇列法得任于門子禮特優于政弼以爾等年妙志美體安節和本諸惠訓之深稔于宵雅之肄宜有官簿用寘京司祇我恩章勉于學力

少傅致仕李若谷遺表奏泉州進士薛穎士可試國子四門助教

制

敕某韋布諸生甌閩遠客久託名臣之館近罹東道之喪素行無虧遺章有請用試員于學省且略選于銓臺俾有官稱勿忘士矩太子少傅致仕任布孫拱之可試祕校太子少師致仕任中師姪孫元之可試監簿制

勸  
勅具官某孫某朕因感流樞誕節之慶優安車就第之老賞其世嗣延以朝恩爾等挺生名門滋承忠教服士矩而允若亦地勢之使然宜有官聯以漸時使分從試秩咸用起家尚服初榮益思自勵

兵部尚書陳執中四從姪孫太初可試四門助教制



敕具官某四從姪孫某惟爾從祖任吾大臣曾高以來邱墓在遠若爲疏屬尚夷平人守護有年埽除甚力俞其章請試以學員且奉舊塋匪敘常選

故龍圖閣學士禮部侍郎劉筠從孫景純可守將作監主簿制  
敕具官某孫景純夫修廢功援絕世聖王之高政春秋之美意也以爾從祖筠懿德大雅殊行偉才逮事章聖之朝經爲禁林之老朕初紹宅稔聞納忠朝匠忘身支庶尋隕烝嘗罔寄門戶可哀因命有司推求近屬爾少承緒業親則諸孫禮存出繼之文世載爲後之義俾員大匠用續前人往慎爾修當虔吾詔

故翰林學士彭乘男敏行可太祝景行可奉禮制  
敕具官某男某爾父號爲時德服在禁林遽嗟至哲之萎且表諸孤之貌緒言未泯遺音可傷用推延世之恩式寄適臣之悼爾等稔聞彞學滋被教忠竝因聞禮之餘差進奉常之屬尚圖樹立自致顯揚

故翰林學士彭乘姪婿王寧可試將作監主簿制

敕具官某姪婿某早服縫衣屢干貢部未有仕版尚栖衡門屬予侍臣今者捐館閱其遺札爾則外嫻來祈恩典之延用補匠員之試惟當以藝無用選爲

侍讀學士戶部侍郎王拱辰親兄拱安可試將作監主簿制

敕具官某早列廷臣屢馳使傳屬誕辰之敷澤因仲氏之貢章求實京師願謝班籍方倚股肱之郡用嘉手足之情寵以匠員宜茲門緒往踐官箴之厚益循士矩之良

故翰林侍讀學士葉清臣遺表妻兄進士趙淳可試將作監主簿制

敕具官某妻兄進士某爾紱冕之餘伏膺門業已踰強仕之齒未及進官之門近者失吾名臣弗克柄用時則遺奏爾乃外嫻來求餘渥之延特越常均之比試諸匠屬姑有仕階尚當勉之無忝逝者

禮部侍郎致仕蔣堂姪之器可試祕書省校書郎制

敕具官某姪某惟乃仲父實予名臣鑒知止于道家還時事于宰  
旅寢延酬賞參澤近支以爾業承清門義均愛子被風訓而逾劭  
聞學尚之足佳往試祕邱初有官簿懋勉時術奮取世科以為慶  
闕之光寵不亦美歟

故工部侍郎致仕楊偕親孫景道可守將作監主簿制

敕某孫某惟爾大父若時名臣方授禮經謝去官政如何不淑奄  
至云亡爾惟裔孫朝有恤典宜從匠屬之補用推世賞之延往服  
官箴勿忘風訓

司門郎中致仕樂安國男溫可試祕校郎制

敕具官某男某爾父年老為郎章言還政願回遷授之澤以延嗣  
續之榮爰試秩于祕邱用承顏于子舍勿忘樹立益務勛修

職方員外郎致仕王述男孝叔可試將作監主簿制

敕具官某男某爾父剛于為吏老滯諸郎以疾乞年有章謝事法

得任子意在養親祿可奉于旨甘誼足感于幼艾匠員往試門緒  
勿忘

駕部員外郎致仕陳淨男枚可試將作監主簿制

敕具官某男某爾父老在郎潛表還官政且厚引年之寵用推任  
子之恩試以匠員續其門緒即宜祇命勿替承顏

都官員外郎致仕盧器男洪可試將作監主簿制

敕具官某男某爾父著中臺之籍預外朝之聯來上奏封求還時  
事願回挂冕之澤用為肯構之榮爾滋服義方祇勤孝養往參匠  
屬庸示朝恩且慰家嚴之情勿忘子舍之恪

都官員外郎致仕王琥男駮可試將作監主簿制

敕某男某惟乃之父有著在廷嘗授經于藩房旋倅政于州服以  
疾謝事援比乞恩用試秩于匠員俾承顏于子舍慰茲挂冕勿替  
為箕

虞部員外郎致仕王周男某可試將作監主簿制

敕具官某男某爾父少從官政晚寘郎曹年及杖朝表求解絀願以歸休之渥移爲似續之榮稽用朝彝俾參匠屬往佩起家之寵勿忘肯構之言

虞部員外郎周德延男慶之可試祕書省校書郎制

敕某男某臺郎員外于法未當任子朕愍告老之士著推恩之令使夫養者有祿退者無戚恩用延于似續義足感于耆艾爾父年合禮經秩在虞衡章言公車謝去官政舉用茲典往試祕局當思進宦之難勿忘奉養之恪

故王德基男咸有可閣門通事舍人許持服制

敕具官某男某朕悼師帥之臣殞邊隅之任思究哀榮之典併推似續之恩以爾出自勳門本諸忠教著籍廷臣之次典謁天墀之華邁于閔凶越在哀疚覽遺章之所請懷前人之弗忘特升宣納之名俾進近巖之列聽從終制勿替移忠

河北都轉運使吳鼎臣遺表奏親孫男承規傳規竝可試將作監

### 主簿制

敕具官某孫某等彛選爾祖使漕朔方甫寄劇煩遽嗟奄忽覽觀遺札采錄諸孫用開允于緒言俾鈎稽于匠屬咸思祖服之重往承朝渥之優

夔州路轉運使楊文舉男彥誠可試祕校制

敕具官某男某爾父委之使傳往恤吾民章言公車祈任及子且勤巴徼之遠用延世賞之榮優以校文試于祕省茲爲漸陸勿忘起家

淮南轉運使李仲偃次男孝直可試祕書省校書郎制

敕具官某男某爾父久以清德厚行名稱朝廷方委將漕之煩來援任子之法爾滋承風訓瑩有神華宜試秩于祕邱用起家于名閔勉修遠業祗服茂恩

故寧遠將軍知棣州田彥晏長孫忠俊可溪洞都巡檢故知富州田承亮弟承喜可銀酒監武知富州制

敕某等族依邊徼世奉闕庭能撫種人善靜吾鄙屬大門之殞此  
句有得使部之奏陳寵以憲聯授之勳級當傾輸于忠力以承嗣  
于前人

故麟州兀羅族下班殿侍三班差使羅佑親男崖可本族副都軍

主制

敕具官某男某以爾族居戎落代服忠圖內正聲明遠為保障閱  
守臣之通奏言爾考之淪亡用稽世襲之科俾錫軍幢之號益思  
固圉以美克家

滿濟宜勒噶卜楚男宜木磋沙克宜伊實男吹宜勒沙克宜庸蘇  
男斯結斯清矩嘉奇正男戩巴勒沙克宜揚摩男細斯承續制

滿濟宜勒噶卜楚原文作蒙家叱噶蘇宜木磋原文作兼卒  
沙克宜伊實原文作徐家也結吹宜勒原文作寫甄落沙克宜  
庸蘇原文作施家藥四卒斯結斯清原文作騰彪沙克宜揚摩原文作  
正原文作俱家欺征戩巴勒原文作騰彪沙克宜揚摩原文作  
捨家養依唐古特語改正  
四今並依唐古特語改正

敕具官某惟爾之考奕世居邊內拱朝風外扞吾圉奄從喪逝良

用哀矜閱本帥之奏陳求遺孤之承續即其戎落授以軍酋咸率

忠誠勿隳先志

集賢相宋庠妻淮揚郡夫人胡氏可成國夫人制

敕朕慎調元之任尊置相之儀選諸具瞻用正名于茂宰迹其內  
助復加惠于小君且明朝禮之優實旌壺則之茂某官某妻某氏  
矩儀淑慎族望華映四德之教婉從二物之經參濟嬪風以穆家  
事用修惟乃夫子之賢膺我弼臣之舉義由協濟恩用褒嘉胙而  
成國之封光乃慶門之合采車進飾象服益宜往欽名數之華逾  
奉箴圖之訓

平章事龐籍妻彭城郡夫人劉氏可進封彭國夫人制

敕朕以樞衡大柄屬于耆俊之臣乃用車服殊章旌其賢善之室  
蓋進弼之任重則加惠之典優詳按朝文敷施邦采迹通規而惟  
舊昭惠問而則新具官某妻某氏柔正含風間華表性挺生勳閎  
蹈四德而無違來歸德門經二物而有助彛用哲夫而圖政已自

小君而進名胙之大彭宜是象服適中階之命相惟內壺之配台  
有升庸進秩之褒昭積行累功之致滋峻起家之美進開成國之  
封恩數益華儀品參稱當思名器之旌禮尚勤圖史之詔言往服  
寵靈永孚嘉告

故引進使果州團練使王克忠妻上黨縣君石氏可進封武威郡  
君制

敕具官某妻某氏爾之所天嘗經事朕忽成淪逝良用盡傷愍飾  
之恩既加于密印疏封之渥更及于帷堂以爾族茂華腴德彰韶  
令服攸箴于圖史躬乃職于組紉攸遂靡譏殲良遽及特升榮于  
郡甸慰銜恤于家閔宜誓柏舟用虔綍命

故引進使陵州團練使王克基妻張氏可封清河郡君制

敕朕愍親信之逝有懷若人推封胙之恩用慰其室具官某妻某  
氏挺于冠族躬乃柔儀作合公侯之門昭宣圖史之訓行無攸遂  
痛在未亡追用所天之勞申加益地之典進疏郡甸昭示朝榮彌

敦正淑之規以對褒嘉之命

濟州防禦使張茂實妻劉氏可封彭城郡君制

敕具官某妻某氏出高華之族稟柔婉之風懿範交修憲言祇率  
屬巖下之衛方用乃良而闈內之封宜優異等特疏榮于望郡用  
申寵于名城往祇茂恩益敦淑履

參知政事高若訥姊陳宗古妻可封文安縣君制

敕親有立愛之言澤存及族之義況近司之預政爲同產以祈恩  
義有可嘉朕亦何愛具官某姊某官妻婉靜有儀賢和自飭從所  
天而不違誓已志而未忘覽仲氏之善言敘共姜之守節兼回怙  
祀之渥冀得寵章之封析以縣田胙之湯賦往祇茂澤彌勉柔風  
禮部尚書同中書門下平章事文彥博妹信安軍判官成偉妻可

封永康縣君制

敕本根盛者枝葉茂焉慶既發于名門澤宜覃于勝族以爾具官  
某妹文氏矩儀閒遠思理詳和歸于令人綽有賢範雖榮珠履之

仇未徹粉田之封惟時哲兄任我元宰沿親闈喜愛之志移合宮  
進胙之恩因求綽章願啓湯賦有美謙恭之尚兼圖孝愛之嘉特  
疏縣壤之腴俾獻慈堂之壽併伸前寵式表重榮

張方平女故殿中丞蔡天申妻張氏可封壽昌縣君制

敕某氏爾父德善在躬參貳機柄均勞于外得謝朝廷延賞致恩  
國有舊典爾徽柔莊靜嬪于慶門錫以邑封庸示褒寵思永燕譽  
宜其家人

長安縣君可封仁壽郡君制

長安縣君上脫  
某官某女等字

敕具官某女某氏昔師臣張禹病漢文帝車駕臨問之禹以愛女  
爲言乃知常情之所不免也今吾肱臣所虧墨奏猶溼且有安昌  
之請求益石窳之封矧婉範夙成惠問有淑宜裂多城之壤用增  
湯賦之田欽對茂恩勉循懿矩

定武軍節度使承裕第六女遂寧縣君趙氏可進封長樂郡君制  
敕某氏淑婉有儀嬪于良士同天之慶均逮宗親錫封名城用爲

華寵

磁州防禦使承亮等女可竝封縣君制

敕某等穆有性範秀發天支已茂穠華之風猶疏湯沐之賦經祝  
延之紀節廣惇敘以推仁特啓縣田用招邦族往祇寵數尚勉柔  
儀

防禦使宗旦等新婦可竝封郡縣君制

敕具官某妻某氏朕以震誕之辰因祝延之慶旁均恩施近澤本  
夫以爾族茂蔭華體間性正少服公宮之教居佩女師之篇作合  
宗藩協恭異饋邁樞纏之紀節睦邦族以敦仁用疏郡君列郡  
縣君佳邑之

封式允大宗之請析而湯賦虔我綽恩

左領軍衛將軍克修所生母李氏可封南陽縣太君制  
敕惇敘之愛所以睦宗藩封胙之恩所以厚邦典以爾具官某母  
某氏性爲淑哲族本華腴因乃子之祈恩屬大宗之獻狀特疏望  
縣用錫美名宜虔渥茂之思益蹈謹良之戒

左龍衛軍大將軍饒州刺史承翊親育母霍氏左金吾衛大將軍  
舒州團練使頴國公從謁所生母鄭氏右千牛衛大將軍文州  
刺史宗敏所生母范氏可竝封縣太君制

敕朕以扶厚人倫糾綏邦族爰及祝延之慶宜推天敘之恩以爾  
具官某等所生母法度自將矩儀兼劭挺生宗哲參茂本支適因  
震誕之辰來控疏封之請且將崇孝亦用廣恩特優縣甸之名姑  
徇藩房之美滋敦柔範益服寵章

左監門衛將軍宗翰所生母劉氏可進封縣太君制

敕天下之風莫先于孝門內之治必本于恩某母某氏性婉而和  
德柔且正實生宗子乃領衛屯來祈湯沐之封用順劬勞之報胙  
之名邑錫以命書往欽茂恩益修懿矩

右江溪洞田州知州黃光倩母阿儂可封宣化郡君制

敕某氏爾服于遐荒克有材智料籍丁壯勞勤顯聞錫以命書用  
爲寵勸

皇弟安德軍節度使華原郡王允良乳母王氏可封永壽縣君制  
敕具官某乳母某氏少率姆訓善治禮防于藩邸有保阿之功惟  
朝家敦崇睦之典需章有請舊恩弗忘宜疏湯邑之封姑徇藩王  
之願益圖淑慎進服寵榮

贈鎮江軍節度追封丹陽郡王守節乳母徐氏可封高平縣君制  
敕某乳母某氏朕睦邦族之良愍宗藩之逝延錄保阿之舊申加  
封胙之恩析用縣田進爲湯賦尚慎柔嘉之履往欽褒敘之榮  
貴妃大姑張氏可特授典正制

敕掖廷建職參縮內司宮正有僚分條近職竝圖才淑選侍宸嚴  
貴妃大姑某氏族茂高華德昭婉穆少服大家之訓早聞良袂之  
風入踐祕塗益彰柔範宜升司正之掌滋示寵名之華往服茂恩  
恪思慎履

貴妃第八妹張氏可封清河郡君制

敕具官某第八妹張氏挺生慶門參懿柔矩服憲言而有自謹姆

教以無違通籍掖庭預長安之外戚選名輿地胙列郡之封君往  
欽湯沐之榮益懋柔嘉之德

貴妃乳母周氏可特封長安縣君制

敕某乳母周氏柔謹資性保阿有勤闕椒掖之上言求粉田之錫  
號移別恩而用授明前惠之聿圖胙以縣田爲之湯賦尚勉循于  
懿矩往祗服于茂章

德妃位聽宣夫人張氏韓國夫人位聽宣夫人張氏竝可封掌膳

制

敕某等資承淑茂選侍禁嚴欽柔範以無違躡祕殿而有裕親承  
音旨益慎矩儀用疇年序之勞稍進膳羞之掌茲惟衷渥勿替恪  
恭

魏國大長公主親外孫女錢氏可封壽安縣君制

敕朕惇敘之恩尤尊于外館彙征之吉宜擇于近支以爾某族本  
華腴性資韶令世素傳于帶礪言早服于箴圖屬貴主之爲言乃

賢女之攸出宜疏湯賦用錫縣田往承渥茂之封彌服柔嘉之尚



文集卷二十

外制

蔣堂可禮部侍郎致仕制

敕非達人無以蹈止足之美惟賢者乃能潔去就之分矧言舊德  
適殿中兵援經禮以露誠抗封章而還政且優哲艾用遂晏安具  
官某才粹而文道冲且正體風識而盡遠懷資術而本強進直計  
樞之嚴比歷藩房之重老于政事故吏道之可師式是風華惟名  
教之爲樂績宣中外治盛東南引周任之有言遵祁奚之請老朕  
方希古忠厚惜時耆明稔聞歸志之堅姑從繕性之適閱勞煩事  
就成美名周官亞旅之聯春卿宗伯之貳峻是儀等昭我恩章勉  
爾嗇和以永遐福

王渙可太子賓客致仕制

敕禮者齒尊舊德所以尚賢存道體厚仁俗所以弼化矧吾謝事  
之老夙懷經哲之風前識表微高蹈知止屬茲成饗之慶命以增

秩之甄用獎者明且嘉澹退具官某懿德攸好雅行是躬起王國之烝髦資名門之濟美被服儒術緣飾吏文申翊宗藩曾惠訓之不倦艾服官政固強力之未衰時用欽于老成世方期于策進而能獨拔昏俗褫去華軒率經禮之攸行務名教之爲樂固以昭正素之履聳貪偷之風惟朝廷嘉尚之恩下歲時存問之詔而神明克壯志慮彌沖會熙典之涓成貺茂恩而進序升宮朝之調護適林岫之晏安姑遂松喬之游亦惟綺季之舊往服休命益御太和蔡黃裳可右贊善王積可太子中舍人苗存可大理寺丞劉制可大理評事竝致仕制

敕某等壯年遊宦皓首棲遲豈不爾勞尚困于選以年力之疲曳厭王事之驅馳自陳日侵願謝時使京師進秩朝序升聯竝增軒冕之華且慰邱樊之逸

許上達可太子洗馬謝元振可守國子監丞竝致仕制

敕某等濩落暮年間關常選及此疲薶願從歸休意有嘉其自陳

禮難強其不及聽還所任之政兼圖既往之勞洗馬進聯上庠丞秩且旌沿牒之久足慰挂冠之歸

高牧可太子洗馬徐渥可守祕校竝致仕制

敕某等調集中銓參承列掾或已及皓首或稍厭折腰竝附郡郵願謝曹事有嘉知止用示寵甄儲禁洗馬之榮祕邱抱槩之美式光歸志宜體優恩

劉忠信可太子中舍人致仕制

敕某本治曲臺之經屢更大選之集衰遲已至疲薶自言願解一同之章允從三徑之適嘉其審分寵乃謝歸進朝秩于奉儲致官勞于娛老

李備可太子中舍人致仕制

敕某久從銓唱參預賓籌稍疲管庫之勞且有挂車之請少盡風力老歸邱樊宜錫寵恩以娛晚志擢參儲案進服朝闈足爲里閭之華尚從廩稍之急

艾介石可太子中舍人致仕制

敕某早集選部晚至綱曹自陳年疾之餘不堪官使之劇願從謝事當有推恩特升儲案之華用爲家閤之寵姑從所欲勉務自將楊令望可太子中舍人致仕制

敕某少壯服官衰遲作掾能知經禮之訓願謝紀綱之勞止足可嘉歸休宜寵用賓官坊之秩往爲里閤之榮佚老在茲祇命無忽張隨可太子中舍人致仕制

敕某本階經術之進歷趨選集之勞比至都綱則已皓首乞身有請謝事爲高用遷儲案之華以慰里門之式尚思佚老當體推恩孫可度可太子中舍人致仕制

敕某爾少壯服官久間闕于銓集衰遲仕郡尚黽勉于綱曹居多几案之煩自陳齒髮之邁願還初服且寬至誠

姜湛可太子中舍人致仕制

敕某本由治經早預從政甫備列卿之屬且釐外局之煩引疾自

陳謝事爲請宜從藥石之便難勉筋力之爲寵以儲僚慰其暮齒

尚勤補助當體寬優

韓松可太子中舍人致仕制

敕某爾身爲絳簿籍在銓流已過亥人之年頗嗟離羣之日能自言于州郡求歸老于田園宜進奉儲之華以爲挂冕之寵足榮故閑且慰頽齡

趙維可太子中舍人致仕制

敕某奮由一經困于久宦遠任州綱之劇自陳年老之衰求解所官且還初服能遵經禮宜有朝恩升儲禁之爲僚寵家園之佚老尚勤補助往體寬優

孟朝宗可太子中舍人致仕制

敕某少超選格晚至州綱展公力而弗遺佩官箴而無缺自陳衰齒求謝劇曹審分可嘉歸休足樂宜進承華之秩用爲故閤之榮往服寬優自從頤養

張正可太子中舍人致仕制

敕某治經中科沿牒署令久預銓流之集自陳年力之侵願解縣章求返初服愍輸勞之且久在知止之可嘉宜升案于宮坊俾增榮于家墅

鄭崇德范振竝可太子中舍人致仕制

敕某等進升仕塗淹移銓序或爲列郡之綱紀或寄大邑之弦歌竝迫暮年自陳老病愍驅馳于職事聽頤養于精神寵僚選于承華服朝榮于故閑用光晚節當體優恩

李逢可太子中舍人侯允恭可祕校竝致仕制

敕某等或治經服官或入賞署吏亶無遺力咸有積勤至列郡之紀綱任詞曹之參佐自陳暮齒且白縣痾難強沒階之趨願從挂冕之逸特升僚于東禁用試秩于祕邱以慰歸與且嘉勞止

趙穆可太子中舍人馬宗諒可監丞竝致仕制

敕某等除吏且久秉事亦勞尚滯中銓俱以皓首能量已分自白

齒衰願辭印綬之勞得從井臼之逸聽謝官守仍寵朝榮秩以儲僚丞之學省俾茲燕適往服寬優

蘇維岳王敏竝可太子中舍人李克明可國子監丞竝致仕制

敕某等早集大選參服外勤仕至右曹長于劇邑或引年知止或援疾自陳願歸休于田廬求謝去于州縣咸從今欲併敘往勞秩以奉儲丞于太學慰茲遲暮便乃養頤

韋陟可祕書丞致仕加上輕車都尉制

敕某朕臯者拜貺于郊覃渥在位爾時謝事法當推恩渙號早行餘澤未究宜遷勳級用信教條就虔吾恩且慰而志

呂佐可衛尉寺丞致仕制

敕某粵從版授真句簿稽以侵西夕之年頗歎東隅之失願還官事歸老家園特優列寺之丞且慰挂車之意

楊贄可衛尉寺丞致仕制

敕某補吏以訾上言稱疾求謝遠方之牒願挂下澤之車用遷衛

府之丞俾就家庭之佚聽而輔養體我寬優  
孟元亨可大理寺丞致仕制

敕某早趨選集晚滯句稽自陳衰老之侵且有乞身之請嘉其知  
止寵乃歸休用升廷尉之平以慰南岡之步

皇甫采可大理寺丞致仕制

敕某早集銓流晚爲郡掾不憚斗筲之役頗用篋篋之修自白暮  
年願返初服宜承棘路之授且寵華門之歸當服寬優往從怡適

吳旦可國子監丞致仕制

敕某爾早集都銓纔至諸掾揣蕭然之衰幹識知止之大方乞骸  
以歸稅駕良善宜寵上庠之秩以爲舊社之榮

鄭有斐可國子監丞致仕制

敕某早從調集晚滯句稽自陳齒髮之衰願謝簿書之役服勞有  
自知止足嘉用丞庠學之榮俾遂邱樊之適尚續以廩勉修于家  
張太一可國子監丞致仕制

敕某少壯從宦遲暮倦游來辭下澤之勞願從初服之逸進丞學  
省參列京司俾藥石之善持聽邱樊之自便往究餘齒當體至恩  
石待問可太常博士致仕制

敕某早以敏文階于俊選中嬰廢免再用敘收遂班文石之朝已  
迫虞淵之景進趨良苦疲薶可矜以其早會先朝嘗承大對特升  
司蒞之局用光挂冕之歸往服優恩以究餘齒

趙眞卿可大理評事致仕制

敕某嘗任句稽之員坐受雇更之人自罹廢免尋命敘收掾于嶠  
南辭以親老來謝官使願從家居尚矜造士之餘特寵法卿之屬  
勿忘奉養當體寬優

翁夔可和州司馬致仕制

敕某早入銓流適隨掾牒附郵引疾謝事乞身聽解綱曹卽授上  
佐仍優廩給當識臺恩

吳高可撫州長史致仕制

救某少隸牙門晚有班籍以年力之疲曳愍王事之驅馳卽其本邦授以上介俾從安逸當體寬優

穆介可華州長史致仕制

救某早直祕寢之聯嘗贊禁閣之謁中因罷黜尋復甄收自陳年力之衰願謝斗筭之役特優上介當體寬恩

李仲連可左清道副率致仕制

救某前朝近支南國餘胄早有庭臣之籍比乘使者之輶煩局所更敏用無滯自陳年疾之耆願辭時使之勞副東京二華之聯參屬官四品之列嘉其知止慰乃養痾尚體寬優勿忘輔助

張保和可右清道率府副率致仕制

救某名存班籍年合禮經能省己以自陳願乞身而待盡嘉其知止率以副員尚爲逸老之榮往欽從欲之惠

姚可久可左監門衛大將軍致仕制

救某執技以進歷稔且長嘗首太醫造正諸使比閱奏封之上自

陳年力之侵願謝見官良合古誼俾升環衛之列仍假折衝之名當體寬恩以從佚老

宋榮可左屯衛大將軍致仕制

救某早縻勇爵嘗當軍鋒奮士戶之積勞用邊關之勤略寘諸環衛秩以折衝自陳年力之衰不任軍旅之役願謝時使得從家居閔煩宿衛之勞聽遂燕申之適益升屯衛當體寬優

錢子穆可左監衛將軍致仕制

救某服在內聯綰于外務蕭然疲役迫是暮年因郡邸以爲言求家園之佚老聽還時事尚寵衛屯往服寬優自勤納養

耿從政可左領軍衛將軍分司南京致仕制

救某領使親宅典戎近藩早稱幹能比更委使閱奏封之來上陳老疾之侵衰願解兵防乞分畱務愍年力之少盡勉醫藥以自持進升環尹之名關領別京之衛仍俞子舍之請就卽縣齋之安當體至恩以究遐福

陳允恭可左監門衛將軍致仕制

敕某中預禁聯外監屯旅當番禹之卑溼苦毒霧之薰蒸重臍成痾步趨難力表解近墀之職言求環衛之名願尋疾醫且謝時事竝俞所請勉務自持

柴貽憲可左驍衛將軍致仕制

敕某世承累組之華朝賴敏材之用籍使聯之舊早服禁嚴司邦憲之平屢當審克頗著平反之效稔聞幹裕之聲衰疾自陳歸休爲請特優環衛之秩用適燕居之宜尚體曲恩往怡晚節

劉吉可右領軍衛將軍致仕制

敕某少壯驅馳晚暮疲曳尚有最凡之目未經甄陟之科自陳齒衰求謝官使有嘉知止爲敘前勤優升拱衛之名寬賜燕申之適悉從爾欲尚服茲榮往遂嘉貞益頤眉嘏

文恭集卷二十

文恭集卷二十一

外制

皇姪宗鼎可贈邠州觀察使追封新平王制

敕凋落近支感深于邦族追加愍策恩究于國章某信厚存誠溫恭表質克稟燕詒之慶有光敦敘之風鳴玉奉朝剖符領郡顧年塗之未艾在志力之允嘉遽感疾以歸全爲廢朝而興歎特禋觀風之印仍班析壤之圭用昭追遠之懷茲示飾終之典庶幾營魄尚識寵靈

故太子太師致仕任中師可贈太子太傅制

敕義重股肱之虧禮尊冕服之禋務崇恩厚取究哀榮矧聞政之舊臣早秉鈞以陪朕乞身未幾復魄可嗟追懷鵠髮之良宜厚密章之飭具官某體行明潔志慮忠純有秉彝經哲之風兼砥節首公之操圖其宿望屢煩方面之行資厥老謀嘗預幾庭之訪比均勞典還守本邦曾是壯猷直無遺力來謝時事閱煩老成俾參綺

季之游姑遂松喬之適遽聞薨落良用盡嗟瞻舊人之弗忘挹餘  
芬之未泯追加宮傅之秩增慰壙宵之靈恩禮若茲營魂尚識  
故四方館使新州刺史王克忠可贈引進使遙郡團練使制  
敕禁近之臣嘗經于委使哀終之典當厚于追襲以爾具官某階  
胄緒之華兼器幹之敏歷更煩局洊聘殊疆虔使指以無違奉官  
箴而有恪晦明生疾奄忽收神短曆可嗟愍章宜及進升使範參  
領軍團庶榮厚窆之遊尚識治朝之渥  
故洛苑使任承亮可贈正任團練使制  
敕具官某褻恤信臣匪常于邦典追旌死孝用篤于人倫以爾行  
義修明材謀敏劭入祗禁奧履謹畏而寡尤外治劇煩資恪勤而  
能力侍承親疾踰歷旬時藥必務于先嘗目曾無于交睫因封其  
腹遂隕厥躬可謂殺身成仁舍生取義在竭誠之足感何與善之  
可疑特厚卹章用嘉純孝褻進戎團之秩申寵壙宵之遊庶幾營  
魂尚識恩禮

故文思使遂州觀察使史崇信可贈振武軍節度制

敕親倚之臣忽嗟于殲落追襲之典用究于哀榮具官某材則敏  
通性惟謹質給左右之事能寡于悔尤服內外之勞克宣于忠力  
方任能于宿衛俄邁疾于晦明奄至淪亡良深悲慨追用節旌之  
寵申加印綬之榮在恩禮而有殊尚營魂之無忽

故莊宅使李希及可贈眉州防禦使制

敕崇讓之風以損己爲美愍飾之法用襲先曰榮具官某性蹈謹  
孚行稱篤實嘗歷近嚴之侍屢更煩使之勞享數弗融殲良已久  
生有慶靈之積蔚鍾似續之良纘考以忠在朕之右請回遷秩之  
典求贈乃親之官美志可嘉恤章奚愛追升軍禦之重集增使範  
之榮尚歆予恩往告而第

李懷贊可贈防禦使制

敕奉使宣勤旣疑于前績念勞甄往宜賁于厚恩具官某性本謹  
良材惟幹裕任乃居于親信行則寡于過尤邁疾晦明收神冥漠



適予心之軫愴覽而儷之控陳進飭臺恩追崇使範惟稟靈之匪  
泯尚禦侮之歆榮

贈虢州刺史种世衡可贈成州團練使制

敕朕紀疆臣之勞愍戎翰之逝載加賁典用洽至恩具官某深沈  
有謀勁幹能力屢奉典戎之寄頗著憂邊之勤館舍早捐鼓鼙增  
愴已伸刺部之贈益峻團兵之名魂而有靈歆我茲渥

宋昱可贈供備庫使制

敕某曷以廷臣委之縣道會五溪之雜種掠數雉之孤城能率官  
軍出支賊黨不幸遇害遂隕厥躬有嘉死事之忠已舉錄孤之典  
曲加贈禮擢正使聯恩足慰于壙宵義亦矜于孝嗣營魂有識名  
秩是歆

故供備庫副使李隨可贈供備庫使制

敕某素推溫謹早侍禁嚴出護外兵甫還南服屬嬰無妄之疾遽  
興不淑之嗟有懷恪恭載深傷盡特推卹典用正使聯歆我漏泉

之恩慰而游岱之魄

鄧惟素可贈供備庫使制

敕某恩以恤往者愛之殊仁不遺舊者厚之至以爾夙將謹力逮  
事儲坊奉頤旨而必恭慎言樞而寡悔援乃纂圖之慶比參侍幄  
之華尋遷隸于外庭俾亞承于諸使勤庸有積命秩未優遽聞喪  
逝之音良軫盡傷之意特正名于使範用紀績于銘旌尚識納言  
往歆漏澤

貴如母夫人曹氏曾祖旭可贈祕書丞祖靖可贈祠部員外郎制

敕崇戚苑之賢已胙封于成國襲祖服之美益寵賁于慶閱具官  
某履素蹈和含章用晦早怡情于邱壑弗嬰志于軒裳善既積于  
家庭慶乃滋于宮掖推本源流之出恭延恩施之隆追建禮之禋

曹疏祕邱之丞秩用示壙宵之寵尚歆朝綍之榮

皇后姪女壻故西染院使劉永清可贈諸司使遙郡刺史制

敕某夫葛藟之蔭旣原于本宗則葭葦之親宜延于異數以爾材

資通敏性尚簡溫介諸使而有聲幹乃局而能力遠圖未究壯齒  
奄零覽長秋之上言乃中宮之外屬宜優喪恤用厚常均持正直  
于內聯復兼榮于列郡庸示漏泉之澤尚慰墳冢之魂  
故貴儀曹氏可追封賢妃制

敕存著盛闕沒有令名念賢善之早淪寢逾年祀顧褒榮之須稱  
益峻品儀以爾故貴儀曹氏參服憲言交修懿矩選自元功之後  
嬪于禁掖之中逮事先朝早從後掖收神惟寂緬太素之何歸畱  
範彌芳藹祕庭而未已申修茂典追寵列妃用昭恩禮之殊且旌  
才德之茂惟淑靈之未泯尚名號之是歆

宜州刺史宗實故所生母任氏可追封縣君制

敕朕厚人倫之風篤戚藩之愛飾終有典教孝爲宜具官某故所  
生母任氏蹈履柔風誕育宗子曾享年之弗永何先露之易零大  
宗以聞近支有請宜疏名邑之贈以慰寒泉之思沒而尚靈歆我  
朝寵

德妃姪亡妻張氏可特追封郡君制

敕某妻張氏誕生慶闕蹈履柔風早歸舊德之門嘗疏名邑之賦  
稔彰淑哲驟委韶華託屬列妃實有葭葦之戚祈榮望郡用開湯  
沐之封式示愍章且旌婉範庶幾近魄祇服追恩

觀文殿學士尚書右僕射賈昌朝曾祖緯贈太傅可贈太師制  
敕人乃本于祖郊以饗天帝故朕齋明肅儉徧禘世室淳濯祇慄  
親祠泰壇福旣降而孔皆澤罔幽而弗暨矧吾宰路之舊宜伸祖  
服之褒某首冠民宗才經王體文采表于來世名聲動于前朝蓋  
源深者流長而德盛者慶遠臧孫之善乃有後昆考父之恭是開  
達者惟燕詒之醴德挺端右之令孫光輔本朝早追崇于前傳會  
成熙事用進陟于維師寵乃曾門優我時德宜肅將于鬯酒往祇  
告于文人

觀文殿學士尚書右僕射賈昌朝曾祖母魯國太夫人栗氏可追  
封燕國太夫人制

敕王假有廟能享親以厚先禮行于郊大報天而尊本極幽明之  
際充覆燾之間竝貺美祥畢覃惠澤矧惟舊德懷乃先慈宜更大  
國之封以爲曾廟之寵某氏出高華之胄歸盛德之門居穆言容  
動循法度服共儉之訓中饋是虔垂賢善之風後昆以大時予舊  
宰惟爾令孫材居國棟之隆慶表里門之盛是宜象服遂荒大東  
會成報本之儀益進追先之典采蔡之詠早契召南析木之津抑  
惟燕舊申昭異數尚賁淑靈

觀文殿學士尚書右僕射賈昌朝曾祖母崔氏可追封秦國太夫

人制

敕郊以報其本故高燎用升恩以究于下雖重泉無漏所以承天  
地之竝貺昭人祇之普施矧吾舊德之宰有懷曾妣之慈宜厚飾  
恩用追來孝某氏挺生名閎作配宗公循召南之國風能承先祭  
佐夫人之家事罔間內言貴範畱芳後昆滋慶令孫嗣服曩時相  
予嘗稽舊典之文已進小君之號屬成熙事益舉顯章介于山東

齊爲成國之大胙夫關內秦蓋故都之雄尚歆加地之恩彌篤高  
閎之祐

觀文殿學士尚書右僕射賈昌朝祖璉贈太師可特贈中書令制  
敕昭孝息民禮莫大于郊廟保姓受氏德必本于宗祧熙事適成  
愷澤均被惟中臺端右之重資大門慶善之餘用峻朝榮聿崇人  
本某深中直質強學敏文早彰秉德之彝弗更爲善之度行高前  
世惜人爵之未充慶在後昆果棟臣之間出謨謀三事儀長百僚  
曷用纘祖之文已寵維師之位屬成大報會汎茂恩申納內史之  
書進崇右相之秩鳳池益貴鱣序增華尚歆告第之恩足慰佳城  
之魄

觀文殿學士尚書右僕射賈昌朝祖母胡氏可追封魏國太夫人

制

敕朕飭齋輅祇見于清廟備法物肆類于后土德產之致精意以  
享尊大道配嚴祖所以明事上之禮教天下之孝旣翕受元祉則

敷施惠澤不獨專卿厥美亦使褒優其先況我大臣敢格舊典某氏出高華之胄歸名勝之門躬四德之賢少服從于姆教經二物之善早輔佐于君子遺風尚穆來裔寢昌燕翼有孫元者在望歸正名于巖弼已錫號于參墟澤既漏泉禮宜加地晉之始賞魏則大名參稽于朝進胙而國益峻褒封之典尚祗渥茂之恩

書令制

敕朕裸于禰室明發有思郊于泰壇升侑如在惟天人相與之盛有臣工協贊之美言念乃考豈不爾懷矧吾揆路之賢早承家廟之祀宜褒先正用峻追章具官某學洞本元行中儀表早振端朝之譽蔚懷表世之文藏用弗伸早鬱王官之次乃終有耀挺生時棟之材冠別殿之儀形席文昌之端右朕所體貌爾有慶靈爰當圖任之辰已峻褒封之典錫之右相崇以維師屬郊報之修成在國章之洽舉益進中臺之令申賁壙宵之遊彌表顯于家闕尚欽

祗于朝寵

集賢相宋庠曾祖駢皇贈太傅可贈太師制

敕朕攷慎才傑緝熙政謀得詩雅巖巖之瞻屬以時柄用春秋尊尊之誼褒厥曾門所以崇立輔之儀厚追遠之典具官某曾祖某履和含正厚德秉彝服展季之小官恬弗以怪韞次公之遠業鬱未及伸慶乃垂于後昆時則生于上哲屏藩左右馮賴謨謀歸總幾庭已峻褒先之典今升宰路益疏進等之恩賁寵維師增榮私廟往修一卣之告尚歆八命之章

集賢相宋庠曾祖母王氏可追封齊國太夫人曾祖母丁氏可追

封魏國太夫人制

敕夫孝必務于本禮不忘其先朕選棟材之隆任以台宰圖曾世之懿峻厥儀品雖褒賢之禮優亦本祖之義著具官某曾祖母某氏賢明異稟法訓躬行修祭職于采蘋承其先祖泣報囚于丹筆裕乃後昆時惟哲孫都我茂宰前陪樞幄之論追用密章之褒名

爵既新湯沐宜鉅進胙東齊之壤升優全魏之名滋寵營魂尚識  
恩禮

集賢相宋庠祖曜累贈太師可特贈中書令制

敕朕選有德相大政惟是名數之重進都巖廊則宜爵命之加併  
崇祖廟示慶源之所本亦褒典之攸先具官某祖某蹈道淳深詒  
謀清白浚都之賢好善世則有聞太邱之德可師位曾未達遺恩  
在物畱慶鍾孫挺生時棟之材進膺袞路之拜用乂于我實惟爾  
先邁種之美所滋裕後之祥乃茂昔樞柄之云總已賁維師今鼎  
席之是居益兼右相褒榮偕峻慶靈弗誣歆此納書保爾顯闕

集賢相宋庠祖母賈氏可特追封楚國太夫人制

敕亮天工者政之先尊人本者義之率惟國爵之重彌大于孫謀  
則家廟之榮益延于祖配所以厚民風而昭國體也以爾具官某  
祖母某氏賢有至行穆著柔風作合名門盡虔共中饋之美交修  
善道得輔佐君子之宜覆育垂慈燕詒著慶惟孫經哲若時奮庸

進增湯賦之名升薦密章之刻句吳已寵全楚用荒尚歆告第之  
榮益右充間之美

集賢相宋庠父玘累贈中書令兼尚書令追封榮國公可進封鄭

國公制

敕相王室者德之盛尊考廟者孝之隆惟慶源之深長則靈氣之  
回復時乃豕嗣柄吾大鈞屬當贊策之辰爰舉納書之典恩禮須  
究名數乃宜具官某父某位不配才性惟合道誠心恕物仁何止  
于放麝陰德在民慶乃昌于納駟挺生良器用乂本朝曷總率于  
繁機已進褻于先烈三師升冠二令兼榮今膺拜于文昌益進疏  
于大國遂荒原武寔曰陪京彌昭爵命之崇滋厚烝彝之薦尚歆  
禰室益右慶門

集賢相宋庠母王氏可追封越國太夫人母高氏可追封漢國太  
夫人母王氏可追封秦國太夫人母朱氏可追封燕國太夫人  
制

文身二十一  
敕巖路延登有國繫其弼亮親廟崇飾故事著于追襲誼惟繼嫡  
之均時乃寵靈之洽具官某母某氏柔明著範淑哲含風以門閥  
之華來嬪盛德因圖史之訓居法憲言存著善猷沒章遺懿右乃  
哲嗣踐于中階妥當枚卜之初彌積先慈之感愍章前峻昨典益  
加攷按輿地之圖進崇大國之號用昭慶善胥示恩榮庶幾原宥  
之靈尚識治朝之渥  
集賢相宋庠母鍾氏可追封晉國太夫人制  
敕任天下之重國以賢爲本稽內治之則母以子而貴況存著慈  
範而挺生傑才時則相予慶緣裕後宜舉追襲之典用旌賢善之  
風具官某母某氏出高華之門蹈柔嘉之則來儀名閥承訓大家  
間于兩社之占實生哲輔徙乃三鄰之學遂躋大儒屬當肇位之  
升倬冠烝髦之首粵從樞筦入正台階載崇陪幄之聯彌動累茵  
之感褒章前峻淑德益宜進胙參墟之封增昭親廟之懿厥靈不  
泯茲渥是歆

吏部侍郎同中書門下平章事文彥博曾祖崇遠贈太保可贈太  
傅制

敕朕崇饗九房昭孝萬寓馨香格于上下德罔弗歆恩施浹于幽  
明仁斯爲盛乃睠同寅之輔裁成右饗之儀申飭愍章褒崇曾世  
具官某素風傳世美德在躬行固重于本邦位不配于高行前言  
多識被河汾舊學之資惠政所孚畱蒲宓字人之愛實啓貽孫之  
慶孚膺上相之求自甫正于中階已迨甄于上袞熙成有典覃施  
及先益尊帝傅之名用厚台臣之數慶餘所復歆告其承

太夫人制

敕朕以孝饗熙成靈恩均被禮柄臣之重既孚號于大庭尊曾妣  
之慈復納書于私廟具官某曾祖母某氏柔儀異稟淑德少成本  
育粹于名宗早來儀于慶閔躬采繫之法度先祭是承茂來葉之  
燕詒後昆以裕令孫挺出上宰冠居勳膺枚卜之求已攷胙封之

典逮茲均施益用追先侔來輿地之圖優封大國之號采章兼飭名數載加尚淑魄之有知歆愍章之既渥

吏部侍郎同中書門下平章事文彥博祖母銳贈太傅可贈太師制  
敕朕宗祀五室合祚三神廣烝烝之風參侑于祖考推尊尊之誼施及于臣鄰用加惠于大門示本恩于上相具官某祖某循持雅行惠迪善猷自州壤以推風絲家庭之儲祉孫謀詒厥資狐突善教之忠達者興焉賴考父滋恭之德若時茂宰惟乃哲孫早序正于台聯嘗追崇于保訓禮成宮廟慶洽天人益峻三師之名用厚九原之飾惟慶靈之回復尚營魄之歆承

夫人制

敕朕追正郊宮之饗涓成陽館之祠秩上下以承神通幽明而宣澤發于膚寸漏及重泉矧吾邦宰之賢有懷祖廟之配曩慈所裕愍飾宜加具官某祖母某氏淑哲成風賢明可範服箴圖而無斃

循法度而弗違作合令門穆嬪風而彌婉詒謀後世階慈訓以寢昌時惟令孫持我魁柄自發揚庭之號已施飾壤之封賁象服之遺榮申密章之時告屬茲成饗之慶永言來孝之追覆按典圖進荒土宇增衍采章之等究宜恩數之榮燭于壙宵歆我朝範

夫人制

敕祀者國之大事孝者人之至德明發齋栗崇嚴配于合宮滲漉涵濡漏愍恩于幽交睠言巖宰之重有懷王妣之慈稽若舊章敷于異姓具官某祖母某氏族惟甲冠德本柔嘉啓遇觀之祥占歸于夫子積詒孫之善行裕我弼臣比膺注意之求已飾追先之範逮茲宗祀覃及慶靈益進胙于土田用申昭于家廟飾之象服正以采繫惟營識之未淪尚采章之歆受

吏部侍郎同中書門下平章事文彥博父洎贈太師可贈中書令制

文集三十一  
九  
敕德之醲者榮裕于來裔孝之大者光昭于前人朕卜季商緒正  
宗祀哀對六天之大升侑三后之尊孰相邦儀時我巖彌輔成世  
宗之享厥有茂勳申慰考服之恩宜覃殊典具官某父某體仁居  
厚尚德秉彝惠和濟賢者之風敏達擅吏師之望壯猷早謝惜高  
位之弗躋陰德所覃宜後昆之滋大蔚興世嗣光輔朕躬命爰立  
于巖廊敕追甄于禰室拜以三師之袞刻諸八命之章屬茲祀之  
均休厚愍恩之追遠益進鳳池之貴秩用昭鱣序之慶靈尚歆右  
相之榮當識上台之渥

吏部侍郎同中書門下平章事文彥博嫡母耿氏可追封秦國太

夫人制

敕朕將饗合官先格太室既虔鬱鬯之裸還奉蒼璧之祠妥侑尊  
嚴用度人倫之孝協共顯相則繫邦宰之忠永言顧復之恩宜厚  
追褒之典具官某母某氏高華著族柔正含章賢德式于六媼嬪  
風經于二物輔佐君子尊四教之善言誕育名臣被三遷之慈訓

芳猷早闕懿範彌昭慶在身支任居肱輔惟亮工之攸賴本諸祉  
之所滋爰當正袞之辰尤動累茵之感追賁采繫之號進加析壤  
之封時享輔修孝思增積稽若朝範刻用密章昨茲土宇之美名  
賁乃笄珈之盛飾惟淑靈之匪昧尚華渥之是承

參知政事高若訥曾祖諭贈太子太保可贈太保制

敕國家優于用賢篤在教孝故二府登仕既馮賴于猷爲而三世  
追褒必究極于恩禮所尊人本之重宜厚國政之咨具官某曾祖  
某節峻邱園風行州壤眷懷賢業道不濟于當年詒燕善謀慶則  
蕃于來世繼乃祖服時惟孝孫選自內樞參我中鉉曷以東宮之  
二品舉用追章今以天子之三師升加愍冊且明有德之後式表  
褒賢之先尚而靈承虔我賁寵

樞密使高若訥曾祖諭贈太傅可贈太師制

敕國家置使典樞本兵總務重茲時柄之委厚其曾世之襲抑乃  
舊章斯謂殊典具官某曾祖某仁爲己任德秉民彝膺仕爽于生



前餘慶滋于身後令孫載誕近弼是登實資陪幄之謀用翊包戈之治載稽往策已賁上公益先本祖之圖彌進維師之重密章以刻鬱鬯是承庶幾私廟之靈尚識治朝之渥

參知政事高若訥曾祖母王氏可追封祁國太夫人制

救朕圖政軸之貳錄曾世之慈既進律而熙朝卽納書而告第所以推迹先懿歸厚時風具官某曾祖母某氏柔範夙成善猷祇率族則衣冠之舊言惟圖史之箴正宗事而聿修垂孫謀而云遠挺生良翰滋大慶閔粵從基命之司預聞本政之議褒先有典益疏湯沐之封裕後顯仁彌表燕詒之盛幽靈固在愍飾其承

樞密使高若訥曾祖母冀國太夫人王氏可追封晉國太夫人制  
救國家法樞置弼陪幄議兵策既告于大庭恩卽覃于私廟進褒曾配抑著朝彝具官某曾祖母某氏特稟柔風休有懿範詒孫謀而益遠流世德而逾醲祥發本支任隆基宥先胙封于郡望已加號于小君爰當班命之辰益舉納書之典按圖輿地拓土大邦升

恩數以兼常昭慶靈之滋厚往歆褒典尚識茂恩

參知政事高若訥祖審釗贈太子太傅可贈太傅制

救義率下而重禮治上而尊章德表賢既參聯于宰路本仁厚俗必追寵于大門具官某祖某文武自將智略寡二功名爲任嘗慷慨以忘家力命難忱終咨嗟于抱器雖貴塗則爽而慶閱以興字果驗于升卿器有踰于安國俾若予采入預政聞時惟任能禮有異數益進上公之秩用纘乃祖之戎冀而神靈祇我印綬

樞密使高若訥祖審釗贈太師可特贈中書令制

救國家經武須賢纘戎在孝繇幾庭而進輔必祖廟以伸褒所以旌哲表庸尊先重本著茲臺範厚厥朝風具官某祖某力行體仁時中合道恕心是廣曾醜夷之弗爭陰德所覃宜昆雲之有裕惟孫抱器若時登樞探觀告第之章前用維師之袞益兼榮于浴鳳仍賁采于附蟬以明達者之興且驗升卿之效惟光靈之所屬尚營識之是歆

參知政事高若訥祖母追封扶風郡太夫人馬氏可追封澶國太夫人制

敕厚民在孝濟政須才選賢以乂于王家褒功迺及于私廟朝有著典我惟儀圖具官某祖母某氏柔靖自將賢和無遂展如姆教之率穆然嬪則之修慈範早淪緒風彌劭惟令孫之忠力預近府之政謀參樞柄之云初稽納書之惟舊衍增湯賦之數追褒翟芾之儀神而有靈詔其無忽

樞密使高若訥祖母衛國太夫人馬氏可追封魏國太夫人制  
敕義乃率于祖仁必厚其先乃矚樞臣之良有懷王妣之懿申加禮命洽被恩章具官某祖母某氏生德業之門著柔嘉之範共儉以承于先祭休昌乃集于後昆時維令孫弼我煩務納忠先哲方馮賴于高謨追遠飾終益褒崇于愍冊湖服章之盛節拓土宇之優封昨以近邦隆茲異數章慶源之濬發明慈覆之遠垂未泯淑靈尚歆榮渥

參知政事高若訥父懷謹贈太子太師可贈太師制

敕朝家任賢倚重在于聞政臣子能仕推本絲于教忠矧自幾廷入聯宰路宜疇陟命益峻褒恩具官某父某仁厚存誠才明韞用世服義方之訓家承孝謹之風不偶數奇鬱胷中之素蓄自他有耀集身後之遺榮是似克家思皇生國方均參柄之重宜從飾禮之優追尊上公申賁英袞尚虔師保之寵往歆印綬之崇

樞密使高若訥父懷謹贈太師中書令可贈兼尚書令制

敕教之忠者子能仕德之盛者宗必興眷我名臣付畀樞柄參攷前人之力用褒爾室之榮具官某父某稟自誠明樂于名教含章抱璞惜大任之弗躋儲慶爲基宜高門之有閔誕生哲嗣用乂本朝曷參宰路之聯已厚壙宵之賁上公極寵右相兼榮今進翊于萬樞益申褒于二令顯臧孫之有後庶李公之弗亡式將印綬之華往修圭瓚之告先于而廟永右厥家

參知政事高若訥母追封河南郡太夫人閻氏可追封鄆國太夫

敕夫名顯而滋重則禮從而益隆若乃絲上大夫而典樞升小司空而謀政爵祿彌厚于己茵鼎不逮其親故宜按輿地之圖書內史之策進疏國壤申寵壙宵具官某母某氏賢善自持柔明有助謹召南之共祭穆是嬪儀喜京兆之平反仁于母道克家有子舉國曰賢已試本兵之司復參制政之府往嘗追于封胙令增賁于號榮顯爾誕哲之祥伸我任能之禮淑靈匪昧華寵當祇樞密使高若訥母雍國太夫人閻氏可追封秦國太夫人制敕國家尊樞弼重兵柄登進髦哲已孚號于治庭推本孝慈卽班恩于親廟矧惟妣德宜厚密章具官某母某氏仁淑有儀賢和居正從召南之百兩作合名門卜孟氏之三鄰勛成大器陟岷之哀遄邁累茵之感彌深自巖坐之參升已陰堂之追飾錫土山于成國賁車服于小君屬進總于繁機爰申加于愍冊紹開廣宇改胙大邦具慰寒泉之思用示蓼莪之報庶幾營魄尚識寵榮

右諫議大夫充天章閣待制兼侍讀張揆弟京東轉運使兵部員外郎集賢校理挾父蘊尚書司封郎中可特贈光祿卿制

敕朕肅若舊典祠于明堂配侑盡誠永懷三后之烈褒榮追禮覃及百工之親矧吾從臣兼相儀蒞瞻言考服宜厚恤章具官某宅性惠和德基憑厚位不配于高行慶乃裕于後昆挺生似續之良馳稱競爽之美敷經便閣膺選才林能仕本于教忠善繼彰于錫類愍恩所飾故事當優增賁列卿之名昭示治朝之法幽冥匪昧滲澤其承

文恭集卷二十一

文恭集卷二十二

內制

皇兄允弼特授依前檢校尚書右僕射充寧國軍節度使同中書門下平章事北海郡王加食邑一千戶實封三百戶仍賜推誠保順亮節守正翊戴功臣制

門下稽若先王制茲大禘謂四時之常祭未極孝思約一閨之小成誕爲精享朕詳按舊禮攷卜孟冬駕言屬車登享祖廟行朝踐之禮歌長發之章惟時親賢預我祠祀盡肅雍之美同懷愴之懷亦旣解嚴宜有褒賞用敷渥典式告大廷具官允弼地則茂親時惟明德繫二南之化躬兩漢之風表儀王家有嚴重之質導訓宗子得祗穆之和兼徽台司開賦王社宿邸彌謹奉朝滋恭而自先甲肇禋申嚴始事率郇滕之諸國逮魯衛之密親侍齋幄之深從昭鑾之近太室戾止廣樂繹如奉亞裸之升極其恭志正赤舄之履亶無流心祖宗格思祝嘏告止歆乃孝享賜朕祥釐臠肉是頒

用先兄弟之愛勞酒斯舉以澤公侯之勤優衍采田益疇真食仍  
加功號之美竝昭名數之華國典攸宜家情允洽於戲同寅恤祀  
既獲無疆之休夾輔慎徽益保有終之吉往欽厥命永孚于休  
除皇弟允初特授特進依前檢校尚書右僕射使持節耀州諸軍  
事行耀州刺史兼御史大夫充感德軍節度使耀州管內觀察  
處置等使加食邑七百戶仍賜推誠保順翊戴功臣制

門下百世必祀德厚者流光三歲乃祫文繁則禮縟朕訓四海之  
孝合七世之靈因時永懷備物親享祲容粲若寶鎮在焉來九服  
之朝用六代之樂于時藩岳伯舅二三弟兄助祭在茲侍祠有恪  
嘉饗云究慶賜遂行具官允初體韻詳和性質淳固本賢王之後  
資聖源之先遙制侯藩委高身之重畱宿京邸奉介圭之朝能慕  
善猷綽有淑問自祖宗之講祀由奉常以肆儀結佩入齋展軫從  
蹕清廟在望極駿奔之恭朱芾侍祠有肅雍之美朕以皇祖右饗  
大嘏告茲熙事備成景福來格還衡肆眚進律疇庸乃眷戚藩益

開土宇仍進表功之號更升躡等之階恩禮之隆固先于異姓名  
數之懋滋表于展親於戲承積累之祥膺節制之重齋祠參奉靈  
寵洵加益慎爾猷往服朕命

除皇弟允良特授特進依前檢校司空同中書門下平章事使持  
節鄭州諸軍事行鄭州刺史華原郡王充奉寧軍節度使鄭州  
管內觀察處置河隄等使加食邑一千戶仍賜功臣制

門下朕沿康復之慶薦昭報之誠合祀乾祇大陳牲玉先期祓乎  
路寢申詔約乎郊丘禮文昭明儀體簡大既執量幣獲侑祖宗之  
靈復因祭膳以親兄弟之國蓋合揚于貺施用均布于福釐矧堯  
之變時雍始于敦族而周之厚民德由厥睦親式是仁恩揚茲慶  
號具官允良資質淑茂體行端莊令問夙昭善猷允履戚藩云建  
使節是持按圖啓封載擇膏腴之地班槐就列兼崇台宰之儀入  
侍齋祠居奉朝請有陟恪之敏得雍肅之和朕享告成爾庸惟穆  
既飲斯至乃澤厥勞鄭伯列于近郊滕侯先于異姓班茲盛策進

以崇階仍增井牧之封益寵雲臺之號竝爲異數用洽至恩於戲  
訖是上儀布茲大喜羣工庶尹旣國典之是孚至戚密親在家情  
之允洽益慎爾德以對厥休

除富弼行禮部尚書同中書門下平章事昭文館大學士監修國  
史兼譯經潤文使加食邑實封功臣散官勳封制

門下中樞治本裁教化之宜上相台光長官師之任用緝熙于百  
度資變正于三階眷乃右垣時惟哲匠委政事而已試攷名實以  
相符誕揚大庭付畀魁柄具官富弼任重道遠性正德全閣敏推  
于上才博洽通于眾志撓之不濁偉量表于彌沖簡而易從盛業  
彰乎可大首膺魁壘之舉歷踐禁嚴之塗蹇諤發于爾躬啓沃盈  
于朕聽邇由樞省出殿藩房名聲聳于遠夷風采繫于諸夏遂膺  
枚卜實契具瞻朝有偉人物無異論持重守正參濟以和告猷納  
忠一本于治屬以冢卿謝政首鉉位能諏俊乂之大臣疇若予采  
冠丞疑之上席僉曰汝賢是用升自政塗處以師尹仍進秩宗之

重復兼史觀之名行以優封昭茲異數用旌茂諒允穆師言於戲  
播化鈞而理陰陽操國柄而撫辰象惟無心故能感物惟以虛所  
以受人格于太和繫我真宰往踐乃位同孚于休

除王貽永授依前檢校太師行尚書右僕射兼侍中充景靈宮使  
彰德軍節度使加食邑實封改賜功臣制

門下升庸進等蓋褒德之彝章均逸待勞乃優賢之茂典眷言俊  
老久總繁機乃圖宣翼之勤俾遂偃休之請對加尊秩改治靈宮  
諷以剛辰告于列位具官王貽永志懷明劭識宇冲深逮事及于  
先朝得尚榮于舊館用絳侯賢子之譽入纘世功以征南武庫之  
才擢居師列粵予紹宅之始嘉乃幹方之能召置機庭掌我兵柄  
周旋一紀密勿萬微慕安世之典機本于周慎猶韓增之領事濟  
以寬和又牧政而修明總武經而練達納忠匪懈宣力罔遺遂兼  
台階仍冠樞席常益附蟬之飾尋還浴鳳之聯抑乃榮章俞其謙  
請式是耆良之望深于眷倚之懷比閱封章聯辭機劇敘晦明之

嬰恙因夙夜之肆勤閱茲高年累以煩事聽還溫省之務特寵殊  
庭之名益升右揆之崇復兼常伯之重進褒功之美號拓衍食之  
優封有嘉舊勳益昭異數於戲臣鄰之際貴保于初終進退之間  
思全于休美勉綏遐福尚仁敏謀

除張堯佐特授光祿大夫依前檢校太保宣徽南院使准康軍節  
度使加食邑實封制

門下祇修郊報肅奉廟昭告虔前人裸鬱香之酒大旅上帝颺楨  
燎之煙餼食洽于羣神助祭來于四海神人感說福嘏昭通樂與  
臣鄰均茲休祐睠惟近職時乃內徽亟酬從蹕之勞參錄陪祠之  
劭用頒慶賜式示寵優具官張堯佐履尚淑均器懷詳敏早會右  
文之治夙馳居業之稱發策俊廷膺敏才之高選振纓公路達從  
政之大方寢服近嚴稔更內外委典京之尹任峻司會之使名總  
治要煩滋見計籌之善參圖勤濟進聯徽鉞之崇有若孟津直爲  
巨屏陪我京室控于河橋用繫帥節之行出委戎翰之近憑熊成

治卓馬來庭通文石之內朝進班邇列陪甘泉之法從預相縟儀  
志力允嘉事爲咸濟逮端門之還軫稽大寢之策勳崇以階聯拓  
茲井賦允爲異數用示澤勞於戲郊爲國之上儀有繫敷贊賞乃  
朝之茂典敢廢舊常往服衷嘉勉思欽慎

除曹侂特授依前檢校尚書左僕射充保靜軍節度使加食邑制  
門下朕曷嬰機務稍煩神明遂滌慮于大庭乃味道于虛室吉祥  
來復剛健無虧開懌羣臣慰安億姓蓋二儀之相冲子乃三后之  
翼曾孫惠我壽康繫茲保佑乃嚴祕寢合祀大神以對越于天休  
用敷錫于朝慶藩岳以職而來貢臣工執事而有嚴自齋濯以潔  
誠逮瘞燔而訖事禮容疊穆氣象晏溫驗休證之著然宜祥釐之  
錫爾眷言侯度用舉寵章具官曹侂識局夷通志懷敏劭夙稟德  
門之慶蔚爲戚畹之華人義府以敦詩時惟良帥登太常而紀績  
世著大功無亞夫貴倨之風有陰興謙退之行居則以列侯而就  
第善不近名出則以良翰而守藩達于從政近易東秦之節俾臨

舊許之邦撫是寰封陪茲京室命書甫降祀典告成蓋圖守屏之  
勤參錄充庭之上衍封爾宇加惠于朝進以茂勳疇其真賞乎乃  
王庭之號用爲侯服之光於戲賞以勸其功祀以報其貺惟前人  
之烈已頒誓于河山惟後昆之賢復續戎于茅瑞往服慶賜勉思  
忠規

除張茂實特授依前檢校工部尚書充靈遠軍節度使勳封食邑  
制

門下朕曩以日中聽政夜分觀書雖禹湯求理之心未嘗敢怠而  
黃老養性之術頗有所虧賴穹厚之惠康蒙宗社之敷佑善氣來  
復吉履以強恭卽路朝述修祀事以虔大報用答元祺藩岳底貢  
而畢臻神祇呈貺而胥穆薦享之夕儀物粲然丹燎告升休景彌  
燭策勳有典頒胙著文眷言戎翰之臣用孚庭號之慶具官張茂  
實誠節果壯志度深沈濟美本于勳良好謀通于奇正習安邊之  
將略善于拊循佐絕域之使才得其要領以忠謹之操入衛于嚴

廬以武毅之風出分子制穀牙旗云建師律有嚴十國爲連析普  
靈之奧壤萬夫觀政殿上黨之強藩封守以安方貢惟謹邇成熙  
事均賦祥釐參澤內外之勞昭示幅員之慶時惟良帥崇以勳名  
仍開衍食之封益示陪敦之寵茲爲異數式顯茂功於戲邦國用  
光天人助順康哉之慶豈獨在予霈然之恩庶均維屏往服茲寵  
益慎爾猷

除李昭亮依前檢校太傅同中書門下平章事充景靈宮使昭德  
軍節度使制

門下總戎參鼎兼名器以爲榮易地建牙處形勝而斯重矧惟師  
弼之舊久莅幹垣之煩閱是服勞嘉茲請覲俾升藩于制閫命司  
職于殊庭參懋勤康抑惟彝典用頒明制固允師言具官李昭亮  
器略深明誠懷冲厚稟山西之勝氣通圯上之祕韜粵自大門載  
忠規于奕世眷言爾考著勳力于先朝稱辛蘇之將家爲擊任之  
后族克生哲嗣聿濟美猷亦嘗榦不庭之方有禦侮之力入居宿



衛提利兵而誰何出護將屯領中軍之節制曷釐符籥之任就升  
袞鉞之崇逮滿北門之更復委中山之鎮苛慝不作拊循有方久  
去闕庭頻移星歲宜人奉于朝請特申霈于寵靈換上黨之節旄  
分壺關之茅土益增眞食彌衍采田俾司典密之都仍踵太清之  
職體貌惟舊恩禮攸宜於戲眞祖在天實右慶靈之祚壞宮置使  
必先台宰之臣嚴奉在茲往欽無忽

除曾公亮檢校太尉充樞密使制

門下經遠慮微必慎制兵之術折衝消難亦資畫策之臣是憲樞  
躔聿崇使號蓋政謨之攸寄匪耆哲而莫居適得其人誕敷厥命  
具官曾公亮風業碩茂志慮深純學多貫于前言性頗修于中道  
有方重之德可以泥蹕而鎮浮有明達之才可以造機而成務嘗  
講勸于左右亦召置于禁嚴敷我訓言代予明命間請臨于宸輔  
過擢置于京師咸有治功遂聞政本通明練于百物參和穆于羣  
言貳公之司久陪于論道內密之任宜正于筦樞仍加傳道之名

更益陪敦之數崇階馭貴眞食衍封竝示寵章式旌殊禮於戲典  
機之任莫慎乎微擊柝之言蓋取諸豫勿謂承平之久益思備禦  
之深祇服斯言往踐乃位

除田況特授檢校太傅充樞密使進封開國公加食邑實封制

門下本兵近司參置于使號經武大柄允屬于材賢日圖宣哲之  
良用舉正名之典定自朕志揚于王庭具官田況誠志純深茂才  
冲劭寬栗發乎謨德博洽本乎多文策從三道之科置諸四禁之  
地得王臣匪躬之節有國士無雙之風參賴敏猷數當大任保塞  
蕩平之略鎮蜀撫循之勞明智不疑淵謀善斷間亦委之大計試  
以周才迎盤錯以皆虛彌彰利器汰精剛而不耗自表良金擢典  
內樞之繁稔聞前箸之畫一乃心而匪懈研諸慮以惟微見于忠  
精實有成績參圖俊德升正機庭仍傅上公益疇多賦崇階是陟  
異數在茲於戲樽俎之謀遙制于戎落樞機之地上法于斗宮勉  
慎乃思以輔予治

賜梁適特授依前行尚書禮部侍郎知鄭州仍改賜功臣制  
門下褫機政之煩均屏翰之逸左右修輔蓋陟恪之久勞內外肆  
勤在眷毗之一體爰正庭號用告朝倫具官梁適局致夷通性業  
開爽入我英毅之選參于橐從之華召自複門侍于邇閣預贊書  
于明命備進讀于邱墳嘉謨納于論思敏用彰于強濟尋圖制閭  
之效擢貳本兵之司職典樞機地親帷幄亟參聞于政道遄敷變  
于辰階出人五年周旋二府苛慝比作變異重仍噴有煩言達于  
予聽曾淑聲之莫建在清議之弗平屢上封章求還印綬朕思全  
進退之禮務崇始卒之恩參錄舊勤尚仍前秩以眷官亞旅之重  
莅黃圖右壤之雄臨長鄭人頒錄漢詔於戲台宰之職任國之綱  
維寰輔之邦陪京之襟帶往服茲命尚體至恩

文恭集卷二十二

文恭集卷二十三

丙制

除韓琦特授依前工部尚書同中書門下平章事集賢殿大學士  
加食邑實封改賜功臣制

門下春秋大事載合食之文建武舊儀有親祠之典朕永追來孝  
邈企前徽因時物成攷古禘祭具法物之駕款神祖之廷儀采焜  
煌牲玉純潔殊方底貢羣岳入陪誠志孚通聖靈開饗適成熙事  
誕賦祥釐翼我盛容時惟茂宰爰疇爾賞式告于廟具官韓琦秉  
志忠純蹈道夷正居然時傑之望司我大政之均有惟深之明以  
通于眾志有成德之美以弼于朕躬而自孝享矢謨先庚孚號總  
乃容臺之議協于齋殿之恭率籲臣工拱侍裸獻明發不寐朕深  
優然之思醞假無言爾有顛若之色自鬱酒之云灌訖丹燎之既  
升率履弗違右饗如答至陽顯見積晦開消還御端門飲至大寢  
益以褒功之號拓茲衍食之封實賦有加異數斯在於戲相予肆

祀既格于休嘉勉爾亮工益思于輔拂時惟良顯往其懋哉

除韓琦依前工部尚書同中書門下平章事集賢殿大學士加食邑實封仍賜功臣制

門下亮成天功實繫于宰職緝熙王道允寄于賢才矧久服于機庭且周知于治體俾正中階之象用膺次相之文既攷師言復涓剛日式揚孚號誕告庶工具官韓琦志度純深才器高妙行足厚于風俗言必合于典常立于本朝毅然懷體國之色訪以大略直哉有匪躬之風曩者獷俗擾邊勁兵宿野始仗指蹤之略邁升基命之階間從書殿之華就寵師干之拜持中山之師節臨大鹵之盛秋寂無邊虞深得戎重召言還國申命極樞總是煩機議茲舊物謀而鮮過慮不及私備挹猷爲罄宣忠力文武參試固亮節之卓然台宰對司在至公之允若是用參之龜策付以機衡仍登書殿之名更拓土田之賦於戲寅亮天地之化調序陰陽之和衡石無心以平而爲體橐籥有道以虛而爲宗勉思此言同底于治

除韓琦特授特進依前檢校太保充武康軍節度使加食邑制門下朕以天統上正日晷長至明發禿于世室昧爽祠于郊丘靡神不宗虔乃有孚之享登禮必答擁我無疆之休訖侍中之解嚴趨太常而賜胙時則儒帥朕之名臣董齊耳目之師倚殿股肱之地議勞惟素頒賞宜先用敷慶策之文聿進崇禋之典具官韓琦業宇高劭風德修明卓爾傑材之宏居然皇器之重體侔金石介然不易其常量均江河撓之莫見其際更試文武踐揚藩朝秉是精忠濟之明識早著勳于西略旋翼務于內樞參斷幾微交修久大匪躬之故慮不及私造膝之謀舉無遺策迭更出處交厚眷毗常山臨代之衝大鹵近胡之地悉號勁兵之處委臨制閩之雄建以高牙成茲安枕會卜郊于三歲庸薦禮于百神列上計書述修貢職率先乎羣岳旅次乎大庭逮朱燎之訖儀及玉車之還軫乎休宇縣覃施臣工乃睠元侯特崇貴級用加地進律之法申拓井開賦之恩飲至勞旋厥惟舊典疇庸進等茲示茂恩於戲郊廟虔

恭乃承敷佑君臣敕戒惟是幾安獲此康年成于大報思與俊舊永底顯休

除文彥博特授檢校太尉同中書門下平章事使持節孟州諸軍事行孟州刺史充河陽三城節度使判河南府兼西京畱守司畿內勸農使加食邑實封制

門下四輔居中用緝熙于邦采二伯治外亦藩屏于王家雖易地而略殊在殿邦而迭重眷言茂宰求解冢司有嘉靜退之風特舉褒優之典兼徽台鉞誕告臣工具官文彥博格量冲深體用安重資疏通之明識蘊強濟之敏猷卓爾偉材本克生于王國居然奇璞早見器于宰朝拔自時髦經我世務歷樹風于方面亟聞政于宰司屬以盜發甘陵氛生朔壘義能首奮師以凱還名繫民瞻功惟朕念爰立作相遂正三階之文用又于朝乃總萬樞之務逮分垣翰遄授旌旄開幕府于長安委節制于全雍眷求予弼圖任茂勳式序上司復光舊物居百度將明之重比歷暄涼在三事弼諧

之先尤彰夙夜方篤仰成之眷遽陳謝去之章諭言且勤誠意頗固興化致治雖資秉哲之良均逸偃藩亦廣養恩之義姑從所欲仍示寵章榮以鳳池輔之虎節析孟津之茅瑞委洛宅之符書加衍土田申崇功號悉舉疇庸之數誕昭懋賞之文於戲出處之方竝揚于休命進止之度有美于庶言往惟欽哉無忘夾輔

除文彥博依前檢校太尉充忠武軍節度使授特進加食邑制門下朕具法物之駕自宮徂郊崇精意之禋奉特與璧緒正鍾律祓飾典文哀對于上神參侑于列聖燎熏焜耀雲景杳冥降福協手孔皆祝釐難于專嚮矧惟時傑早陟冢司倚居夾弼之崇領袖輔邦之重宜優羣后均沐靈休具官文彥博志度淵冲體範明劭抱公台之偉器肖辰象之至精際會盛期迪宣遠業沈機先于大蔡勁節表于疾風著投袂勤王之勞清于朔壘應吹沙作相之兆燮我辰階迹美規隨志存幹翼避丞疑之上席委節制之中權張我天聲帥于雍部圖金城之方略參寄老謀撫井鉞之師兵坐資

雄槩益重出藩之望用紆西顧之憂屬以清廟告虔紫宮拜貺述  
修祀貢之職率循侯度之儀夙尚忠圖益欽志嚮逮展成于元祀  
惟肇敏于舊勳賞不可淹禮宜加腆爰頒獎策用進崇階卽優衍  
之前封廣陪敦之異數於戲乾祇開佑乃歆至治之馨藩岳屏毗  
以底中邦之靖益圖夾輔永服休嘉

除宋庠河陽三城節度使檢校太尉同中書門下平章事判鄭州  
制

門下古者謀帥必本于詩書雅云憲邦實繫于文武眷言俊老久  
典煩機比陳控避之章宜舉閔勞之典有嘉舊德早正中階宜升  
節制之榮仍寵台司之重誕揚孚號頒告外朝具官宋庠爲時耆  
英秉德純粹通于道術之韞濟以文采之華擯自機廷之嚴入止  
嚴廊之拜輔相厥辟協泰象財成之宜偃休于藩得大雅進正之  
度頃從列屏召置首樞咨帷幄之籌賴樽俎之算直清行己粹密  
存誠溫樹不言奏章隨削參萬幾之務均三品之更夙夜惟寅耆

艾斯久出于兢畏之性比形挹損之言表解洪樞請行外闕是用  
輟從前箸寵以命圭崇利建于盟津便均勞于鄭圃師干之試蓋  
寵于元猷台鉞之崇用衷于哲輔優封拓井真食加田茲示便蕃  
以疇密勿於戲左右陪輔地雖重于二樞內外屏毗義則均于一  
體往服朕命以藩王家

除宋庠特授檢校太尉充樞密使仍賜功臣制

門下效法斗宮崇建樞省翼萬微而置使必取傑才聯三事以兼  
司用優俊老抑惟舊物申告正朝具官宋庠博洽藝文休有道德  
方重而不倚直清而無徒蒼璧方琮追琢成于祕寶黃鐘大呂考  
擊見于正聲往在朕初得之首舉典策光于施命臺閣練其舊章  
啓沃善言進必依于義理束修雅行靜有補于風華嘗升號于機  
庭過正名于中鉉性資慎重問溫樹而不言志在將明恥衮職之  
有闕謨謀日淺靜退可嘉偃休歲深素履彌劭屬以內樞闕職前  
箸待籌圖舊是先選眾攸舉登我碩德議茲煩機論道本兵在二

司而均重秉文經武亦一德之參圖俾升台宰之名仍衍土田之  
賦崇茲掌武昭厥殊章於戲戎事惟艱人謀匪易吉之先見蓋韞  
于幾深擬而後言以成其變化昭我舊德豈忘訓辭往體朕懷以  
全慎道

除賈昌朝特授依前檢校太師同中書門下平章事山南東道節  
度使進封許國公加食邑實封制

門下朕迺者夙興聽斷日昃劬勞三慎凝懷暫屏于煩慮九乾資  
氣遄納于太和蓋穹祇之擁全繫祖宗之保固乃卜季秋之吉奉  
祠路寢之嚴始升薦于齋誠庸答揚于景貺執事有恪醜假無言  
升燎告成休氣來擁思與羣后均被蕃禧再崇進律之文宜先主  
籥之望具官賈昌朝材居邦傑德映民宗經術號夫通深謀謨推  
于闕博便朝講勸早授道于朕躬冢司弼諧嘗用乂于厥辟休有  
風業著之巖廊躋辭政軸之勞洊委師干之總三階之象參耀于  
乾台二南之風載融于道化眷言朔土重莅別京當洪河渤碣之

流臨天街畢昴之次屏毗王室安輯戎疆厥庸居多乃望惟穆屬  
鉅儀之云究當慶賜之遂行賞蕃宜之功詩美申伯賜文武之胙  
傳尊齊侯是用爵以上公邦之舊許仍徹土田之數益崇井賦之  
真舉是寵嘉竝優哲艾於戲祭則受福敢專在于眇冲賞以懋功  
諒無踰于俊老往服乃命永孚于休

除賈昌朝行尚書右僕射依前檢校太師兼侍中充景靈宮使充  
鎮安軍節度使加食邑實封仍改賜功臣制

門下崇器大名必歸俊乂之德繁機劇柄重累元耆之賢特推進  
律之恩俾解持樞之任仍伸舊典用預殊章涓乃剛辰告示列位  
具官賈昌朝道器明遠德範冲深蔚爲儒宗達于治道隕然公輔  
之量夙表大成卓爾巖廊之材早彰厚質自膺枚卜遂正阿衡盛  
業著于規隨嘉謨盈于啓沃曩辭魁柄之重再司畱籥之嚴撫全  
魏之都畿領北方之節度左右修輔抑惟舊學之臣內外屏毗宜  
著老成之望仍屢辭于尊秩且益表于謙風躋者渴見儀形召還

樞宥彌罄同寅之節逾昭秉義之忠惟機務之煩然且神明之勞  
止本兵經武雖深賴于老成均逸代勞姑寵綏于碩德眷言舊物  
申舉前恩兼東臺常伯之名正文昌右相之重陪我京室書社淮  
陽仍總治于靈宮益衍封于采地用優俊老式示寵章於戲羣務  
幾微有嘉于匪懈上卿進退實美于無猜惟我師臣往體朕命  
除賈昌朝依前檢校太師同中書門下平章事安國公充山南東  
道節度使加食邑實封改賜功臣制

門下肅若齋輅類于陽郊合祛天地之尊

祛字原本誤作祛攷漢書倪寬傳合祛于天

從衣今改正陟配祖宗之聖奠璧而精志達升燎而瑞福通還霈  
寵靈均敷貺施欽嚴主籥之地我有宗臣睠惟賜祚之功疇先伯  
舅宜頒獎策以洽舊儀具官賈昌朝經爲儒宗才乃朝匠雅有咸  
德之美韞于精識之微迪厥誠明蹈中和而範俗遂于術略躬文  
武以憲邦勳入冠于台司實委成于魁柄體有嚴廊之重志存王  
室之先密勿訐謨粲話言于三筴逡巡退讓穆風化于二南進兼

台鉞之崇入儀書殿之重再光舊物還殿北門撫茲畢昴之疆安  
于常岱之鎮底乃嘉靖賴于耆明甫修郊報之儀首虔方貢之職  
壯猷可尚美志逾昭屬熙典之迄成顧寵章之昭舉申加功號開  
衍食租胙井牧之真封峻雲臺之美稱參寵持衡之舊庸昭進律  
之殊於戲禮縟文繁氣調時豫惟帝享此奚德致之思元首之歌  
幾微之必以戒念成命之頌恐懼而不敢康獲成上儀嘉與舊德  
率由茲道茂對天休

除王德用特授依前檢校太師同中書門下平章事兼羣牧制置  
使充樞密使河陽三城節度使加食邑實封仍改賜功臣制

門下內樞之地上範于斗宮前箸之籌參寄于人傑以經常武之  
事是號本兵之司圖冠厥名疇總予務乃眷元侯之長早崇右府  
之聯爰擇剛辰復還舊物具官王德用志懷果烈風槩沈雄通于  
奇正之謀居然間傑之氣春秋閱禮韞義府以惟深甲令書忠載  
世家而有舊比膺推轂游歷千城先十乘以臨戎長萬夫而觀政

德刑具舉威惠參施能名播于外夷沈機隱于敵國彘谷俊望擢  
 典繁機翼濟事功迪宣忠力孚乃識而匪懈研諸慮以惟微旋均  
 基宥之勞亟樹蕃宣之治蹈險夷而一致服忠孝而兩全簡在朕  
 心洽于朝聽是用升鳳池之寵秩聯虎節之榮章倚殿輔邦用陪  
 京室屬右樞之缺職咨羣岳以擇材僉曰汝賢宜弼予治蓋天子  
 二老出以居方伯之尊寰內諸侯入則處公卿之任抑惟曩制舉  
 是隆名用起壯猷使纘舊服仍峻雲臺之號兼增井牧之封式厚  
 耆英有加名數於戲樞機發令制戎事以惟艱樽俎折衝經人謀  
 而匪易往慎乃位益思其忠

除王德用特授依前開府儀同三司檢校太師同中書門下平章  
 事充樞密使河陽三城節度使進封魯國公加食邑制

門下朕屬者穹厚降康祖宗介福三壇新命見錫于壽臧萬宇歡  
 心同均于愛戴思答揚于貺施乃祗戒于禁嚴合祀大神參侑先  
 烈四海駿奔而助祭羣后肅雍而在庭薦鬯而精意通升燎而靈

氣格敢專享于純嘏思均澤于庶工爰舉寵章宜先近弼具官王  
 德用沈雄植操明允抱誠毅乎有師帥之風侃然通軍國之務出  
 于勳闕濟奕世之忠規冠厥樞庭擅本朝之宿望以謹質而被倚  
 愛以慎重而典幾微處進退而無愠容歷夷險而有常德中間謝  
 事尋還內密之司久試益忠能保後彫之賞處節旄之極寵兼台  
 鉉之至榮耆艾之節益堅謙挹之心彌固侍我祠事煩茲老成用  
 圖陟恪之勤參錄寅恭之志加地進律于以荒于大東疇德表功  
 茲用陪于多賦益疏真食舉洽至恩滋寵壯猷式頒獎策於戲君  
 臣一體在休恤之均同天地合祛宜蕃禧之康共往服茲命永孚  
 于休

除龐籍特授檢校太傅昭德軍節度使永興軍一路兵馬都部署

安撫使兼知永興軍加食邑實封制

門下稽若前王拜于大帥或跪而推轂伸其制閫之才或齋以設  
 壇崇茲授鉞之命矧惟迪德之佐抱乎全器之能載涓日策之良



爰委師干之試頒夫明制告于廣朝仍資分陝之行實允憲邦之望具官龐籍精明異稟英博多通自進服于邇僚旋敷聞于大政沈謀至策蔚懷人傑之資碩德壯猷亶爲王室之老日者種羌負固邊部繹騷將武庫之精兵護延安之絕塞資其智略宣我威靈逮河曲之懷柔屬邊亭之撤警沿其雅意置諸本朝文武參施顯偉才之絕備台樞迭踐見盛業之交修曷均逸于近藩過進儀于祕殿教條所賦苛慝以消休有勤勞孚于羣聽屬以長安闕帥西夏須才圖雄俊之寶臣疇綏予眾正嚴莊之師律僉曰汝賢是用按上黨之封因名闕之固析茲茅瑞徹彼土疆仍光傳道之名兼實陪敦之數前驅六纛外冠十連泣茲鶉首之郊頒我虎符之政以寬西顧爰屬老成於戲茲乃舊都厥惟全雍爾其將節制之命審控帶之宜從外折衝矧羈縻之有素居中作扞惟安輯之在初善撫朕師往對休命除龐籍依前尚書戶部侍郎知鄆州仍改賜推誠保德翊戴功臣

散官勳封食邑實封制

門下圖治之世宜本至公預政之門合防嫌迹矧居四輔之首允在百僚之先苟懼干請之名殊失仰成之意兼沿章削俾解政機具官龐籍志度淵冲業宇明劭韞才謨而敏達更事典以淹通早翼務于本朝洊服勞于近職雅有風采蔚著猷爲乃者西州用兵延安近寇屬輕裘之謀帥煩籌筆以制邊戎索以清夏人來附乃眷西顧予嘉乃勳始召置于樞庭旋擢參于宰府闔外無事頗見于匪躬天下旣安允膺于注意遂正斗樞之號遄升邦鉉之名固宜厲以正方繩于羣下而乃親聯交構私謁彰聞逮有司之訊詞合杜門而待罪及行弊斷乃失重輕致公議之弗容在人言之莫遏尚矜舊德兼覽奏函聽避位于台司俾均勞于藩服委東平之安輯便樂土之康嘉於戲罷免之科蓋拘于典制進退之禮用正于臣鄰勉賦寬條弗忘曩效

文恭集卷二十三

文恭集卷二十四

內制

議樂詔

是詔在皇祐二年閏十一月

朕聞古者作樂本以薦上帝祀祖考三五之盛不相沿襲然必太平始克明備周武受命至成王時周公始大合樂以和邦國漢初亦沿舊樂至武帝時始定泰一后土樂詩光武中興至明帝時始改大予之名損益前後以制樂節唐高祖造邦至太宗時孝孫文收始定鍾律明皇方成唐樂是知經啓善述禮樂重事須三四世聲文乃定國初亦循用王朴竇儼所定周樂太祖患其聲高遂令和峴減下一律真宗始出聖意大祠用樂又議隨月轉律之法屢加按覈然念樂經久墜學者罕傳歷古研覃亦未究緒頃雖再三攷定博訪知音終未有的究古今知聲知經可信之人嘗爲改更未適茲意如其制作益須切當宜委中書門下集兩制及太常禮樂官將天地五方神州日月宗廟社蜡祭享所用登歌宮懸審更

定奪聲律是非按古合今調諧中和務要議論允適經久可用垂信不朽使祖功宗德發揚無窮神祇感格善氣來應苟獲至當何憚改爲但審聲驗書三學鮮竝互詆胸臆無所援據慨然希古靡忘于懷尚賴洽聞共圖盛節故茲詔示想宜知悉

諸后祫享依舊詔

朕惟春秋大事在于禘祫前詔太常崇按舊禮期以孟冬之吉躬祀祖廟庶因合食聖靈相接以廣烝烝之孝而一二禮官因別廟四后有疑論焉訂之諸儒議久未一深惟祖宗之制至重至尊祖宗以來有司攝事行之久矣祥符中復經聖考著明詔當時禮官講求已云莫可廢也矧茲眇末甫崇孝享其敢廢先妣之舊典常禮重違先帝之聖志哉今親享在邇未可輕議其孝章孝惠淑德章懷皇后祫享且依舊典候過大禮令禮官重加討論咨爾輔臣務于仍貫故茲詔示想宜知悉

孟冬親詣太廟行祫享之禮御札

朕顧循菲質膺守聖圖潔幣玉以事乾祇嚴圭鬯而奉宗廟惇修將禮舉秩無文亦嘗復耕藉于靈壇恢宗祀于路寢斯牲匪愛靡神不尊用能誠志達于幽明馨香格于上下靈休見擁至治用康永言孝思有懷先烈惟祫享之義著經禮之文大祭先王合食祖廟盛迪嘗之薦深肅僎之懷追孝奉先莫斯爲重茲享之廢歷年既多有司所存出于假攝禮之將墜朕甚惜焉卜以孟冬備茲法駕款于太室親薦嘉籩宜示先期以伸誕告朕取今年十月內擇日親詣太廟行祫享之禮其今年冬至親祀南郊宜卽權罷所有合行諸般恩賞竝特就祫享禮單一依南郊例施行至日朕親御宣德門宣制仍令所司詳定儀注以聞務遵典禮勿俾煩勞咨爾多方咸體朕意故茲札示想宜知悉

皇祐五年南郊御札

敕內外臣僚等夫四時常祀戒在有司三歲親祠敢稽舊典迪惟列聖光施冲人獲執牲瑄以事郊廟永惟欽慄弗敢怠違間亦耕

藉而供粢盛宗祀以虔珪幣合祛天地參侑祖宗庶幾告誠豈日能饗惟時上帝賜朕有年嘉生順蕃黔細滋殖豈瑣涼之致此抑右序之俾然矧今區夏謐如風雨時若鐘石甫就壇場在望四海助祭蒞蒼壁之舉百神受職係皇邸之設思欲裸鬯酒于世室進純犧于泰時因以昭孝範俗延祉庇民敢憚必躬而廢大報朕以今年十一月四日有事于南郊咨乃攸司相予肆祀各揚爾職勿懈于位諸道州府不得以進奉爲名輒行科率務循靖壹勿使煩勞咨爾庶邦當體朕意

禁內降詔

朕紹承駿烈祇服先猷蹈道以臨庶邦謹憲而持大柄馭之予奪正以賞刑悉任至公靡容紊法比有儉幸肆興妄圖或違理覬恩或負罪希貸率求內出間亦奉行蠹政虧風莫斯爲甚雖屢頒于詔約曾未絕于斯途兼慮臣庶之家近貴之列交通請託巧詐營爲陰致貨賂密輸珍玩夤緣結納侵撓權綱方務澄清當嚴禁詰

儻復違犯斷在必行重念成湯以六事責躬女謁苞苴之先戒管氏以四維正國禮義廉恥之具張矧宗祀之涓成屬祥釐之均被嘉與中外絀此非衰勉于自新以隆至治今後應內降指揮特與恩澤及原減罪犯者竝仰中書樞密院并所承受官司具前後詔條執奏不得施行及臣庶家如有潛行貨賄結託貴近者並令御史諫官覺察論奏咨爾丞弼體朕意焉故茲詔示想宜知悉

賜百僚乞御正殿復常膳不允批答

朕奉承聖業循守政綱旰夕固勤冲晦罔識譴告自上壤食爲災日月之行誠有常度春秋之戒則在正陽探觀前王臨制大器或遇裁而懼或罪己以興莫不深蹈兢危躬自菲薄僅能消復或底和平矧在寡涼敢忘降挹是用避路朝之坐損大官之庖庶幾感通有所開右卿等義均休戚情深愛戴願臨正寢祈復常珍雖嘉乃誠難徇斯請勉思勿懈以輔不及書不云乎無疆惟休亦無疆惟恤

賜宰臣富弼以下上第二表乞皇帝御正殿復常膳不允批答  
夫元者三朝之吉日者眾陽之宗厥有食焉茲用惕若豈予弗類  
在治未昭天其警諸變或在是探觀前載敷求哲王或罪己以興  
或遇災而懼庶幾菲薄以昭抑畏是用損去常膳退卽便朝期底  
和平以消災慝僅踰旬浹未覺勤疲而卿等率籲臣工繼陳章表  
請御正寢求復庶珍雖愛君之心良篤于義而應天之道要當在  
誠第嘉乃陳難議其可

賜皇兄允讓等上表乞皇帝御正殿復常膳不允批答  
朕纂膺乾統劬勞日昃思又庶政以登至平寡昧弗昭未識厥路  
上天降咎正陽有食豈非明不能燭治有大虧天其警予慎思其  
闕是用避正朝之坐損內饗之膳恭默計過恐懼冥懷庶感通于  
昊蒼獲消救于氛慝卿任居宗翰情均休恤勉修所職以輔不逮  
若乃御法宮之黼座復大官之鼎味雖嘉誠愛難俞章削  
賜皇親批答

夫月書王正表年之所謹日象君德秉陽而弗虧惟端朔之辰有  
壤食之異豈智臨之或爽將道化之未孚發見陽明開示乾戒用  
損去庖品避居路朝惕厲以寘懷淵默而思咎庶消陰慝以底天  
和而卿等地在親賢義同休恤繼形章請再達予聞願臨正屏之  
朝祈進常珍之品誠存愛戴辭甚懇勤姑務省修以圖消復雖嘉  
美意難俞來請

賜北海郡王允弼上表謝皇帝御正殿特賜俞允批答

初災紀朔大明致虧日官以言天象垂戒是以避路朝之坐損膳  
宰之差冀緣惕厲之誠庶通消救之道而羣公庶尹宗邸親良迭  
敷乃誠稔達予聽請御當陽之坐祈復兼珍之餐章削紛盈誠節  
款到已嘗開許煩有敘陳

賜宰臣文彥博以下上表賀今月四日皇帝御崇政殿疏決刑獄  
五日降雨批答

近以春土可耕時澤猶爽密雲屢族宿麥將瘁申禱未驗用思孔

疾顧哀都獄豈無冤人夙興便朝分條繫者親加慮問率俾降原  
冲志獲通休應來表纔翊日而協氣至未崇朝而甘施洽消百苛  
之欲作紓三農之勤望感召潛契朕誠說焉雖協哀矜之期亦繫  
敷變之助卿等心存理物善在稱君亟剡奏函願書信策深昭將  
順之意尤多嘉尚之懷

賜宰臣陳執中以下為上表賀崇政殿疏放刑獄即時降雨批答  
朕以雩祀既虔時澤未效秋種所急夕惕用勤顧哀邦氓牽陷都  
邑其中繫者豈無冤焉傷和致災或恐在是因臨便殿親為慮囚  
且示哀矜悉從原降書不云乎與其殺不辜寧失不經未旋晷而  
和氣通弗崇朝而嘉澍洽驕陽以屏豐歲可期卿等地在彌諧志  
敦將順遽閱奏函之上願從信策之藏載省寅恭良多愧尚

賜文武百僚陳執中以下上表賀為今月一日太陽當蝕虧分不  
及算數并陰晦微見詔

邪慝侵陽推步在朔肅若乾戒惕于朕心退即便朝損御菲食寡

昧所值忱懼弗寧天維顯思月既晦止雲氣簇于甲夜雷雨降其  
中天逮翊日之將晡纔微陽之見象驗諸食壤減于算分此皆上  
穹輔持列聖開右既惠朕以膏澤之施復警予以曜靈之虧俾無  
怠荒敢弗抑畏夫應天以實感人在誠期與臣工之良永思政治  
之要用消厥咎益孚于休卿均是憂勤志于將順煩有稱慶良增  
愧尚

賜宰臣富弼以下上第三表乞加上尊號不允批答

昔孔子達者辭不稱仁光武賢君禁諸言聖朕每覽前典莫不嘉  
此且帝王之道安在于彌文而天人之心所助者資順謙乃益之  
本損者德之修矧以眇身承茲大業仍以菲德享諸鴻名猶懼弗  
任居常自惕幸羣元之隕祉荷累世之延洪治無甚虧時則咸靖  
思欲致四海之祭合七廟之靈攷卜孟冬躬行大禘豈曰能事抑  
惟舊文而卿等率籲羣司推高眇質將順其美鋪衍厥章願鏤寶  
文益上徽稱極大仁之不冒昭至化之巍成美溢而浮志慚且悸

再嘗批諭猶執控陳況乃愛戴所深形容已至宅帝皇之大席神聖之高固已華出古先徽兼上睿若俯徇于誠請更益施于號榮既乖本心恐累台德

賜宰臣文彥博以下賀老人星出見批答

景霽秋早氣分商仲南極呈于祕象清臺獻其壽占卿等道著弼諧任居毗燮喜聞吉語煩有賀章請以天官之言屬諸史氏之掌體誠同于元首義足表于愛君載省寅恭良深嘉尚

賜宰臣富弼以下賀壽星出見批答

金氣中分珠躔上見清臺設候疇人獻占述昭爛之乾文告壽昌之福兆卿等義存將美志在祝延因垂象之薦休煩剡章之稱慶寅恭斯在嘉尚良深

賜樞密使宋庠等賀壽星出見批答

南極見象上天垂休太史獻占歸福于朕夫以壽昌之慶豈敢專饗獨美當與俊乂大臣億兆之眾同均斯祉永錫難老卿等欣聞

吉語煩有賀章將順之誠良增嘉尚

賜感德軍三軍將吏僧道百姓等詔

朕以允初德器早成天屬爲近適總司于畱務俾節制于中權進領藩方畱宿京邸且念賢王之子用伸敦族之懷矧茲美原抑乃名土按之析瑞壯厥維城汝等遙被撫臨諒多欣懌今特授允初依前檢校尚書右僕射持節耀州諸軍事耀州刺史兼御史大夫充感德軍節度耀州管内觀察處置等使仍加食邑七百戶食實封三百戶散官勳封如故故茲示諭想宜知悉夏熱將士等各得平安參佐官吏僧道耆壽百姓等竝存問之遺書指不多及

賜山南東道三軍將吏僧道百姓等詔

朕以賈昌朝業茂公台器全文武命建牙于南紀仍主籥于北門冠于九侯時惟伯舅屬以首樞缺職前著咨才召還溫省之嚴入冠本兵之任朝言協比國論倚成緬想吏民久承節制自聞朕命諒愜爾情

賜河陽三城三軍將吏僧道百姓等詔

朕以宋庠文儒之宗台宰惟舊近解樞衡之重俾兼袞鉞之榮言念盟津前經坐鎮命茲書社利以建侯俾寰輔以作藩庶京師而蒙福眷言士吏以及軍民聞孚號之已行諒輿情之胥說今特授宋庠依前檢校太尉同中書門下平章事使持節孟州諸軍事行孟州刺史充河陽三城節度孟州管內觀察處置河堤等使判鄭州軍州事故茲示諭想宜知悉

賜建雄軍三軍將吏僧道百姓等詔

朕以許懷德少歷戎行老知軍志早持齋鉞久衛寢戎頗積勳勞用加恩數俾侯中冀書社平陽緬想吏民同嘉師帥今特授許懷德檢校司徒使持節晉州諸軍事晉州刺史兼御史大夫依前充殿前都指揮使建雄軍節度晉州管內觀察處置等使加食邑七百戶食實封三百戶功臣散官勳封如故故茲示諭想宜知悉  
賜彰武軍三軍將吏僧道百姓等詔

朕以李昭亮門濟忠猷世承勳烈曷澄氛于保塞命書社于濟陰升冠內微倚臨北道顯庸惟茂令聞逾昭進兼宰鉉之名就司留鑰之務輔藩惟舊臺鉞有光緬想吏民遙承節制嘉聞異數增慰輿情

賜淮康軍三軍將吏僧道百姓等詔

朕以張茂實早分將鉞嘗帥騎兵參圖前勞召還舊物解符書于郢上進茅瑞于淮西遙制藩宣入司宿衛緬惟有眾嘉此建侯今特授張茂實檢校吏部尚書使持節蔡州諸軍事行蔡州刺史兼御史大夫充侍衛親軍馬軍副都指揮使淮康軍節度使蔡州管內觀察處置等使加食邑七百戶食實封三百戶功臣散官勳封如故故茲詔諭想宜知悉

賜寧國軍節度使北海王允弼摹勒御書飛白上進詔

省所上表蒙賜御書飛白二字謹摹勒上石上進事具悉朕以聽朝之餘寶茲寸晷自惟翰墨之尚猶賢博奕之爲聊因飛毫于以



結字式將意眷且寵親賢卿有兩獻之風躬二南之美喜宣上德  
樂盡忠規忘蟬翼之匪工煩龜趺之立刻爰緘墨本乃剡奏封深  
陳感遇之懷且顯游揚之志本于信厚嘉乃恭謙省覽以還愧尚  
無已

御書賜龍圖閣直學士權知開封府蔡襄摹寫賜御書刻石事敕  
書

省所奏伏蒙特賜御書臣齋戒摹寫刊著于石次錄獎詔及臣所  
獻古詩兼載後序以紀遭遇裝一軸上進事具悉卿體行清方才  
謨詳正通于學術粹是風業朕選諸近侍佳有名臣因暇日以援  
毫命中璫而賜字蓋以將朕異瞻成卿令名退思匪工追用自慙  
而乃深于感遇篤在游揚形頌歎之長言溢尚蔡襄集有御書  
碑其載勒石摹  
進始末在至和元年六月二十四日其結銜稱起是舍人知制誥  
與此不同者攷襄本傳自起居舍人遷龍圖閣直學士知開封府  
蓋其勒石作序在為起居舍人時而賜敕則已  
在轉官後也襄集不載敕書此下闕文無攷  
賜右神武大將軍睦州團練使宗諤進太平盤維錄敕書

敕宗諤省大宗正司奏汝纂歷代宗屬事蹟勒成上下二帙總六  
卷分一十二門仍請名曰太平盤維錄上進事汝迪德自先蒙廕  
于後能外紛華之習頗勤教學之方闡繹舊聞尋研本系類成編  
次實有綱條撮諸胄緒之華光我神明之祚奏篇來上乙牘以觀  
有嘉規為良深歎尚

賜宗室磁州防禦使承亮進裕享受釐頌敕書

敕承亮省大宗正司奏繳汝表今撰裕享受釐頌并序投進事朕

勳者法一閨之氣講三歲之祀孟冬吉酉裕于祖廟陳歷代之寶

奏大安之樂神靈嘉饗雲景杳冥朱燎既升正陽顯見豈予能感

抑祖宗右焉汝肅雍侍祠將順為志中有和樂發于頌歎大宗獻

狀奏篇登御流藻以揚主依義而顯君省覽之餘歎尚兼至

賜翰林侍讀學士知徐州呂公綽進明禋詩敕書

朕勳以祗飭齋輅肅奉陽郊合祛乾祇登侑祖考秩上下之祀則

靡神不宗致精微之產而惟帝時享錫朕休福惠茲羣黎夫豈寡

德之能實繁先烈之茂卿職參經幄任總藩符志在游揚形于頌  
歎思致婉錯典裁淳深省覽不忘嘉尚兼至

賜知濟州李及之進唐雅敕書

省上表所撰唐雅十篇謹繕寫附遞上進事具悉汝職居延閣符  
守列城宣詔條而弗苛服文史以爲樂研尋前載追述雅風文采  
深純典裁詳密奏篇來上畱牘于中省覽之餘不忘嘉尚

賜交趾李日尊進異獸敕書

卿仍世守藩乃心向國越滄波而述職奉異獸以致誠在遠彌忠  
顧勤可紀式將頒賚爰寵傾輸當體眷懷益思恪順

賜宗室叔裒進異獸歌敕書

近者交州遣使以麟底貢私怪物色之異且驗載籍之傳通儒碩  
生多云非是朕方懷柔彼俗重違其情與見于庭命納諸囿汝以  
宗藩之秀時豫觀者喜毛羣之馴擾美島夷之稽服昭我德政形  
于頌聲副以編聯乙于省覽游揚兼在嘉尚弗忘

文恭集卷二十四

文恭集卷二十五

內制

賜新除參知政事曾公亮詔

國朝之制設陪貳之職以輔翼台宰名數之重下丞相一等朕之  
選任必屬賢髦卿志度深沈識裁詳密以道術侍朕講以典冊宣  
王命請治寰輔擢尹京師厥績茂焉其試效已是用升廁公府參  
聞政道采于議者固無間然冲挹之懷遽形囊奏雖謙風可尚而  
命綽已行勉思大猷勿爲曲讓

賜參知政事曾公亮乞退不允批答

省表具知卿志行修明風業夷遠通習治具洽練朝章間繇禁聯  
陪貳宰路毅然有守知無不爲夙夜嬰煩晦明虧裕暫從謁告適  
此養恬卽當善平入奉參決忽得章請來謝政塗頗用憮然寧當  
議此況廟堂之上具有規隨而機務之間未至停壅勉輔藥石宜  
安精神勤味粹和速期康復

賜參知政事曾公亮乞退第二表不允批答

卿性度淑均才謨隱濟預聞大政陪貳上公夙夜宣勞晦明嬰恙暫從頤衛日冀善平何遽貢章乃求謝職且周官垂法有寬疾之文漢家養恩著賜告之令卿其少思省慮味恬餐和勿有疑焉急就良已

賜參知政事曾公亮乞退第三表不允批答

卿以耆明之姿參駸嘏之政謀謨匪懈陟恪良勞偶爽節宣暫從頤衛茲有生之未免亦憂職之使然賜告所存養恩斯在比觀章請求謝宰聯批諭已勤控陳未已況朝無闕政而世方須才勉圖粹和速就康復

賜參知政事曾公亮乞退第四表不允批答

卿精誠雅行至範明猷佐時矢謨貳公圖政偶嬰甚美之疾適聞良已之音比及暄辰固加常膳日期朝謁跂聞話言前已批章復有今奏懇求解罷殊異眷毗卿其研味真腴屏息煩慮期于勿藥

慰茲側席

賜參知政事曾公亮生日禮物口宣

陪貳宰司贊襄治道惟陽中應律之朔乃闔左設弧之辰政在尚賢禮存嘉惠侑茲燕喜體我寵恩

賜鎮安軍節度使行尚書右僕射檢校太師兼侍中判許州賈昌

朝生日禮物詔

時惟舊德位冠元侯京室是陪藩符攸總誕期斯至慶賜用覃俾爰子舍之良得致家庭之命侑茲宴禮示乃朝恩

又

喬岳吐符巖廊誕器周旋二府陟降三階季商協辰左弧在旦馭貴有典加惠著文爰錫餼牽以及醪酒式將恩意往侑宴私當體壽儀卽祇慶賜

又

陶元精之和躬咸德之美蔚爲俊老殿我輔邦六射記辰九秋肅

氣加惠隆于國典為壽盛于家情俾爰似續之良式將賚予之意用資族宴姑示朝恩

賜山南東道節度使同中書門下平章事賈昌朝敕書

朕獲天人之助乘畿夏之驩祓除路朝崇講祠事以順眾志以答靈休日吉辰良氣調時豫熙典云究慶賜是孚卿王室元耆人倫先覺早冠居于鉉席首敷燮于化陶三讓彌冲一德逾劭居保釐尹正之重有安輯勞徠之功朕饗告成乃眷斯在進胙以爵加惠于田雖曰舊章抑以疇德已頒告于庶位復往宣于朕懷當體休成同均慶賚

賜山南東道節度使檢校太師同中書門下平章事賈昌朝口宣

卿德冠時宗地居寰輔歸造誕辰之節汎推任子之恩乃選上駟來充內廐羨名駒之奮發煩駿足之效牽載省寅恭良增嘉尚

賜賈昌朝口宣

朕虔識景至恭事天明禮典迄成祥釐均被卿朝家俊又藩岳儀

刑體貌所先寵光宜厚褒元功而進號益多賦以衍田馳遣使軺奉將命綽用敷休渥當體眷毗

賜賈昌朝赴闕茶藥口宣

卿留籥再司介圭入覲爰屬秋暘之候用勤參御之行者哲是勞眷毗增厚式頒藥劑庸示寵私

賜觀文殿大學士判亳州陳執中乞致仕不允批答

省所上表陳乞致仕事具悉卿俊又大臣耆明碩老再冠朝首比讓台元輔泰象財成之宜得大雅進止之度往治于亳實陪厥京偃藩在茲蒙福多矣如聞攝衛稍虧和平已出見于屬官諒再加于常膳舊德所至臥理有餘何乃上言欲求謝事是未亮憑賴之意而規適宴之私卿專精神近醫藥納養善氣保固太和避第仕塗未可議也

賜觀文殿大學士判亳州陳執中再乞致仕不允批答

卿器采精明體韻方重奕世濟德先朝納忠逮充舊貫之居再處

阿衡之首將明典度勵翼官師朝有公言朋無私謁比辭政柄屢  
避台階靜勝柅于澆風偃休寄于密甸均勞近止蒙福在焉微有  
苦于足腓遽見求于身退茲豈藩鎮優耆德之意朝廷待元老之  
心耶卿其養精神省思慮淮陽臥理西河偃藩是所望于大雅也  
賜鎮海軍節度使判亳州陳執中待罪特放敕書

夫道隱不還民散已久刑之設惟五而惡之討有十敗俗之自從  
古則然卿舊老壯猷俊德哲望近辭時柄甫偃价藩宣風有初頒  
教尚淺民之從違政何加損遽形引責殊異眷毗且諒寅恭彌嘉  
慎畏

賜昭德軍節度使知并州龐籍口宣

省所進奉賀正馬貳匹事具悉朕因三朝之吉受四海之圖方貢  
畢陳朝慶大集卿時惟俊老殿我強藩寅修述職之文遠效充庭  
之禮載馳上駟來貢承華有諒勤恭良增嘉尚

又

省所進奉謝恩賜牌印并公使及到任馬共六匹事具悉卿文武  
兼劭風德竝優業載賢公望居俊老朕以壺闕襟帶并土股肱崇  
以高牙殿于大鹵甫頒條詔初見吏民宴犒有儀公帑惟舊至煩  
稱謝乃有效牽滋顯勤恭弗忘嘉尚

賜新授觀文殿學士知鄆州龐籍口宣

卿國之耆俊材號將明二府迭更一德咸有臯辭時柄倚臨東藩  
得茲老成居然治靜圖中階之宿望進書殿之偉名異數有加師  
言允穆乃馳上駟來實內閑有嘉傾輸良增歎矚

賜工部尚書同中書門下平章事集賢殿大學士韓琦生日禮物  
詔

惟天所賚若時相予甫屬開秋實惟誕日稽諸朝範寵于邦家于  
是有牢醴蕃庶之錫所以侑族宴而將壽嘏也斯禮則舊厥命惟  
新祗若其承體茲乃眷

又

蔚以傑才相予大政首秋云吉誕日在茲俾按彝文式將渥賜庸示宰朝之寵且爲族宴之榮往惟欽承體茲眷矚

又

體茲間氣誕是傑才素律云秋左弧在旦餼牽加惠醪醴侑懽佐族宴以在茲稽臺恩而惟舊

賜武康軍節度使韓琦口宣

卿識業夷通謀謨高正早參內密之近比更方面之煩器望益隆誠績兼茂擢升書殿之重就增儀職之華殿乃戎翰崇茲朝範爰效上駟之貢式充內殿之羣載閱勤恭良深歎尚

又

朕親郊修報升燎告成覃惠臣工均釐藩岳卿居傑望濟以忠圖方倚幹垣用優名數進崇階而馭貴疏多邑以昭庸馳命輶車往頒命綽惟茲茂渥宜卽欽祇

又

卿風致高劭識寓宏通宣翼藩朝明暢文武外易戎翰之重就升師鉞之雄乃睠在茲僉言允若爰貢上駟來賓內閑益亮誠勤彌欽意尚

賜新除觀文殿學士知河陽富弼對衣金帶鞍轡馬口宣

卿忠惟許國任屬陪京書殿升聯地官進貳式將眷倚往致匪頒賜除富弼起復禮部尚書同中書門下平章事昭文館大學士赴

闕敕書

卿大名宰國宏業熙朝遠略有開高謨未究遭艱去位銜恤在家上鉉曠才豕卿缺職永惟在疚亦已累旬涼瑣虛懷蒼黔待起朝有舊制國念前徽須伸權奪之文庸副仰成之意庭有孚號物無異言義固掩恩忠本移孝勉思美業就成茂功尚抑餘哀來慰勤

仁

賜宰臣富弼生日禮物口宣

象炳中階業隆上鉉維申誕日行夏紀時俾孚子舍之良奉若家

庭之賜式增榮觀當體寵恩

又

挺生時傑光輔本朝眷乃首春慶惟誕日爰舉優賢之典用頒加惠之恩侑族宴以是宜寵台司而斯在

又

元傑稟氣英瑋誕才若時奮庸代工變化三元首序六射在辰國有賚恩家榮宴喜餼牽將禮醪酒侑懽舉是寵章體茲渥眷

又

吐符喬岳居守阿衡建杓于寅設弧在旦眷言彝典尊禮冢司有醪酒之頒兼餼牽之錫助家庭之爲壽廣媯族之合懽慶賜是將祇受惟允

賜忠武軍節度使知永興軍文彥博口宣

曩以九里之祀陟配天丘三朝之元會同王歲宗公先郊類之澤羣岳有朝慶之文卿業著蕭規地崇陝弼舉禮祀而爲勞頒賞策

而則當爰及首正茲惟獻節並效名駒之貢莫非上駟之良有美款誠尤多歎矚

賜河陽三城節度使檢校太師同中書門下平章事文彥博生日

進馬口宣

卿辰象粹精台衡俊舊曩緣誕日申舉賚恩命仲氏以奉將助家庭之式宴仰惟彝範煩有奏函爰馳上駟之良來實內閑之祕恭勤斯至嘉尚弗忘

賜保平軍節度使檢校太師同中書門下平章事判大名府文彥

博生日禮物詔

公台舊德俊哲大臣適居主籥之司爰屬設弧之旦俾將慶賜命遣使人當體寵加所宜祇受

賜新授龍圖閣直學士張昇口宣

卿體行直清才局明劭政爲邊最譽浹朝端升委強藩就遷禁職爰貢籥雲之駿來舒就日之誠有美勤斯良用嘉尚



賜參知政事張昇上表乞致仕不允批答

夫年之貴于天下德之先于人倫尚矣況乞言憲老存諸典刑圖政任人寄在者哲至于進退豈局于彝制哉卿老成司直清忠篤行閱古今之義理歷內外之事任蔚有風采稔聞謀猷憑賴忠規參毗政道雖年塗云及而志力尚全何遽揆章乃欲謝事是未亮眷倚之意而自取宴安之適使朕何望焉

賜參知政事張昇上第二表乞致仕不允批答

夫治朝柄任豈局以年良臣忠規不遺其力卿蔚爲俊老翼于沖人黃髮無愆清德有素雖年塗云及而志力不衰陟恪肆勤精明暢理方陪大政適倚老謀比閱奏于公車願還事于宰旅已嘗批諭猶此控陳是未炤委成之懷而自圖安佚之利雖佳知止難從恬退

賜參知政事梁適生日禮物口宣

體資上節地亞中階自參翊以宣謨號通明而任職屬開秋之統

序協誕日之吐符朝有彝恩禮優近弼爰舉匪頒之式用將眷倚之懷俾洽宴私且昭榮遇

賜定國軍節度使知太原府梁適口宣

省所進奉端午馬二匹事卿利建高牙倚臨雄關爰邁浴蘭之節來效籀雲之良姑美勤恭尤增嘉尚

賜彰信軍節度使判成德軍李昭亮敕書

地濱北落月旅西成沖氣薦和下滋于寶稼靈苗合穗交蔭于綺旎昭萬寶之順成示三登之長楸卿兼榮麾鉞長治戎翰觀擢穎于遐疆喜同符于異畝倂圖來上列牘以聞將順在茲欽歎曷已賜彰信軍節度使新授同中書門下平章事判大名府李昭亮赴闕茶藥口宣

卿召言侯藩入覲王所歷嚴途之阻越諒旅從之勤疲爰舉匪頒以將眷勞

又

卿外自國藩入修王覲歷悠長之官道冒嚴厲之時寒言念勤斯固應勞止爰申迎賚用示眷恩

赴闕敕書

卿參中階之象帥北落之師煩我老成亦已久次方升庸于旌鎮命總職于琳庭亟奉介圭促祇召節

賜馬軍副都指揮使淮康軍節度使張茂實赴闕茶藥口宣

卿遠從旌鎮入衛巖除廣莫風高嘉平臘近特頒良劑用示寵恩

又

卿召言歸國緬想遵途屬此凝寒勞于屢薄式將逾賜庸示臺恩賜相州觀察使知邢州劉從廣赴闕茶藥口宣

敕從廣合符去郡效駕還臺冒闌暑以甚勤歷脩程而良苦式頒珍劑用洽寵私

又

卿載馳藩節近次都畿仁延矚之有初諒興居之無爽用頒餼禮式洽恩私

又

卿言趨觀闕適次郊衢睠受玉之有初諒據鞍之匪易用頒良劑式示寵私

賜侍衛親軍步軍副都指揮使涇州觀察使定州路駐泊副都署

王凱赴闕茶藥口宣

卿總治師干輯寧邊部特降璽書之召用頒藥劑之良茲表眷存所宜祇奉

又

卿肅奉更書還司衛職初無辨嚴之日後漢書吳漢傳每當出師朝受詔夕即引道初無

辦嚴之日注云嚴即裝也避明帝諱故改良深跋履之勞飲劑所

頒恩禮斯在

文恭集卷二十五

文恭集卷二十六

內制

賜福建路轉運使秦玠平江西賊敕書

曩者盜興江西勢接閩嶺延入爾部驚騷吾民汝善布教條能設方略協比州將帥厲兵官開幕勇夫翦戮姦黨兇渠遂殄生聚以安使指告還章封言狀眷茲勤略良可嘉焉

賜提點刑獄施元長平江西賊敕書

汝早稱才名外提憲寄日者他盜侵于本部勢頗屯結眾甚繹騷而能躬履險難星言馳赴奮厲眾力開幕短兵翦戮兇渠離散支黨屬城以肅外臺上言協奏勤庸甫知明略有懷謙默益用歎嘉賜知汀州藍丞平江西賊敕書

日者逋寇弄兵江西小驚朕師逸入比境汝捍固本土協議外臺開幕短兵帥厲眾力休有方略訖致殄平爾勞居多使者言狀有懷忠力良切嘉焉

賜京東路轉運使董沔殺散河北賊敕書

敕董沔省龐籍奏河北過來軍賊兇勢不小齊州兵甲殺敗後若不急行翦除或散入鄉村卽復爲民患汝尋披帶兵士徑往兗齊二州往來催督諸頭下兵甲接續殺獲事汝強濟有聞廉清自勉夙將漕節受任外臺而齊魯之疆濱接朔土潢池斯在姦盜是依屯結其中寇攘爲患擿發陰伏何知起居親糾合于環兵廣設施于明略翦除支黨清定部封吏息追胥之煩民去驚騷之患慈惠孔碩厥庸爲多東藩帥臣剡章言狀有嘉勤蓋良深歎矚

賜判大理寺郭申錫及審刑詳議官等敕書

敕郭申錫等省權知審刑院事張揆奏據大理寺日奏司申十月十六日以前送下公案茲已斷奏了畢無見在事外郡請讞繫囚待報況茲寒苦朕甚閔焉汝等法術通深才資開敏平亭疑奏附致比例咸適例成之慎而無几案之畱有副欽矜良增嘉尚故茲獎諭想宜知悉

又

羣氓多辟庶獄滋豐用存疑讞之科以廣平反之施爰書來上累牘實繁汝等持法甚平以文無害究研惟允操決靡畱遂停丹筆之書盡釋黃沙之繫適當歆毒良副哀矜爰覽奏陳尤多嘉尚

又

國家刑典用中獄疑許讞決平寄于列寺審克存于禁局相爲表裏參適重輕用慎例成庶無壅濫汝悉心處當持議詳明論報弗畱開敏可尚閱茲奏述深于歎嘉

賜權判大理寺陳太素等敕書

朕日見羣臣親覽庶政惟諫官論事法官奏讞雖復旰食猶爲之論決所以者何防壅蔽而慮畱獄也汝等竝以一時之選典茲三尺之法能以明慎敏于弊斷鞠書隨傳列牘告殫益彰宿業之勤良副欽刑之寄永言嘉尚弗忘于懷

賜權大理少卿王惟熙等敕書

昔林光斷獄歲止三四貞觀大辟裁二十九嗚呼何施而臻此乎  
朕道化未孚刑禁且眾鞠書比上請讞亦繁汝善體哀矜敏于弊  
斷不使畱獄頗副欽刑言念恪勤弗忘嘉歎

又

夫刑罰之于化民未矣然至治之世不能去刑朕燭理未明躬化  
猶爽鞠書狎至治讞尚繁汝等善體哀矜良勤弊斷丹筆無滯几  
案爲空爰覽削陳弗忘嘉歎

賜皇兄寧國軍節度使同中書門下平章事同知大宗正事北海

郡王允弼敕書

卿任隆藩翰地處親賢參耀台文董司宗牒克諧公族允穆朝言  
近以宗說等瀆干人倫陷此邦憲迹惟可醜理莫得容卿首秉宗  
司乃同官守骨肉薄罪可養于私恩名教大防難隱于公議深惟  
舉白良合糾虔屢上奏封具昭謙畏誠防閑之不逮匪訓導之有  
愆當體眷懷勿煩敷述

賜平江軍節度使兼侍中知大宗正事允讓敕書

卿藩國表儀宗室賢亮體行明潔器範端修資六德之夙成賴九  
宗之治正本支以睦譽望孔昭近以公族之中愆于至行弗率乃  
教自陷匪彝猶以家情屈于邦憲茲固愚鄙之稟所謂不移殆非  
訓導之方有所未至何用防嫌而上奏章求解大宗之司殊乖尚  
德之寄當念燕詒之重姑懷慎敘之仁懋勉居諸益勵來者

賜起復雲麾將軍濟州防禦使王仁敕書

卿制邊部之雄控大鹵之重比因朝慶且拜臺恩遠傾就日之誠  
來效籥雲之駿有彰勤叩良用歎嘉

賜新授憲州防禦使劉渙敕書

汝以沈敏之才得拊循之術擢升軍禦董治戎昭亦緣端始之辰  
併有效牽之貢載懷勤叩良用歎嘉

賜撫州刺史滄州鈐轄董貴敕書

汝遙剖左符出鈐尺籍邁茲景至欽乃燎熏能竭寅恭交修貢助

彌昭誠恪良用歎嘉

賜侍衛親軍步軍都虞候王從政敕書

汝參司親衛出護邊兵遣乃升陽會茲報貺修其貢助奉此效率  
有加勤恭良深歎矚

又

汝世濟勳勞材推果壯領巖除之禁衛升候奄之榮名尚委強藩  
實繫忠力爰輪上駟來實外閑載諗款勤良增嘉尚

賜鳳州團練使高順等敕書

汝出總戎翰內參親衛力于經武志在輸忠爰因端節之良乃選  
上駟之駿效牽闕下底貢閑中載閱勤劬尤增嘉尚

賜知建昌軍曹觀敕書

汝職在劭農土惟宜穀修列郡經常之貢省大官導擇之勞言念  
效勤良增嘉尚

賜原州刺史知涇州安俊敕書

三朝受籍萬玉在庭汝擁衛邊隅拱懷朝次效名駒于龍友實華  
廡于橐泉眷茲虔恭弗忘嘉尚

賜海州團練使史吉敕書

汝肅縮戎團分持軍簿並緣任子來貢維駒慶賞所延勤誠可尚  
賜潭州通判李丕緒等修子城敕書

敕李丕緒省知潭州任顯奏汝都大提舉管句修築子城用甄贊  
砌並得完備事汝受任湘中任勞官下志存經遠慮及居安能協  
守官率和旅力增完城壁就濬池隍說使有宜樂成無射條聞來  
上嘉歎良多

賜新除資政殿大學士吳育對衣金帶鞍轡馬口宣

卿籍起洛臺詔藩陝服偉名增職左右陪卿庸示眷毗就頒錫與  
賜觀文殿學士田況乞致仕不允批答

卿素秉忠規早司樞筦經營百物通知四夷曷以愆和久茲移疾  
交章求解批諭弗從尋亮至誠姑授閒職庶熙神于事外得味道

于環中就乃平康副茲眷矚何乃遂求挂冕荐貢奏函卿雖身災  
所嬰而年塗未艾宜息煩慮更謁善醫及此暄辰早復常膳  
賜參知政事王堯臣生日禮物口宣

才具之美高映時髦識業之明坐陪國論屬此仲商之序協于誕  
日之良舉是朝恩助茲族宴抑乃匪頒之式體予眷賚之私  
賜新授右諫議大夫皇甫泌口宣

卿稔服吏文兼資識致擢升諫列移領藩條爰擇上駟之良來奉  
內閑之貢有懷勤叩茲用欽嘉

賜兵部員外郎知制誥吳奎知壽州口宣

省所進奉新茶芽事具悉淮土上腴園茗繁植春英所掇時品爲  
良方貢是勤嘉尚無已

賜鎮潼軍節度觀察留後知鄆州李端懿口宣

省所進奉阿膠事藥劑所須膠品斯在區產云記阿井曰佳卿守  
在藩條述茲方貢謹于熬治協乃精良足諒寅恭誠增嘉尚

賜新授禮部郎中充天章閣待制陳暘叔口宣

卿體業冲劭器宇夷通有意本朝允宜內閣乃眷北道姑委要藩  
爰貢良蹏用嘉美志

賜鎮安軍節度使判陳州程林口宣

邇以拜貺于郊覃渥在位而我王室之老實殿輔邦之雄賞策所  
班朝範惟舊俾爰子舍往錫命書卿出于忠純篤爲誠節選上駟  
之駮耳實中廢之承華載閱勤恭彌深歎尚

賜鎮東軍節度觀察留後知潁州李端愿口宣

省所進奉端午馬一匹具悉卿總司留印長治帥藩爰因采艾之  
辰乃效傾葵之志獻之上駟奉厥內閑有嘉勤恭弗忘歎矚

賜新授閤門使康德輿口宣

汝歷護塞兵見稱武幹適重別都之委用優上閣之遷當勵忠規  
以虔恩數

賜河陽三城節度使檢校太師同中書門下平章事王德用口宣

卿地美忠門位聯宰路間于兩社夙兆于祥占乘彼八鸞適敷于  
惠化爰因誕日用示錫恩俾爰似續之良奉乃匪頒之品抑惟彝  
禮遽閱奏函選屈產之名駒實承華之內廐載惟款至良切欽嘉  
賜五臺山十寺僧正順縮等敕書

省所進新正功德疏事具悉吉祥刹土名勝伽藍淨眾所棲元正  
斯屆大營蒲塞之饌廣演貝多之文用集妙因來陳壽祝勤恭彌  
顯嘉尚良多益在薰修副茲嚴奉

賜五臺山十寺僧知今等敕書

省所進新正功德疏到闕事具悉汝等宴坐名山安棲淨眾曩遭  
三朝之吉來祈千福之祥用嘉乃勤且命以賜茲乃前矩厥惟彝  
恩咨示薰修體予崇奉今賜知今等紫僧衣一對絹二十四匹故茲  
獎諭想宜知悉

又

汝等薰修巖谷宴坐道場因王歲之紀端奉梵文而歸福有嘉精

志用錫顯恩宜服圓乘益勤勝業

賜回西蕃獎州團練使霞展敕書

汝欽奉聲文恪修誠志遠效踰沙之貢載從易地之遷庸示茂恩  
益圖忠款

賜西蕃獎州團練使霞展男都君主霞智敕書

汝族高邊部志拱諸華載馳上駟之良來奉內閑之貢有嘉款到  
特示頒宣

賜交趾李日尊敕書

卿忠存奕世義戴本朝善繼藩稱能靖封守朕博臨庶國普愛羣  
氓爰覽啓陳用嘉恭順

賜占城國王敕書

卿志慮深純誠節款到邈居溟漲之外馳系闕庭之間嗣守忠規  
述修世職遣茲使介奉乃表章越沃日之驚波致旅庭之貢物傾  
輸斯至勤叩可嘉用示眷懷特蕃錫與益思祗順當體寵優



賜占城國王俱舍利波微收羅婆麻提楊卜敕書

省所差人進奉生象二頭象牙二百二株藥犀大小一百九十一株下色紫礦一百九十一斤中色煎香五百斤下色煎香五百斤事具悉卿長治國藩聿修王職地雖居于遐外世彌篤于恪忠匪忘存闕之誠來效占風之貢俾爰使指載越溟津亟覽表章深嘉誠節式將乃眷之意特推嘉惠之恩當體寵優益思欽順今回賜卿銀三千兩錢一百貫文至可領也其差來蒲息陀琶等到闕各支賜對見朝辭衣物銀器衣著等令于殿前都使衙安下及差鴻臚少卿劉舜臣等館伴令御廚翰林儀鸞司往彼祇應酒食鋪陳其所乞白馬已支賜二匹訖故茲示諭想宜知悉秋涼卿比平安好否遣書指不多及

賜夏國主進奉賀正馬駝口宣

王歲肇新人正伊始眷乃世藩之舊主茲邦土之封爰效忠規聿修貢式緬懷款至良用歎嘉

賜夏國主生日禮物口宣

紹復前徽述修貢職素秋建始良日誕彌用示眷恩式將慶賜無忘朝寵益濟世忠

又

奕世資忠承邦濟美三朝開序六射協辰爰導壽祺式將惠賜益思恭德庸對寵章

賜回夏國主口宣

省所奏母薨計告事具悉不圖閔凶奄失慈怙忽聞來計用怛于懷棄背以還哀摧難處惟當抑割無致殞傷撫念所深喻言何旣贈太師中書令貽永祭文

卿體行淑均志慮忠篤久毗內密蔚爲老成甫解繁機俾究遐福奄忽不愆傷悼于懷適及攢塗裁致薄耐餘哀所寄明識當知贈太尉兼中書令濮王祭文

惟靈地居宗戚德乃令王邁于綿疴奄然長逝茲用恫悼不忘于

懷卹典申加攢塗暫闕爰修奠酌其鑒追哀

又

早繇近戚參賴敏材領帥藩房畱治都局年塗雖晚志力尚強奄及云殂初不聞疾永言茲悼有歉常懷馳遣信臣裁致薄酌緬想營識儻能歆斯

又

籍在外屬帥茲列藩歷侍近巖比更煩委適奉朝請奄至喪亡先遠有期永懷無已俾爰伸耐冥識追哀

文恭集卷二十六

文恭集卷二十七

內制

皇帝賀大遼太后生辰書

義重睦鄰禮敦誕日企徽慈之凝範因慶育之履祥爰命使輅式將信幣祝茲壽嘏表乃誠忱

賜契丹人使茶藥口宣

卿信函修睦誕節講懽載勤使隰之行諒有夕冰之慎用頒湯飲式示眷懷

又

卿對持瑞節參奉信函來慶誕辰載涉長道用頒飲劑式表眷恩

又

卿等對持節旄遐涉疆亭紹修誕日之懽夙戒暄辰之御有少賜物用表至懷

又

卿等奉將信節馳慶誕辰固多跋履之勞用頒齊和之品副之良茗咸表眷恩

又卿睦鄰將命誕節修懽惟原隰之驅馳有風塵之匱薄俾爰往賚用示眷恩

又卿式將赴告載越阻脩固多跋履之勞宜厚撫存之眷用頒良劑以示至懷

又卿等對銜使指交慶歲元久冒寒凝良勞跋履式將賜物庸表至懷

又卿奉將使指載整華輶惟匱薄于風寒諒勤疲于原隰就伸頒賚庸助綏將

又卿參陪上介並駕輶車深惟跋履之勞固積疲勤之思往伸勞賜用表眷存

又卿首銜使指交慶王正惟匱薄于盛寒諒勤疲于脩陸致茲賚物昭乃眷恩

又卿信節副行端辰入慶登岐云邈攬轡良勞宜有匪頒以昭眷矚

又卿蔚居使首祇慶歲元屬風霜之凜如諒原隰之勤止式將予賚俾澤爾勞

又卿陪貳使華講修鄰好慶三元之嗣歲歷百舍之在塗宜有賚焉且嘉勤止

又卿等並持國節紹講鄰權勤勞累驛之程區薄餘寒之氣式將賜物用示眷懷

又卿對銜使命紹講鄰權率旅從以來斯冒修塗而勤止往伸賚物用表眷恩

又卿等蔚爲使首遙奉國函來修誕節之權良苦長塗之涉特伸頒賚庸表眷懷

又卿陪貳使聯講修鄰聘爰得謁關之告用嘉馳隰之勤往致匪頒式昭眷勞

又卿蔚爲使首聘茲歲端載迂晨霧之行諒有夕冰之慎用頒良劑

以表至懷

又卿因三元之首講二國之權率旅從之甚勤冒祁寒而良苦俾爰賜物以示眷懷

又卿以二國之好充備于使華三朝之元踐修于儀聘載勤馳隰仍冒凜冬良劑所頒沖眷斯在

又卿協恭使指爰率于烝徒奉聘歲元式將于信幣寒凝甚苦區薄良勞茲用寵頒以昭深眷

恩州賜北使茶藥口宣  
卿等來慶誕辰適當維夏駕乘駒而云邈馳使隰以良勞特示寵頒用伸至眷

又

卿等對將聘節胥洎烝徒來修誕日之歡載涉迺疆之迴特伸頌  
勞用示寵嘉

白溝驛撫問北使口宣

卿等張是使旛講于權聘來慶誕彌之吉諒多屢薄之勤用示眷  
慈特頒宴賚

白溝驛撫問北使兼賜御筵口宣

卿等嗣修鄰好甫次溝封載勤使隰之行宜有詔筵之錫用嘉冒  
涉特示眷存

又

卿等銜奉信辭講修誕好惟載馳于使乘諒甫次于疆亭用示眷  
慈聿伸宴勞

白溝驛撫問遺留人使兼賜御筵口宣

卿等式將遺意爰奉訊函次境舍以方初駕輶車而良苦宜伸宴  
勞庸示眷懷

雄州撫問遺留人使口宣

卿等奉將末命來致遺儀馳原隰以良勞次溝封而云始用伸撫  
諭宜體眷存

雄州撫問北使口宣

卿等言冒脩程來尋舊好且以嗣君之慶續茲與國之權緬念勤  
疲用伸撫諭

又

卿等對銜君命聯飾使輻惟境上之甫臨計道中之良苦俾爰勞  
問示乃眷私

又

卿等交慶歲元甫臨境首顧寒凝之方盛在跋履之良勞用撫乃  
誠式將予眷

又

卿等交修鄰好胥慶歲元適冒寒塗良煩旅從有嘉勤篤特示眷

存

又卿等被選使華務修邦聘涉溝封而伊始戒徒御而甚勤特示撫綏用伸眷矚

北京賜北使御筵口宣

又卿等肅將君命祇講鄰懽顧旅從之寔繁屬祁寒之斯盛用伸宴賜式示眷綏

又卿等踐修篤好馳冒遐塗爰偕旅從之行適次別都之近用嘉勞止是錫燕胥

又卿等慶茲誕節奉乃聘儀來修與國之懽適次別京之近爰伸燕勞用表眷懷

又

卿等載馳使隰爰講鄰懽眷殷邁以勤斯諒脩程之勞止就伸詔撫庸示宴慈

班荆館賜北使赴闕御筵口宣

又懷卿等肅將君命俯次都門跋履良勞敏勤可尚特頒宴惠用示眷

又卿等銜命新君駕言遠道來奉纂承之告諒多跋履之艱適次近亭用伸勞宴

班荆館賜北使到闕酒果口宣

又卿等睦鄰持聘嗣歲講懽飭車馭以良勞次國門而伊邇用頒勞賜式示寵恩

又卿等紹修鄰好交慶歲元如聞使乘之馳已次都門之近式將予賜庸勞乃勤

又 卿等奉聘講懽祝延修慶載馳使隰近次都門爰命寵頒式昭渥眷

又 卿等載脂使乘言屆都門講懽聘以惟勤申宴慈而旣渥用嘉行邁式示眷優

又 卿等踐修時好聯慶歲元俯次近郵良勤長隰縹醪甘實用示寵恩

又 卿等預選使華交修懽聘惟嚴塗之載涉諒旅從之甚勤用均御府之甘以勞輶車之格式昭眷寵宜在祇欽

又 卿等奉將遺指言次近鄰爰屬炎辰載勤遐路宜伸勞賜以表眷

恩

就驛賜北使內酒果口宣

又 卿等久馳使隰甫憩都郵惟按轡之良勞且解裝之方適用頒甘品式示寵懷

又 卿等使旌來聘里館載寧用頒膚寸之醪兼錫上腴之果侑茲宴勞體乃眷恩

又 卿等講修誕慶協比使華冒暄溽以良勤宜偃休之爲適特伸頒賚用示眷嘉

又 卿等使指遙銜歲元交慶爰錫甘腴之品仍頒醇旨之醪以侑樂胥當欽眷寵

就驛賜北使生餼口宣

卿等將命乘輅告言纂服涉疆亭而惟邈授里館以云初勞至有儀所頒非腆

又

卿等對銜君命胥慶王正爰當定館之初用舉饋牢之舊頒茲餼禮表乃眷恩

就驛賜北使銀沙鑼唾盃等口宣

卿等奉若信函慶茲獻節解裝伊始授館有初爰命頒宣以昭眷待

又

卿等震誕修懽遠華將命言念乘輅之久屬當授館之初特示寵優用伸頒錫

又

卿等使乘聯華慶函講好求祝延于誕節方休舍于都郵爰命寵頒式將渥眷

又

卿等來慶誕辰載馳長道在勤勞而可尚屬休舍之有初用示恩頒以昭眷寵

就驛賜北使春幡勝春盤等口宣

卿等慶屬歲元紹修邦好嘉逢春節之立喜見年芳之新用示眷恩式昭禮意

玉津園賜北使弓箭御筵口宣

卿等來修邦好方舍都郵聊折俎以致懽命司弓而延射用伸宴勞式表眷恩

正月一日北使入賀畢歸驛賜御筵口宣

卿等受言君所講好王正方從里館之寔且示詔筵之賜用伸勞飲式表需恩

又

卿等奉將使節來慶王春展聘幣以成儀頒詔筵而示惠用昭乃



眷于以勞動

又

卿等來慶歲元奉修邦好爰卽安于都舍乃就錫于詔筵用洽懽愉當知眷寵

正月一日北使入賀畢就驛賜花酒果口宣

卿等銜指嗣君繼好先日來赴惟新之慶爰屬履端之元申命寵頒式將渥眄

又

卿等通懽二國修慶三朝爰因休舍之辰載錫甘醇之品用嘉惠好當體寵恩

又

卿等使車將命王歲通懽授館有初解裝少憩宜伸惠賜以表眷懷

又

卿等式將好幣已達訊函方退息于都郵宜就頒于良醞副之甘實體我眷恩

正月二日北使就驛賜宴花酒果口宣

卿等持聘已成履元伊始久驅馳于華隰適休舍于都郵芳翠甘醇式將眷賜

契丹賀乾元節人使朝辭訖就驛賜酒果口宣

卿等夙持鄰聘申慶誕辰嘉成禮之有儀在眷懷而增厚宜頒優賚式示寵章

賜北使朝辭訖歸驛御筵口宣

卿等慶屬歲元寅修鄰聘訖奉報書之禮還脂使乘之行用錫宴慈式將眷寵

又

卿等奉聘訖儀駕言復命將載脂于歸轍爰用錫于詔筵渥眷是將言還斯在

又 卿等王歲修懽使華成禮已入辭于宸陛命就宴于都郵用示眷  
慈式敷契好

又 卿等奉聘成儀駕言復命率烝徒而駿邁詔祖軼以寵行且有頒  
宣以伸眷待

又 卿等與國修懽誕辰畢禮將復乘軺之命用頒折俎之恩俾洽宴  
胥式將眷矚

又 卿等竝緣誕節來講至懽會訖邦儀言旋使乘用頒宴勞式厚眷  
懷

班荆館賜卻迴北使御筵口宣  
卿等展成信幣還駕使車用勤祖軼之行特舉詔筵之餞以將惠

好當體寵私

又 卿等擁節交懽稱觴究禮屬言旋于使乘用伸餞于詔筵且寵成  
勤式昭異眷

又 卿等持聘訖儀駕言復命飭使裝而告邁伸祖軼以寵行用嘉爾  
勞式予眷賚

又 卿等將命講懽駕言回馭爰卽近郊之館命修載軼之儀式啓燕  
胥以伸眷勞

又 卿等訖奉函題還脂輶乘出次長亭之近眷言旅從之行就錫甘  
醇用昭寵渥

又

卿等展幣成儀還轅復命近郵云餞轅輶且行宜示頒恩以將渥眷

北京賜卻迴北使御筵口宣

卿等肅將時幣交慶春元飭歸馭以載馳次別都而伊始用伸宴勞當體眷恩

又

卿等爰斂聘圭載脂歸轍眷別都之云屆在旅從之良勤特示勞還用伸詔餞

又

卿等誕節講儀使華成命言脂車轄載涉川疆用錫詔筵以勤還馭

又

卿等震誕修權旅歸致命竝馳使牡戾止別京特示宴胥用伸眷寵

雄州賜卻迴北使御筵口宣

卿等展成聘幣促駕歸轅載惟原壯之馳俯屬疆亭之次特伸詔餞以洽寵恩

賜北使迴至瀛州御筵口宣

卿等修好成儀駕言復命適屬歛炎之候諒多履跋之勞爰錫宴慈用伸眷渥

又

卿等惟新稱嗣來赴于纘承載轄歸期聿勤于駸邁往頒慈宴用示需恩

又

卿等將命睦鄰紹敦于舊好駕言歸國載涉于脩歧爰錫宴胥用伸眷勞

瀛州賜卻迴遣留人使御筵口宣

卿等被遣舊君奉修遺好冒至寒而歸國率旅從以在塗申厚燕

胥庸昭眷矚

白溝驛賜卻迴北使御筵并撫問口宣

卿等爲壽誕辰戒言歸國歷疆亭而載邈率旅從以良勞特示宴  
慈用昭寵餞

文恭集卷二十七

文恭集卷二十八

帖子詞

皇帝閣春帖子

本集諸帖子各有五言體此亦宜有之殆爲傳寫缺佚

三元鳳曆當春始萬壽龍卮進御前綵勝朱幡宜此日金枝玉葉  
慶新年

蒼玉新旂祀木神今朝太皞始司春農躔漸覺星辰正壽曆長隨

日月新

翦綵房中新勝出披香殿裏早春回祥雲更傍南山起來對君王  
萬壽杯

苑中芳樹條風細天上黃衢杲日遲仙果定生千歲實祥煙長護  
萬年枝

春官青鳥司開啓星舍蒼龍主發生甘雨惠風資帝力杏花蒲葉  
勸民耕

玉殿香絲縈綵縷金盆白雪間紅花子孫千億無疆壽盡逐東風

入帝家

皇后閣春帖子

義仲司暘谷塗山佐夏王六宮師儉德四海化躬桑

中禁千祥集東方萬象新綵幡迎喜氣寶字鏤宜春

東陸韶光先四序周南風化被羣芳資生萬物昭坤德嘉慶千春

集紫房

東風初入長春殿碧溜新融太液池社遠未當迎燕日川晴先近

浴蠶時

白綠仙雲雜紫雲長生靈氣護元君已膺虎劍司陰教更珮金璫

奏寶文

妃閣春帖子

日向陰虬永春隨綵鳳歸玉京多燕喜金殿滿光輝

宮中玉漏迎遲日天上珠躔麗次星軒頊聖圖光億載皇英賢範

奉千齡

音官始奏融風至御水初傳曉凍開寒漏催將仙臘盡春旂飛入

貴宮來

翦綵平明出藝房長生殿裏百花芳書銜燕子青春早劍拂仙衣

白日長

夫人閣春帖子

綵樹春芳滿仙萸晝景長早花依玉砌初溜漾銀塘

浴種宜蠶事修禊盡燕祠資生迎木正蕃衍納春祺

釀酒淳神水延年飲露華八風朝聖日三境住仙家

雪晴宮樹有新梅來報東郊淑氣回春令先從天上起年芳初向

日邊開

迎氣青幡獵曉風九門佳氣鬱蔥蔥日華初在樽桑上春色先歸

御柳中

皇帝閣端午帖子

南極注生氣音官協夏鈞良辰五日永景福四時新

曉霽澄天宇離明敞帝闈靈符千福集神印百邪奔  
剛日逢端始炎辰屬長羸君王仁且聖慈旨卻梟羹  
殿戶還颯入宮池御水涼綵舟人競渡化國日偏長  
四時乘大德五日敞金扉陽晷移南陸天光盛紫微  
商管微陰動良辰午正端三光扶聖壽億載奉皇歡  
三殿茲辰奉御觴薰風梅雨好年光炎天更作奇峰勢來表南山  
壽曆長  
後宮鴝鳥將雛樂上苑安榴著子新嘉節已將天合數明離還觀  
日重輪  
南方炎帝本乘離長育羣生在此時命縷綵花傳故事風光天上  
更相宜  
南方朱鳥司時令東闕蒼龍護禁扉萬壽御觴端日舉祥風三殿  
繞雲旂  
九霄嘉節重端辰命縷靈符粲寶文虞舜無爲心自正五絃琴上

奏南薰

寶岐麥色黃雲重御苑榴花丹燄深已顯豐年資帝力更憑佳節  
說天心

皇后閣端午帖子

川館親蠶後宮房獻繭初香繒爭點畫綵縷競垂舒  
棟葉迎新候菖花發美祥憂勤宣內則嘉宴助時陽  
靈艾傳芳遠仙蕙吐葉新配乾資厚德介祉集嘉辰  
星火朱光熾繒絲采物華謹謠宜聖日王氣協皇家  
紫禁端辰晝漏長朱陵生氣盛南方長秋此日司陰教皇極同時  
納壽皇

壽觴百福融甘露寶索千祥鏤彩雲五日永逢佳令節億年長奉  
睿明君

香爐角黍傳三楚丹篆靈符辟五兵更有龜臺仙藥在河洲賢德  
保長生

靈苗遠采三山藥仙篆高飛六甲符此日萬神同翼衛長秋洪算  
與乾俱

蕤賓千氣盛炎方坤德資生茂百昌西域葡萄初蔓衍成周瓜瓞  
更縣長

楚粲雕盤九子香綵絲朱索更迎祥坤元此日扶皇極偉兆先時  
協壽房

夫人閣端午帖子

五絲通遺問百草鬪輸羸神印能祛惡靈符解辟兵  
天家饒物采華節有光輝明月裁歌扇輕霞翦舞衣  
禁苑年光麗端辰物象華天風結桃實火德盛榴花  
蓮葉抽芳際榴房結子初長年鬪百草舊俗際三閭  
廣殿回雕輦滄池漾綵舟堯心順時令不是重嬉遊  
魚龍曼衍夸宮戲湘虛浮沈銜水嬉齊上聖皇千萬壽飄然仙樂  
在瑤池

政事順時羞角黍舊儀乘節浴蘭湯人間涼麥欣時豫天上薰風  
愛日長

續命由來宜綵縷辟邪相向佩靈符夏鈞調樂長生酒歲歲宮中  
祝聖圖

宮中應節垂金縷天上迎祥捧玉卮更奏開元羽衣曲年年長願  
侍瑤池

彩艾相傳禳故氣香茅競愛結靈芳炎洲正覺仙遊盛化國偏知  
日景長

上梁文

醴泉觀涵清殿上梁文

兒郎偉國家出神明之後濬發靈源受天人之歸勃興炎曆軼夏  
商而拓迹介河洛以造邦混并八紘傳序四葉皇帝紹祖功宗德  
之烈躬神武聖文之姿大明燭于六幽至仁孚于羣品運甄陶而  
範俗丕變中和偃戈革以靖民洽臻昭泰大秩百神之祀上躡三

靈之休天瑞格思坤珍至止眷言京室粵在異隅有龜蛇合體之  
精顯水土北方之異蟠居息壤誌湧榮泉色華清以蕩邪味甘飴  
而蠲疾祥聞神奧惠洽都人有說宸心爰稽瑞牒卽其爽塏峙厥  
靈祠嚴香火之薰修極規模之壯麗鬱攸弗戒豈冥數之有常建  
章乃營在舊文而可作集班倕之巧匠飭荆楚之美材攷工程能  
庶民獻力天老練其日策石申候其星經抗華殿以正基架修梁  
而結宇雄虹晨挂采翟朝飛聳層構以凌雲成新宮于不日道旁  
盛于輿馬觀者同于堵牆飫賜之豐旣覃于微阜驩謠之美敢采  
于游童且慶落成用陳善祝

兒郎偉拋梁東石橋觀日任施功三韓百濟歸封內方丈蓬萊在  
日中

兒郎偉拋梁西青雲可上不須梯雪山蔥嶺人無外宛馬蒲桃路  
不迷

兒郎偉拋梁南赫赫王靈海外覃薰風養物深仁被鯤壑無波至

德涵

兒郎偉拋梁北天子威靈操斗極單于攬酒奉驩盟潢水占風朝

有德

兒郎偉拋梁上路近銀河翻碧浪陽鳥戢翼過猶疑金雀棲觚鎮

相向

兒郎偉拋梁下鬱鬱祥氛徧朝野九龍于此護靈泉六甲相將扶

大廈

伏願拋梁以後帝圖益大天曆彌長區宇嘉靖歲物蕃昌乾剛增

九五之吉本支茂千億之祥惟威神之館御佑鼎祚以無疆

集禧觀大殿上梁文

兒郎偉我國家席真祖之慶源受上穹之駿命誕膺炎曆昭啓黃  
圖設都河洛之間廣朝萬寓建號房心之次大撫八紘威稜震于  
鬼方聲文燁于海裔訖惟人面之類達于王土之濱莫不重九譯  
以來庭執萬珍而入貢奉昭華之玉瑄獻弱水之神香如眾星之



拱北辰若百川之赴巨海三代土疆之制悉統京師五岳神靈之  
祠並居封域欽屬先真之聖尊加帝者之居爰就國陽載嚴館御  
奉真游而惟永歷年祀以彌長皇帝上聖難名至人冠古纂睿圖  
于三后接遐武于九皇仁厚之風誕孚于億聖齊明之志昭達于  
萬神謹聖志以奉先穆淵衷而居上欽山岳崇高之祀勤歲時朝  
謁之誠徐御乾龍疑瞻睟像爰攷斯干之制載新大壯之模選文  
梓之偉才卽坤靈之寶勢千章工度庶民子來詔郅手而督繩命  
日官而推策駕修梁之百丈引建木之千尋歡聲沸于皇衢喜氣  
浮于絳闕輒采輿人之頌以廣游童之謠

霧通

兒郎偉拋梁西觚稜迢遞與雲齊海中渤澥還驚淺天外崑崙更  
覺低

兒郎偉拋梁南萬壽山光滴嫩嵐伏波銅柱王靈遠虞舜薰琴帝

澤覃

兒郎偉拋梁北天子聲明通斗極日南朝貢識天光塞外耕蠶知  
帝力

兒郎偉拋梁上日月星辰近相向雲中僊語近還聞天上銀河明  
可望

兒郎偉拋梁下鬱鬱祥煙浮碧瓦柔桑蔽日徧羣方多稼如雲平  
九野

伏願上梁之後邦基鞏固天業暉昌元元躋于富壽日日擁于休  
祥少海重潤前星載光惟鼎祚之云遠與嶽鎮而無疆

修葢睦親宅吳王院神御堂上梁文

兒郎偉我國家真祖開先靈基憑厚太微正氣上稟于列精臨代  
寶符早恢于王略惟天眷命奕世多神乘火勃興紹乾闥繹祖功  
宗德造統葉于億年武略文昭茂本支于百世今皇帝至仁溥博  
上聖登闕利澤浸于懷生文告柔于異類極三光之均照逮九譯

之所通莫不賓從悉蒙覆冒惇敘唐堯之族展睦宗周之親大列  
宅于京師廣析藩于茅瑞踰郇滕之啓昨厚魯衛之建封時乃維  
城請營原廟圖奉烝嘗之薦申懷霜露之恩勉從郡邸之章特置  
諸儒之議曰咨大匠往飭眾材攷北拱之極星順方中之營室裁  
茲崇址詔厥清臺練日策以維良瞻霄衢之云霽大鳴鼗鼓上架  
脩梁治建木之千尋引長虹之百尺盈車載酒有肉如陵賜上林  
之錢茲焉山積頌織室之錦爛爾霞鮮工徒說使以忘勞人士縱  
觀而竊歎仰天子烝烝之孝美公侯振振之風克成壯棟之規永  
保絲瓜之祚式揚駿烈用紀聖猷

兒郎偉拋梁東秋霽三山氣象通近窺日觀升雲白平瞰天池浴  
日紅

兒郎偉拋梁西蔥雪聲文萬國齊昭華玉琯今仍獻注水龍媒日  
更嘶

兒郎偉拋梁南重譯來朝美化覃越裳獻雉昭無外江鬱捐珠示

不貪

兒郎偉拋梁北戴斗通驩懷以德偃兵武庫表王靈躋俗華胥資  
帝力

兒郎偉拋梁上鬱鬱蔥蔥扶大壯喬雲雕靄互呈鮮合璧連珠近  
相向

兒郎偉拋梁下華黍有秋盈綠野湯翠飛走洽深仁堯壤謳歌被  
純嘏

伏願拋梁以後聖圖日熾宸算天長導迎善氣感育少陽璇源逾  
遠玉榦彌強天休滋至地寶蕃昌惟奐焉之粗構等巋若之靈光

文恭集卷二十八

文恭集卷二十九

策問

御試賢良王彰夏噩策題

皇帝若曰朕纘祖宗之洪業撫區夏之重器臨政思治于茲三紀何嘗不中夕惕厲昧且不顯延訪茂士詢求讜言冀臻治平以垂永久子大夫哀然充賦咸造在庭得不欲攄發智蘊開沃朕心耶方今庶務小康至化猶鬱兵戎雖戢饋餉頗勞學校雖興禮讓殊鮮官冗而浮食者眾民疲而失職者多陰陽爽和膏沴間作經瀆弛于常道淫雨溢于舊防賦調尚繁昏墊靡息豈朕明有未燭德有未孚致咎之來在予爲懼自昔繼體守文之君承前聖之烈藉累世之資致罔空之隆騰頌聲之美惟建武中興亟修文德貞觀特起驟致太平豈天時之協符將人事之胥濟功業遲疾奚其不同側席永懷望古盈愧夫聖王之制世也必本于仁義之統師道德之說飭以儒雅頒其教令尋孝宣之治尚于刑名迹顯宗之政

本于理法當二后之際信賞必罰刑清國富鳳凰屢下于郡國神  
雀比集于京師致茲美祥繁何然哉今公卿大夫與朕總方略美  
風俗而吏治未甚淳民德未甚厚豪右踰制姦猾冒禁以至守宰  
之任循良罕劭廚傳移于使客徭役迫于下貧殆有愁歎之聲未  
弭鬱堙之氣豈躬行之弗類而圖治之匪章歟昔晁錯舉于賢良  
公孫對以文學深陳政道竝先術數仲父治國之器內史詔王之  
柄咸垂格訓當安設施至于春秋之稱一元洪範之推九類何行  
而正其本何施而建其極子大夫習先聖之術熟當世之務識古  
今王事之體究天人精祲之原所以蕩穢致祥革弊興利受策應  
問咸以正對毋諱有司稱朕詳延之指焉

御試武舉策題

皇帝若曰夫威武者文德之輔功也雖復至治疇能去兵比詔有  
司圖講常武博延方略之士參閱材技之能冀崇善經以馭長轡  
子大夫曉習兵策賁然造庭質于前聞佗乃明辯夫兵本于仁義

戰畜于慈愛而曰詭道危事何耶邦國之法雖曰制軍而詰禁帝  
王之兵曷云以全而取勝司馬之體闕廓謂何霸者之師節制安  
在昔晉侯之伐秦也誰氏知其有功楚子之救鄭也何人料其必  
敗兵法貴拙速而譏巧久若然則亞夫失破吳之策充國無制羌  
之功也小堅大敵之禽什圍倍戰之法曹公官渡之克何關于眾  
寡晉文城濮之戰試言于奇正直入武庫策本孰施先趨北山法  
何以勝朕嘗讀良史之傳疑各將之功以孫武子之才僅能入郢  
有樂毅之略不卽下齊豈乏奇謀諒有深旨前代車戰其來尚矣  
後世以武剛而自衛以偏箱而致討或行則載于戈甲止則爲于  
營陣宜條利害若爲設施悉心以陳朕將親覽

試南省進士策題四道

問天道陰陽實通政事王者生殺宜循時令自秦任法理漢尚經  
術太初推曆甫用夏正故事報囚必盡冬月乃著經常之制初無  
淹繫之煩建武中興率遵舊典元和下詔始改孟冬議者頗贊其

然通儒復譏其否執助陽順生之論持議獄緩死之說咸有經據  
著明言之國家道粹前王刑孚中典炎曆斯握則與漢同丹筆所  
論尚仍唐舊姑欲順三微之用事去四時之行刑凡當大辟之科  
悉限季冬之斷用遵卦氣以攷天心然而積習生長更張慎始固  
惟明識雅富多聞幸商摧于古今願詳陳于義理  
問國家謹四夷之守飭三邊之備百萬之眾領在將屯什一之租  
縻于支計居常餉道仰糴富賈凡人粟于塞下例受錢于都內贏  
息莫計乾沒無涯歲或不登人且勞止道塗有捐瘠之歎郡邑煩  
振業之方深惟從權規欲濟事攷諸周典甫侯有贖刑之法稽于  
漢世晁錯有免罪之策所以厚民收怒實邊弭患且欲詳按舊制  
闕略輕科自非犯盜殺人受賕撓法之類理不得舍意在必誅餘  
竝差次免刑之條申明入穀之贖以實邊境以防災潦雖復失之  
有罪不猶賢于賦民勸思張敞之言畱省望之之議條陳利病開  
示話言

問八卦繇策而起九疇以數而興河洛之書相爲表裏天人之際  
莫不該貫固以究性命之韞著禍福之效包括三極陰隲下民者  
也何則輔嗣解易孔氏釋書六爻文辭止明人事五種性行專推  
王者迨至上經下經離爲二說五福六極合爲九類斯文若此其  
義安適申尋前世博存眾業京氏之術列于學官夏侯之經治于  
博士咸以儒者明于天道前賢多習舊史具存厥後蔑然其故何  
也且欲兼崇其學使名其家庶幾精義之弗淪或謂異端之斯害  
遲聞明辯用釋疑懷

問經莫大于易坎之彖曰王公設險以守其國邱明之傳曰恃險  
與馬無興國焉吳起對魏文侯曰在德不在險後世拘文之士莫  
不歎息起言引爲鑒照按堯都中冀舜都蒲阪夫豈乏德耶曷爲  
竝據河山之勝哉豈易之書故不及春秋戰國一時之辯乎蒙竊  
惑焉願問經傳交戾之說折以至當

頌銘

烈文卽政頌

聖文睿武仁明孝德皇帝御大器之踰年改元乎天聖協華寶曆承光祖統親朝長信用漢家五日之儀委成冢宰修商帝三年之制德心克廣孝思不匱又明年新火再出祥琴且御皇帝慕孺軫悼明發忘寐顓居靖冥之館眇思恭默之道于時有位卿弼樂親戶牖之坐彼都人士渴聞警蹕之音懷思皇皇若有求而未得于是三府元老諸邸皇屬外廷表著之俊周衛環拱之士相與叩延英之闈奉需頭之奏且曰上天之載無聲樹君而司牧聖人之寶曰位代工而統治先王知駿命之不易也故光裕大德以席先靈之休知賢業之可久也故卜建冢嗣以系萬世之統所以尊一王之大固九鼎之重三代之君綽有令問善繼志而述事能祈天而永命大橫啓兆隆奕世之基緒小心嗣位昭前人之光明用能登格皇穹翕受遐福詩書所歎簡墨攸在陛下起元嫡握神寶典主震器協星海之輝潤紹休乾圖恢天日之覆照靜淵敦敏之性泰

定于德宇緝熙光明之學優入于聖域播憲循于軌物賦政諮于哲艾躬承積累之慶奉持燕翼之謀是以六飛御辨之辰兩宮布度之際表裏說穆上下安安五土柔嘉悉保于正色萬物森植咸極于崇邱而陛下天姿粹溫聖性謙亮亦旣禪除之制彌懷孺慕之愛金冊顯號推洪代而弗刻玉牀貴位虛長秋而未建上帝山川百神之祀久俟翠華之來咸池英莖六代之樂未登端冕之聽萬方企竦羣臣迷撓噴有夏蟲之疑鬱懷旱雲之望是宜推策迎日先天奉時攷帝典肆類之儀舉王祭升中之禮按元封刻石之事建明堂受記之曆紹建先憲拱揖羣神因斯而談不亦休歟上乃回精易慮煥發隆旨且曰羣公元宰告朕以祖宗錫羨之美郊丘報貺之事敢不親執圭鬯以允天人之意若乃陟仙閭探神策薦功魄寶同符先帝此事體大未遑經畫姑俟十五物來徐議其可乃命太史練日儀曹具禮因義車之南至薦吉士之精享御時龍之乘備法物之駕百靈扈蹕齋于高廟翼日寶校次于帷宮天

光晏温日華明練陳玉帛二精之物建金石九奏之樂聲氣遠條坑谷皆滿薦鬯之夕絳光肅然照乎馨黍之薦奉以委山之瑞神具醉止禮成告罷回一就之大輅御百常之豐樓大賚多方與物更始命廷尉蠲殊死之罪詔大農削逋租之籍條中藏之繪帛出上林之泉刀第賞六師均渥四極旣而按羽林之寶仗卽正陽之祕殿華芝對蔭暉幄竝開陛戟交于百重軒樂周乎四面萬國上計儼貢篚而駢臻諸蕃來朝端寶摯而森列桓桓螭虎之士峩峩鴻鸞之黨駸假無言相趨動色因誌祀之訖禮譔徽名而紀德丞相常伯伏而奏曰陛下日靖中邦道躋先軌率循大卞附麗皇極粵若右文稽古者爲邦之不敎而陛下陶化染學崇四術六藝之風不曰聖文乎靈武圖功者制世之深略而陛下糾戎綏華得五表五餌之術不曰睿武乎仁者道之極摯而陛下勤恤民隱惠養含生之倫不曰仁明乎孝者行之難能而陛下躬奉天經宗樹錫類之本不曰孝德乎重以哀對上靈申嚴大祭煥揚盛則丕擁龐

休冠德卓蹤格天光表而乃遵養景鑠逡巡懿號是道大無強名之字而天保失報上之誼也謹疏瀹靈腑俾揣盛德攷文金匱鏤章玉寶昧死再拜奉徽號上萬年之觴帝曰昔我三后以聖神紀物聰直在天覆蔭本支保右命曆資承長世之善充入舊貫之居尚賴股肱之良同扶樞極之重天正穀旦拜貺于郊休氣薰蒸福物萬舉抑乃長樂寶慈之攸感清廟先德之所及而近臣庶尹謬相歸美不斷來表俾享鴻名一日萬幾重增乎兢業也于時倚裳而歌呼望雲而連抃清光照于咫尺佳氣浮乎鬱蔥皇儀慶成謁者贊罷上猶懼涉道之未淵基德之未厚漏泉之未及覆盆之未照退乃訪道宣室程書衡石詳裁治體總攬權綱觀墨家節用之文見老氏寶儉之語將矯華靡之弊獨宗簡樸之化清心以聚政絜矩以固本底慎財賦勸課農桑存恤鰥寡務休力役減尚方工巧之伎卻外府珍麗之貢明慎庶獄省察偏奏文書調度務從于簡寡號令風采頴尚以寬大水衡舉池籞之地公給細民縣官疏

鹽鐵之禁抑從末減譽髦斯士悉取于廉孝賦納以言咸用于經術體貌良弼容受直辭猶謂天下之安忘戰不可闕外之制有備無患更乃講練兵政崇國防衛保大以靖民竭歡而敦族吏懷飭簋之潔家象濯纓之朝斯人有樂和之聲緣邊無晏開之警耕田鑿井飲食充乎四鬴鳴雞吠大煙火接乎萬里洋洋乎韶盡美矣郁郁哉文之治也足以比榮太上延光方來億萬斯年篤天之祐下臣生長閭巷霑沐恩教欲治之主逢享而甚難盛德之事詠歌而不足私念嘗以薄技拔于諸生方今采樵之夫俱善談道自古畎畝之士不忘愛君謹因筆墨之文恭宣竹帛之美形容萬一作爲頌曰帝宋四葉祖宗重光乃神恭默右序縣昌承顏長信御辨明堂秉率先軌總括懿綱報本主昊肇禋吉土哀對羣元斂時皇祐瑞品紛盈靈鳳翔舞精意格神孝思光古豐樓霈赦寶冊施名龜疇建極鳧鷖守成功熙庶事惠浸羣萌億萬之世永光帝絃

斛銘

勿平其量而平其心心苟無邪斯量之嘉攷工記有嘉量之文原本作斯量之家誤今

論辨  
四皓論

善乎子房之能納說也不先事而強聒不後事而失幾不問則不言有言則必當其可故聽之易而用之不難也評者曰漢業存亡在俯仰間而留侯于此每從容焉諸侯失固陵之期始分信越之地複道見沙中之聚始言雍齒之侯善言子房矣至于引致四皓羽翼儲宮方之齊桓公會合八國定王世子于首止事簡而力不勞其績尤偉而世之君子乃致疑焉謂審有此是子房爲子結黨以拒父也夫高祖駕馭獨立爲帝其才氣雄傑豈四老人所能抗于漢廷大臣力諫之強豈不賢于四老人之助乎是蓋未知聖人深許首止之盟而稱管仲相齊一匡天下之美也匡原本避宋太祖諱改作正今從論  
語本文  
易于坎之九四曰樽酒簋二用缶納約自牖先儒以子房



四皓之事明之曰人心有所蔽亦有所明欲立趙王如意者高帝之所蔽也聞四老人之賢願見而莫能致者其心之所明也子房用其明以去其蔽是自牖納約者宜其從之之速也夫先賢之學非世之君子所能及也今據舊史詳載之以見高帝免廢嫡之愆漢家有父子之序非子房其誰賴且子房時然後言言必有益而前史謂良與上言前後甚多非天下所以治亂安危者故不載嗚呼良豈有費言哉

楚王城辨

鄆南之西北距邑十五里有古雉堞曰楚王城其形如瓠壺其規千步其高十尺形勢存焉城南隅有神祠數椽榜曰楚王廟廟有斷碑雖剝尚可尋繹卽唐乾符中雲川進士馬昌寓爲記指神爲晉司馬休之當桓靈寶之篡休之自會稽赴援築壘駐兵以俟四方之集其文穿鑿無所攷實余閱晉書司馬休之雖封楚居漢中安得自會稽唱義復按史記吳王壽夢二年楚之亡大夫申公巫

臣怨楚將反而奔晉自晉使吳敎吳用兵乘車令其子爲吳行人吳于是始通中國吳伐楚十六年楚共王伐吳至衡山杜預云吳興烏程縣南是也土人語訛呼曰橫山其上猶有城址遺迹則鄆南之墟相去百里猶有說焉城之內外耕者多獲石戈矛箭鏃余亦得其四五禹貢荊州貢砥礪磬丹春秋時隼集陳廷楛貫之石磬長尺有咫時人莫能知而問孔子不近取之荊梁而遠取之肅慎非獨荊梁不貢此矢是知中國兵器不用石而用銅也明矣則楚王安得爲休之耶更俟博識者辨之

序贊

靈芝序

噫天壤之甄化有自然之妙物其名曰芝草世不常產根無定系至虛幽贊太和陶蒸託寓而葩表顯有德豈非靈氣之所回復神物之所護持哉侍郎蔣公性正道全年耆德茂往以致官來還宰旅天子崇旅俊又閔勞以事進拜小宗伯告于吳下樹石三徑溪

館在焉癸巳夏六月地中產芝一枝挺然發榮匪茲匪植芬蓋卻  
邪鮮明眩視一之日得土之正其色惟戊得太玄黃圍之象焉三  
之日受天之和變彩而紫得句曲燕脂之色焉太守李公賞異之  
率賓僚宴其第奉觴爲公之壽復以靈芝榜其坊公醉而賦詩歸  
美于春秋之地主吳士善詩者隨而頌歎之李公見授以書託志  
其事攷之舊史東陽以孝行產于廬次中牟有善政生于便坐書  
之聳動揭以昭德公才稱朝廷名爲時宗至德中和表于履道大  
雅豈弟發爲政事不登袞路議者惜焉夫芝仙草也道書載之尚  
矣其或者以公之德之劬謀謨弗究欲其謠綺季之曲樂義皇之  
化誕錫難老俾冒遐福以明大有上吉无不利也宿視公丈人行  
也聞之欣抃然不得侍几杖爲壽于樽下亦願以芝名公之館焉  
集賢給事俞公送行詩序

春秋之際卿大夫出聘鄰國交接用微言以相感必稱詩以見志  
若七子之寵趙武六卿之餞韓起是也風有康公于渭之送雅有  
顯父出屠之祖瓊琚雜佩之語以將其珍意儻革淑旂之詠以聳  
其行光流風之來所尚邈矣集賢夕拜俞公以耆哲之望履中庸  
之美風德器幹作時從臣逮事兩朝間餘三紀節任之要則關中  
京右載籌其筆旂鎮之重則渚宮錢塘迭佩其紱荆吳二域政風  
相翔寶元初上嘉乃賢特詔以覲法宮延對勞問移刻出從革輦  
入陪禁幄參麗正刊修之職居東臺論駁之任乃六卿之所履二  
樞之與鄰蓋將若時而柄用焉公神守獨勝天均默識不以榮利  
滑其太和頗勞侍從之班少求偃息之地謂宣城佳山水美園館  
喬梓在望案牘差稀可以瑩煩襟養妙氣三進得請一麾遂行朝  
右諸公聳伏夷退自禁庭雋父之老洎外朝膚敏之彥或賦藻什  
以謠祖帳敘承明之厭直美嵇山之還守莫不鏗純命奏追琢取  
成皆韶武之祕音荆藍之絕寶比歌郢之曲相高于國中興臨滄  
之篇竝傳于江左足以廣高齋之逸韻增黃堂之故事宿承貺授  
本辱命冠篇絕大雅穆如之章慚未學斐然之累寶元己卯季冬

二十八日序

臨海梵才大師真贊

梵才大師以實性會道以餘力工詩天聖中至自台山館于輦寺朝之名臣勝士莫不欣挹其風日至于室參評雅道間印禪理尋被詔譯館訂正智者慈恩二教及同編釋教總錄三十卷七年書成奏御賜紫方袍未幾歸臨海北山埽淨名庵居之慶曆初予自山出守吳興師適有茗溪之行得尋支許之集自我見將二十年雖正始之音泠然在耳而赤髭之相邈哉難值門人有繪其像持至都下者宛具眉毫若與神對感舊懷遠爲之贊云北山大士梵才錫名禪離文字詩陶性情迹安林刹聲動王城學徒傳像繪筆何精秀氣閒遠妙相圓成此身有報本體無生月皎寒水雲棲太清龍華後會聊記宿誠

文恭集卷二十九

文恭集卷三十

書啓

上謝學士

某聞昔士擁薦賢之轂有味其言至聖開隆道之門不與其退布在方策貽厥後昆是以青雲彌高猶垂可附之氣洪鐘善應不聞待叩之音若夫駿望逸羣高材拔萃惠訓不倦增激于懦夫教思無窮有警于淺俗領先覺之事業挺諸生之表儀偃伏下風講聞高誼惟日滋久乃心不忘逃瞻京兆之門恭贊許都之刺伏惟某官豐規冠世高藻凌雲蘊前識之道華履中庸之德範神檢清出降乎崧極之靈天性少成鍾乃奎躔之粹文兼三變之體學富九家之流邁天會之寢昌標卿材之獨秀平陽充賦聯大對以飛英法坐試言射甲科而得雋茂恩加等貢士有開爰當精汰之朝式隆出宰之寄弦歌在御寬小過而字民銳刃有餘批大郤而從政聊爲漸陸式示牽絲丕變一同之風洽聞三異之化屬以堯雲修

覲漢闕拜書奏東朔之千篇名聞乙牘獻子美之三賦觀若堵牆  
更生之言有補于當世子雲之論不詭于聖人食時之賦立成洛  
下之紙翔貴羣公無出其右天子喜同其時故得度越眾賢對揚  
景命校文延閣動太一之威神掌故曲臺顧后蒼之典禮練達質  
文之統周知沿革之綱矧復奕世賢多家公望重處霜臺之鼎貴  
奉雲陛之旦朝周公拜前更追故事之美疏傳在後未羨曩時之  
榮會稽之綬既懷承明之廬亦厭亟分半刺聿貳方州習貫政經  
用儒術而飾事沈研吏道宗法令以爲師潔素絲以在公緩柔轡  
以馭下道素自處刑端益空然而宣室懷賢方仁賈生之對淮南  
答詔當用長卿之文屬兩宮求治之辰非一郡淹才之日行聞三  
節之召入聯四戶之榮延企之誠中外攸若如某者實同康瓠賤  
比多砥管仲之器小哉安能任大汲黯之戇甚矣胡可適時徒以  
西學隆文南魚發詠思樂烝髦之選勉懷潔己之風引童刻以自  
持壯夫竊笑學鼠能而雖眾一技不成顧輪翮以莫堪飭邊幅而

奚用爰披鳥跡之策幾換鳳鳴之笳仍且屢邁家艱坐更歲舉叔  
夜之不堪滋甚原生之將落可憂知己未伸無林宗之三辟治生  
不善荒楊季之一廛追時好而豈能謀藏身而不暇姑欲脫名聲  
之鎖棄富貴之鞭遠同魚鳥之羣退避英髦之域直以舜華載旦  
周命維新三代同風克用直心之道四方有志未慚橫目之民庶  
幾尺蠖之伸更礪鉛刀之割伏遇大丞學士輟從周衛關掌使符  
慶惟桑梓之邦蒙被潤河之福加以冲襟玉裕泰宇淵淳樂育人  
材克盡吹枯之力獎拔士類重嘉溢美之辭咸預屬于徽猷皆想  
見于風采是用掣鈴下館曳裾高門不由左右之容徑伸盤蹠之  
禮苟或履錐可用溝木未捐回珠吐以見私枉鱗毫而垂飾圮橋  
跪履無成孺子之名南郡橫經請誌先生之論誓將藹薄辱在品  
題

上兩浙均輸徐學士

某聞吾黨小子仲尼興斐然之嗟天下英才孟軻有樂得之歎斯

皆樹微言于不朽敦惠訓于方來紀乎油素之間煥若日星之際  
世未喪道天誘其衷誕鍾上智之才卓冠生民之秀若乃蚤持鉛  
割夙奉師嚴以困蒙難擊之姿被諄誨惟勤之賜潛心大業雖刻  
核以自修從事華辭終濩落而無用載持篆刻式叩高明庶幾一  
蔽之言未罪三隅之反恭惟某官骨含天粹氣鑠神崧直如清廟  
之絃温若白虹之玉豐規不雜粲邦直之三英勝範自居秉民彝  
之一德自頃龍標得雋鳳諾升華金管第文天子重平津之對石  
渠建議諸老伏賈傳之能雍容著作之庭密邇清閒之宴高文豔  
發皆張鷟之青錢湧思橫流盡君房之妙筆故得爭臣進秩右史  
聯榮挺漢檻之直躬筮周官之華選組垂丈二旦趨紫閣之朝牘  
奏三千日伏青規之地袞無闕職朝有正人大君題柱以記名羣  
公奉贄而結好乃睠三吳之內地實處九州之上腴六筦攸司鹽  
鐵之任爲重八材所產天地之藏實繁不有計然之謀誰佐大農  
之賦薦膺神璽出擁使軺紫橐記言少別螭頭之陛繡衣將命遠

輝使節之旌酌寬大而撫齊民用峻清而嚴屬部疑獄所讞多惻  
隱而平反貪吏畏威盡望風而投劾坐統十連之國立富九州之  
儲不廢清談益出餘地金華舊業方任于寶臣羣玉仙山適嚴于  
冊府行看君節之召徑入天坡之崇當密贊于樞猷豈久商于功  
利如某者資材甚薄性習不靈會唐虞稽古之辰隸鄒魯守經之  
業從師鄭校僅明六甲之書鬻技吳人會乏百金之直往歲以楚  
材擇秀魯席聘珍妄由窮巷之中駿奔嶢闕之下因緣典謁獲贄  
編聯便坐橫經許入安昌之館末行聞道遂登南郭之門曲敦提  
耳之私屢獲鑄人之問仍以類優之作徧加溢美之言持布鼓以  
過雷門方將辟易具太牢而饗海鳥終用憂疑未接武于諸生驟  
纏哀于方寸筮仕之門不及歸恩之地無階心疚自傷生意殆盡  
目見金城之柳臂垂冥伯之楊弧矢四方雖夙齡而有志蓬蒿三  
徑奈褊褐之不完行閱市中之書勉勤稷下之學攻堅不銳叩寂  
彌空身世在心有韓非之孤憤江山滿目多庾信之悲哀追懷圯

上之言益厚胸中之愧比者國家以裹輪式命刻鵠旌賢邁下武  
之有開思逃虛而安得濫攀英軌勉策駑蹏懦夫之氣寢衰大敵  
之勅可畏未能引退竊望利賓所幸者學士輟仙殿之凝嚴當外  
臺之委重言念維桑之朽壤獲居分陝之西封重撫舞雩之冠更  
露雕蟲之伎頑疏自愧迂闊無堪重念夫操風斤者無可棄之材  
入蘭室者被維馨之美君子之所貴乎道豈以言而廢人善歌者  
使繼其聲亦有教而無類儻顧盍簪之舊未韜鄰燭之光迴珠玉  
一唾之資爲風雲萬里之助左氏膏肓之疾倚在一鍼波臣枯涸  
之危繫于斗水誓將白日庸答所天卑情不任祈恩望德依歸之  
至

上劉學士

自補吏中銓待罪下邑蟬得蔭而方美且無執捕之虞鼠忌器而  
不投適在保全之地俄奉計臺之命俾臨榷木之酷以弓見招頗  
識皮冠之守得檄而喜聊慰寒泉之心自收迹于下陳日馳魂于

重仞泛赤萍之江道換丹桂之月弦疲馬依依仰崇軒而有戀亡  
羊逐逐懼多路以成迷念素志以未伸慨壯年之甫過痿人之不  
忘乎起抑乃常情窮者之欲達其言良難自默敢布翹危之懇用  
塵聰徹之聞幸曲霽于威嚴冀少停于神意某聞士範敦于閭巷  
于以育乎人材柄用歸于朝廷于以尊于天爵惟援能而是舉乃  
聳善之攸先漢世列藩之侯得府檄而作吏魏基大正之職以州  
品而格人皆所以廣王國之薦延恢士林之賞拔旣周咨于行實  
亦博練于才猷咸經清論之高以取當時之重明試以政無尹何  
往學之譏薦登諸朝有公叔同升之美尚賢爲盛往簡攸高降及  
本朝覽于前憲廣籠茂士上歸英毅之尊擢引羣才外委价藩之  
長攷詳幹局參檢行能激官政以交修統時風而歸厚假人之名  
器匪易磨世之礪石在茲內惟浮賤之蹤竊庇惠和之政偃風惟  
舊沐德茲深固慚走俗之微蔑有託名之所將激昂于懦氣願私  
附于高賢伏惟學士術業周深才謨高正英辭惟敏吐五河而並

流偉量克寬吞七澤而不憑家著元功之籍世仰清光之臣而自  
驚序參飛虹光垂照備典午仙臺之構掌卯金石室之圖剖判藝  
文講明憲度獨當臺上之直徧閱禁中之書侍史執博山之鑪日  
薰賜服神父秉青藜之燭夜訪成編恬榮利以自持遇沐休而不  
出陳咸官簿絕居方進之前孟光年資迴處釋承之右武帳歎積  
薪之學廣內厭直廬之勞擁高箱而出關肅將靈命服毳衣而巡  
國大按祥刑平反有京兆之風決囚多御史之雨間屬慎求良翰  
委重左符佳夢發占應獸頭之新舊樂郊行部煥車色之朱丹體  
寬簡而靖民篤中和而統事庚桑用道大移喂囁之風魯侯尚仁  
宵萃泮林之韻動遵名教之樂居多暇豫之娛胡牀坐談樓上之  
興不淺陽春度曲國中之和幾稀重以誘接寒流惇崇雅道子將  
之風鑒特出每持鄉里之評王澄之才令相高多爲士人之目搢  
紳廕其德宇當世仰其龍門矧復最績已凝上心所注華林飾館  
卽時當發于汝墳宣室對神半夜將前于釐席入侍高門之地並

裁方底之書罄伸造辟之辭大展熙朝之業某姿材甚下人地並  
寒衡陋是棲乏高符而布世河清旣遇無宏略以佐時自託蹟于  
王塗旋服勞于吏鎖政經禱昧官守放紛仕路濫巾當宵雅肄三  
之始銓臺攷課有茂陵第六之羞還守中田之株復仍長府之貫  
幸依屬部獲備末員少游平生只自希于羣吏騶奴等輩良無益  
于縣官徒以業在學箕志存肯構早竊幽邦之譽誤爲前輩之知  
聞勝母之里名少諸趨嚮對於陵之鵝炙僅曉廉隅然而力命不  
侔功庸又薄一躋仕版三見閨餘貧室屢空將從孤竹之子槁容  
日悴近同吟澤之人私懷趨府之初特被均茵之遇博以皇道旣  
聞名理之談接乃朱顏迴曝温仁之氣自非木偶幸食土毛知恩  
紀之罕階蓋生緣之內迫惟此翻然之改良非獲已之謀伏望知  
府學士廕棘垂慈拔揚拒謗寬鰥生之不逮察愚守之無他均被  
末光保終前惠筦庫七十少紆薦拔之仁躡履三千永有吠鳴之  
地仰依曠度無廢瞽言要以平生繫于升墜

上陳諫議

去歲入調中銓駕言上國匪由介者得侍師嚴登南郡之絳堂生  
徒甚眾對安昌之卮酒禮數特親固慚極陋之材久事徒勞之役  
奔波仕路契闊講筵挾策讀書且有亡羊之懼操刀學割更懷傷  
錦之憂寢負空疏何從諮仰旋罷休于末局方欣附于美猷虔瞻  
哲艾之姿頓釋羈離之恨洪鐘斯叩每盡春容之音後車見存益  
隆教載之禮闕汪陂之偉度軫墜履之深情念鄒木之輪困未登  
器用哀齊牛之穀鯨有惻仁心延華譽于朝紳引辟書于相幕朋  
游改觀身蹟生光恩自曲成本噓枯而及此事從中寢繇連蹇之  
使然揣薄分以自知在所天而曷報窮居京轂坐隔親闈不勝烏  
鳥之情遂謀升斗之祿結半通之吏綬竊歎喧卑去數仞之師牆  
轉成孤陋辱五花之判筆裁二雅之雕章送子以言掩雜珮路車  
之贈投人于闇屈夜光明月之珍長北斗之虛名耀南轅之行色  
昔汝南舊俗著子將之評襄陽故時重德公之語皆巖野窮棲之

士非朝廷素貴之人言論所推材品攸定況夫天民先覺之彥德  
爵達尊之英諾貴百金望重九鼎欬唾足以成寶獎拔由其致榮  
矧伊寒素之流猥玷品題之目拜承嘉貺聳激懦心自歸環堵之  
居適有負薪之恙曠馳謝檄屢換鳴笛背負刺芒愧薄夫之不肖  
量包山藪冀大雅之見容屬春物之芳妍仰天倪之恬勝伏惟諫  
議器博用大道周性全足文獻以居朝基太平而展業不吐不茹  
氣雄袞職之臣有德有言名冠儒林之右敷明治體練達朝經獻  
納論思馴致中和之政典謨訓誥裁成深厚之風將美居多進忠  
匪懈盡禮容而接物恢德宇以服人天懷發中動循于教令老成  
在上未墜于典刑方圖黃髮之賢共秉紫樞之化十旬遠至將登  
荀爽之台司百歲康強更享衛公之壽考上扶宗稷大庇蒼黔庶  
此孤生永棲鈞蔭勉加良食行副具瞻

上徐監丞

中阿著詠本推美于育材下體垂言實戒遺于采菲苟非躬茂育



之至持博古之心則何以擢標幹以上升慶根莖而致用垂于風  
雅蓋先民激勸之言行自朝廷實君子生成之德其有久盤東鄙  
偃伏大名曳裾曾展于嚴趨改席猥隆于渥眄一介之善俾延獎  
以居多六尺之軀誓報償而不忘敢再稽于前典將少述于丹衷  
伏惟某官西園上才東序祕寶朱紘疏越含清廟之遺音竹箭有  
筠挺會稽之秀質式邁亨嘉之運誕揚休令之名而自玉帛賈賢  
弓旌竝俊紫宸試可擢構厦之宏材鴻筆飛英奉揚廷之大對黃  
香才器處漢室之無雙衛玠風流居晉廷之第一式膺寵渥出貳  
藩防當三載之陟明奉十行之細札彌茂思皇之舉益隆乃眷之  
知宣室問神重賈生之應對中堂落筆驚子美之文華旋通籍于  
蘭臺復聯榮于仙殿陳三山之圖籍定四部之籤題著鄭默之中  
經洞分朱紫紉馬遷之實錄妙際天人故當自西掖之升華由內  
廷之將命紫泥封詔遠追長慶之風青鎖承宣密視淮南之草矧  
僉謀之所屬顧嚴詔以非稽如某也本乏聲猷素無輪翮繩樞少

賤非三川聲利之家韋帶安貧異七葉貂蟬之族徒以真人撫運  
王道興譚奉鉛槧以自強顧魯魚而不辨七日隱霧未遑下食之  
心六月搏風安有排虛之翼旣服勤而無狀徒鑽仰以爲勞適值  
國家妙選時英精掄鄉秀詔書寬大容庇迹于神皋文雅縱橫竟  
沾名于朝右內慚狂斐旁歎鞮孤蟠木輪困旣絕先容之助刺字  
漫滅徒興逆旅之嗟因力綴于編聯偶上塵于聽視祇期倡優方  
朔誠有類于枚舉刻畫無鹽亦深慚于西子豈謂某官志敦善誘  
道尚謙鳴愍顏回之不愚謂子房之可教至以名公接席多士登  
門迴月旦之評曲加題品傳春秋之字遽辱褒稱俾寒灰之復煖  
令困獸而思鬪矧預最靈之列豈忘佩服之誠敢不淬勵縑緗服  
從名檢上以全公卿之奇遇次則成父母之榮歡如泥在鈞更假  
良工之手漆身爲癩永懷國士之知

上徐舍人

故歲恪趨神輦祇調天官代舍食魚早託賓榮之列珍池浴鳳式

瞻鼎貴之姿因持爵里之名爰達巾幘之侍均熊引坐捉麈賜談  
久要不忘迴加于獎拔一夫未獲深致于咨嗟靡矜廉陞之崇匪  
間斗筭之賤禮容溫穆德蔭恢疏私慚駑下之流本乏芥微之善  
出菰蘆之內安有美材居韋布之中早蒙屈體飾青黃于溝斷問  
朱紫于月評水鑑論才謬竊襄陽之譽蒲葵振價乃成中宿之資  
足爲貧女之宵光豈有家丞之秋實濫階時俊猥玷科榮一命牽  
絲預陳咸之官簿五年隨牒過管父之瓜時困膏火之煎熬有齋  
鹽之窮苦俛眉刀筆之吏困跡風塵之塗擊踣曲拳自厭莊書之  
禮伊優骯髒備嘗秦客之吟自解去于官聯旋入參于選格小材  
累日有長調以斯存高足據津無遠圖而自致辱台符之次補當  
民版之句稽去英雄所躔之都事州縣徒勞之職望鄧林而借樹  
未獲棲身歷吳阪以駕車分甘俛首其如辱交游之光寵玷恩紀  
之薦延年勢漸高已歎東隅之失河清難遇恐成大耄之悲旋辭  
闕里之牆歸訪隆中之舍沈約之病寬韋帶哀駘之肘臥垂楊春

服旣成邈阻沂童之舞龍門不見悅勞記室之心職由疲薊之姿  
絕奉碾磨之問仰天倪之專氣協神觀之葆光伏惟副閣舍人文  
炳鈞奎識侔大蔡特稟武山之氣首躋王國之才丹穴靈姿絕雲  
霓而上擊明堂奇棟凌霄壑以自高會東戶之顯時蘊南臺之賢  
業秉筆贊爲于名命實代聖言造辟入告乎謨猷允推君德已茂  
寶臣之略式隆赫尹之瞻定草淮南方警玉峰之署調梅傅野久  
虛金鼎之司仁宣枚卜之求以迪謨明之業豈惟蕞質獲託化鈞  
抑亦輿情僉圖大庇願加丈食永輔本朝

上知府劉學士

近以隆冬聿暮瑞霰其零天粹融甘屏薦瘥之故氣土膏含潤發  
豐懋之嘉占竊欣時律之和頗動春螽之躍因著擊轅之作仰塵  
隱几之觀學將落而有來文久廢而無次豬苓至鄙奚登藥籠之  
收鼠璞未屠甘薦玉人之誚周章失次泐墨交并豈謂知府學士  
循誘凝懷秉彝尚德枉燕公之妙筆裁漢將之清篇灑雲朵以封

題遣犀髯而特遺筠編况發繡段交輝字截寸金價超尺璧少陵  
韓苑悚避風騷之壇咸池大章鏘流杳默之韻掩郢樓之絕調詫  
梁席之諸賓忘位貌之威嚴樂名教之敦獎過私月旦之品謬借  
春秋之評撫弱質以自驚眷具僚而胡幸昔者和尚書之什樂天  
不繫于官資答中郎之詩盧諶亦由于故吏著在舊史用爲善談  
悉由高世之才方隆上笏之賄孤生何者素蘊缺然蚤繫地餅之  
名濫竊庭鶉之食陳完弛擔庇寬政以爲優元叔登堂承高風而  
有自素飧無咎榮貶已多敢紆正始之音更重屈尊之禮封殖嘉  
樹比甘棠而不忘投報木瓜枉英瑤而太厚伏惟知府學士仙瀛  
高彥王國上才能讀典墳過楚臺之倚相老于文學類唐室之次  
山聊分銀兔之符未陟金鼈之頂行趨召節入綴近班庶幾珠玉  
之篇便爲冠劍之物藏于魯壁與經義而並陳副在晏楹期來茲  
而共祕永言銜刻匪克攄宣

上蘇州蔣諫議

近削柔函恭塵侍閣仰承左顧迴篤光謙託瓊蘊以致言損玉音  
而流問得孟公之牘素所榮藏比淮王之書更逾苑祕載懷降挹  
彌切欽銘屬時律之戒涼仰道樞之協勝伏惟諫議風猷挺絕宇  
量粹融抱式古之上才厚當陽之渥睠紫囊著位蚤陟金坡之崇  
綠詔宣風薦領銀符之寄甘棠載路已聽于歡謠華黍盈疇更聞  
于豐歲行被節旄之召仁參鼎席之司係瞻所深庇暉有望煩鞅  
是拘傾搖正劇忽邁飛郵之便猥流華牘之音英眇迴殊仰一謙  
之斯厚至言可佩在三復以攸深載涉素商之辰諒安純氣之守  
伏惟諫議體兼四德識照萬殊敷休績于本朝挺豐規于上列屢  
分方面之寄益隆宸極之懷賦政東藩適著惠和之化宣猷南闕  
仁歸宥密之司翹頌所深序陳匪逮

上李相公

某聞伊尹之格皇天恥一夫之有失周公之贊明辟務三握以自  
勤蓋由保父王家總司國柄鑪錘造物上代于化工履履任才廣

量于人品俾洽至和之氣用無太息之聲故能享咸德之顯稱保  
碩膚之全美文武未墜歷百年而可知聖賢相望邈千載而非遠  
伏惟相公識探萬奧體煥三英強毅簡溫日以宣乎眾德和惠忠  
肅世實濟其大猷當永定之席圖御明臺而訪政紫宮命相上配  
六符之星黃閣秉鈞坐調四氣之燭魁柄斟酌同北斗之在天生  
民竦瞻若南山之有石率百官而稱職育萬物以由庚桃李無言  
布清陰于天下鹽梅有味戒公餽于鼎中間屬金七修明玉關撤  
警廟堂甘寢無庸樽俎之師藩闕于宜益光社稷之鎮錫山南國  
賜履東秦成功有不處之名蒼生深未起之歎旋屬中天降詔溫  
洛改轅卓匹馬而來朝秉介圭而修覲禁塗延對左壺之漏屢移  
法座疇咨龍準之顏載說經火辨鍾山之玉拭土見干將之鋒元  
精所生寶鎮增重矧以地尊卜洛府重居畱萬戶帝宮備時巡而  
斯在九金神鼎奠國壤以備存煩于謹之行臺領畱候之管籥商  
山調護早深綺季之思漢閣規隨夙盛平陽之業將還舊德之食

永固立賢之基冠鈞席于宰庭保靈光于永歲上毗哲后大廡斯  
人中外所瞻爲日滋久某性端幽昧業蘊枵疏世閱寒平略無絨  
冕之緒天衢魏煥切勤方甲之書棄襪褊之耕衣習雍容之矩步  
思風澀訥學殖單疏悼類鶩之無成苦食雞之不飽年稱甲子未  
平絳老之疑山過具敖多犯魯君之諱一昨詔開諸路州舉羣廉  
濫隨三百之竿切駕一封之傳遂偕茂士猥玷榮科辱吏牒之充  
員在賤曹而受事屑屑斗筲之役悠悠風塵之塗成嗇夫之綸章  
起家爲幸效南華之官智宿業無聲豈忘飭簋以自修亦冀椎輪  
之有漸嚮緣滿秩訖獲交官方隨上計之行來赴東銓之集公車  
下士正感騶奴之錢長安諸郊未獲司農之鐸幸遇相公前趨大  
旆來侍邃旒袞衣詠我公之歸赤舄寵韓侯之入夙仰宗公之望  
想聞風采之嚴迫位貌之甚微苦聲猷之素薄先談木器早無萬  
乘之容北首金臺甘後四方之至豈意紫垣之碩老俯哀黃綬之  
幽蹤持箕斗之虛名達鈞衡之哲輔聞樂切怵私懼聳于佳音懷

響必彈難括囊于中臆重念某仕塗艱梗緒業漂淪鷺鳥趨時切  
媿史公之論君羹遺母空持頴考之心胸臆結約以亡奇精神蹇  
淺而可歎望青雲而在目悵白日之無津惟期高世之賢再奉持  
樞之拜宰平眾職總覈羣才塊北無垠重啓大鈞之播柔嘉維則  
更流懿德之稱庶依材館之賓願預藥籠之物儻塵鎔造誓竭懦  
衷

又

伏承台旆就統英躔聆溫綈之有初企行臺而增慰伏惟某官爲  
國雋老稟天粹靈秉懿在躬濟和及物星樞席位居常賴于謨明  
帝室作藩動必資于夾輔矧龜蒙之巨鎮乃鉅野之舊邦實倚元  
勳用寬東顧近在旦暮入冠宗公勉爲廟朝益敦福履

文恭集卷三十

